


تاریخ حقوق بین الدول

مؤلفی

ابراہیم حق

مکتب ملکبہ شاہانہ ماذونلرندن

Süleymaniye Kütüphanesi	
Kısmi No	49001
Yeni Kayıt No	
Eski Kayıt No	



صاحب و طابعری: قرہبت و قصبہ

معارف نظارت جلیبہ سنک رخصتیبہ طبع اولمشدر

استانبول

(قرہبت و قصبہ) مطبعہسی — باب عالی جادہ سنده نو

۱۳۰۳



حقوق بين الدولك بالجمله مباحثي حاوی اولق
 اوزره جمع و ترتيبه توسل اولنان آثار عديده نك
 پيدرني ميدان طبع و انتشاره قونيله جنی مدخل حقوق
 بين الدول نام اثار حتميرانه نك مقدمه سنده افاده
 ايدلمشدي نظر تعالی اثرها پونلری مملكتك هر درلو
 ترقیات مادیه و معنويه سنه سبب مستقل اولان ولی
 نعمت بيمتمز شوكتپناه افندمر حضرتلرينك سایه
 معارفوايه ملوكانه لرنده آثار مبحوئه نك ايكنجیسی
 اولان تاريخ حقوق بين الدول دخی بو دفعه قارئین
 کرام حضراتنك پيش انظار لطف و مروتلرينه عرض
 اولونیور حقوق بين الدولك تاريخی بالطبع ايکی قسمه
 انقسام ایدر که بو قسملردن بری علم مذکورک نظریات
 جهتيله و ديکری فعلیات خصوصنجه اولان ترقیسنی
 بين ایلر بو علمك جهت نظريه جه ترقیاته وضع اساس
 ایلان ذات مشهور غروچئوس اولوب اندنصکره کلان

علما و سياسيون مشار اليهك و يردیكي اساسی توسیع و
 اكمال ایدرك زمانمزده کی حالنه كثیر مشلردر فعلیات
 جهتنجه اولان ترقیات ایسه تاریخ بشرك قسم سياسیسی
 دیمكدر که بوده معاهدات صلحیه و سائر ایله محارباتك
 تاریخ اجمالیسنی حاویدر بو جهتله اشبو جلدده شو ایکی
 قسم اساسیدن ترکیب ایدلمش و هر دورک وقایع سیاسیه سی
 بلدیرلدکن صکره او دورده کی حقوق دول علماسنك
 بیاننه شروع ایدلمشدر اجمال سیاسینك دولتتمزه عائد
 اولان جهتلری دهها زیاده تفصیل ایدلدیکی کی عموماً
 تاریخده براین معاهده سنك عقدی بمشيله ختام ویرلمشدر
 معاهده مزبوره نك امضا سندن بری پك چوق وقوعات
 مهمه حیرت ظهوره كلمشسه ده بونلرك پك چوغنك نتایجی
 هنوز معلوم اولدیغی کی ۱۸۷۸ سنه میلادیه سنده
 حقوق بین الدولجه ابتدا ایلان دور جدید دخی هنوز
 تعین و تقرر ایتدیکنندن شمديك تاریخه بوراده نهایت
 ویرلمسی طبیعت مصلحت ایجابندن کورلمشدر .

و ظلم و وحشتلر اجرا ایدر لر ایدی . تاریخ مقدسه نظر اولنسه
 بنی اسرائیلک الک عادی قواعد حقوقیه بی بیله ایاق التنه الیدیغی
 و حتی ملل مغلوبه بی کلیاً قتل و - اموال و املا کلرینی تخریب
 و احراق ایتمکی قاعده اتخاذا ایلدیکی کوریلور زیرا بونلر هیچ
 بروقتده کندی مذهبلرینه سالک اولیانلری انسان عد
 ایتمکدن بشقه - ازاله و جودلری فرض عین اولدیغنه دخی معتقد
 ایدیلر . خصوصیه موحد و جناب حق طرفندن انتشار اعتقاد
 و حدانیت بارییه و ساطته مؤکل بر ملت اولملریله اقوام سائر
 ایله همپایه اولدقلرینی قبول ایتمک کندیلرنجه مستبعد ایدی . -
 فنیکه و قارطاجه لیلرک تجارت بحریه اجراسنه جسارت ایدن
 اجانب سفائننی بغیر حق راست کلدکلری یرده باترملری دول سائر
 تبعه سنک یالکز فنیکه و قارطه جهده دکل ممالک سائرده و حتی
 هر کسه آچیق اولسی لازمکلان دکزلرده بیله تجارته حققرینی
 قبول ایتمدکلرینی اثبات ایدر . آسیای قدیمده یالکز هندولر
 نزدنده بعض حقوق دول قواعدینه تصادف اولنور .

عهد قدیمده حقوق بین الدولک تحدیثه مانع اولان شی
 هر ملتک بالطبع سائرلرینه دشمن اولدیغی اعتقادی و هر قومک
 کندیسنی خلقتاً سائرله فائق کور می خصوصی ایدی .
 یونانیلر طریق مدنیتده پک زیاده ترقی ایتمدکلری و تشکل مایلری
 دخی اساساً مذهبه مستند اولدیغی حالده بو ایکی ذهاب باطل
 آنلریده مؤسس حقوق دول اولق شرفندن محروم ایلشدر .

فصل اول

ازمنه متقدمه دن قرون جدیده ابتداسنه قدر

عهد قدیم

ازمنه قدیمده موجود اولان ملل و اقوام حقوق بین الدولک
 وجودندن خبردار اولمیب یالکز برحس طبیعی سائقه سیله ملل
 سائر ایله اولان مناسبتلرنده بعض قواعد رعایت ایدر لر -
 و قواعد مذکوره یا مذاهب جاریه دن و یا خود من قدیم مرعی
 الاجرا طوتیلان عاداتدن متولد اولوب اکثر احوالده محافظه لرینه
 زیاده سیله اعتنا اولنور ایدی : سفرانک مصونیتی اعلان حرب
 ایچون بر اصول مخصوصه توفیق حرکت اولنمی ختام
 محاربه ده صلحک رسماً اعلانی مسافره کلان اجانبه رعایت
 ایدلمسی کبی خصوصیات بو قبیلندیر . بونکله برابر بونلره
 یالکز مذهبه منسوبیتلری و یا خود تعامل قدیمله معین اولملری
 جهتله رعایت اولنوب حقوق بشریه هیچ کسه نک عقلنه کلز
 و علی العاده اجنبیلره انسان نظریه بیله باقلمزدی . حالا زمانمزده
 بعض اقوام غیر متقدمه نک کندیلرینی انسان تسمیه ایتملری سائرلری
 بو صفتله طایم دقلرینی ایما ایدر . اقوام قدیمه صلح وقتنده سائر
 اللرندن کلدیکی قدر ایراث مضرت ایتمکه چالش دقلری کبی
 حربده دخی دشمن مغلوبه هر در او فکر و تصورک فوقنده اشکنجه

یونانستانک دور قهرمانیسنده اخلاق ملیه غایت شدید و وحشیانه ایدی . محاربه ده اعدانک کافه سی اعدام اولتیق قاعده دن اولغله مغلوبینه اصلاً مرجت ایدلز و اولنلرک جسدی صویلدقدن صکره پاره پاره ایدیلهرک میدانده ترک اولنور ایدی . دول سائر ایله اولان مناسباتده یونانیلر کندیلمی خلیقه عالی بر قوم عد ایدرک سائر لرینی باربار اسمیله یاد ایدرلر و — اجنبی و باربارلر کله لرینه عین صورته معنا و بررلر ایدی . نزدلرنده تعصب مذهبی رینه غایت مفرط بر تعصب ملی قائم اولوب کندیلمی عالمه حکم ایتک و باربارلرک ایسه یونانیلره اسیر اولتیق اوزره خلق اولندقلرینه ذاهب اوله رق بو مقصدک حصولی ایچون هر درلو وسائطک استعمالنی مقبول عد ایدرلر ایدی . بو فکر یالکز عوام اهالی به مخصوص اولیوب ارستطالیس و افلاطون کبی حکمانک دخی مظهر حسن قبولری اولمش و بونلر اثرلرنده بیان و قبولنی توصیه ایلدکری قواعدی یالکز یونانیلره تخصیص ایدرک باربارلرک بونلره اسیر اولقدن بشقه حق و وظیفه لری اولدیغنی فکرینی التزام ایلشدر . افلاطون شدت دها و وسعت ذکاسیله برابر افندی ایله اسیر حقنده متساوی الحکم قواعد طبیعیه وجودینی هیچ بر وقت اکلایه ماش و بونلری دائماً آیری جنس مخلوقات مقامنده طوتمشدر . توسیدیتمک بیانه نظراً « بر دولت و جمهوریت حقنده مفید اولان شیئی بر وقتده نامحق اوله مز » قاعده سی عموماً قبول

اولتمشدی . بو فکر اخلاق ملیه ده اودرجه ده برلشمشدی که فضائل اخلاقیه و خصائل ذاتیه سیله بر شهرت ابدیه نائل اولان اریستید بیله قواعد اخلاقیه نک امور خصوصیه و عمومیه ده صور مختلفه اوزره جاری اولدیغنی و برنده غیرجاز اولان حرکتک دیکرنده پک محق اوله بیله جکنی بیان ایدردی یونانیلرک ترور و محاربه سنده کی حرکتلری بر طاقم افعال و حشیه دن عبارتدر . محاربه نک ختامنده شهر تخریب و احراق و اهالیسی عموماً قتل ایدلمش و حتی قادینلر و چو جقلره بیله مرجت اولتمشدی . قهرمانلردن آشیلک خصم مغلوبی و ترور و حکمدارینک اوغلی هکتوری اولدردکن صکره بجاغندن ایپ طاقه رق اردوده جسدینی سورکله مسی او زمان اخلاقنک شدتنی ارائه ایدر . مدیا محارباتی اثناسنده دخی محابینک بر برینه ایتدکری معامله هیچ بر وجهله حقوقه توفیق ایدیله مز: ایرانیلر یونانستانک ید ضبطلرینه بکن اقسامنده اثر حیات بر اقدقلمی کبی یونانیلرده اله بکن اسرانی اعدام ایله حقوق انسانیه بی پایمال ایتکده دشمنلرندن کری قالمامقده ایدیلر . مغلوبینه حسن معامله ایتک اصولی مؤخرأ ما کدونیا حکمداری اسکندر کبیر طرفندن اجرا اولدیغنی کوریلور سه ده بونکده اساسلی بر فکره مستند اولدیغنی تب ، صور ، پرسه ، پولیس شهرلرینک تخریبندن اکلاشیلور .

اقوام یونانیه بر برلری حتمنده دخی حقوق دوله موافق

صورتده معامله ایتزلایندی . جواهر مختلفه آره سنده وقوع بولان محاربه زده شهر لر تخریب اموال موجوده بغما و مزروعات احراق ایدیلور و اکثر و قتل اهالینک محارب اولیان قسمی دخی قلمدن پکیریلوردی . پلوپوز محاربه سی اثناسنده یونانلیلر بر لرینه عادتا باربار لر کبی معامله ایتکده ایدیلر . اسپارطه لیلر تب لیلر ایله متفقاً پلاته شهرینی بالمحاصره محافظلرینی کندی رضالریله ترک سلاحه مجبور ایتدکن صکره اسپارطه دن کلان قومیسر لر تب حکومتنک پلاته یه اولان غیظ و خصومتی تسکین و بو وجهله متفکرینی ممنون ایتک ایچون محافظلری برر استنطاقله محاربه واقعه ده اسپارطه لهنده خدمت ایتدکری (!! ایچون اعدام ایتشلر و بغیر حق او قدر بیچاره نک قانی دوکشلر ایدی . اسپارطه لیلر کبی اساس جمعیت عسکرلک اولان بر قوم دکل مدنیتله شهر تشعار اولان آتنه لیلریله بو مثل و حقمسز لقلر اجر اسندن چکنزلر ایدی آتنه لیلر کندی لریله محارب اولیوب بیطرفی تام حالنده بولنان ملوس اطه سنه یالکز جمهوریتک کسب قوت و شوکت ایتسی ایچون لزومنی بهانه ایدرک هجوم ایتدکری و ملوس لیلرک بو بابده کی افاداتنه حواله سمع اعتبار ایتیه رک نهایت تسلیمه مجبور اولان یکنناهلری مجرد محافظه استقلاله غیرت ایتلرندن طولایی اعدام ایلدکری مشهوردر .

بعض مؤلفین یونانستان اقوام مختلفه سی بیننده مکمل بر حقوق دول موجود بولندیغنی ادعا ایله مقام اثباتده اوله رق

قواعد آتیه نک او وقتلر معتبر و مرعی الاجرا اولدیغنی بیان ایدرلر .

۱ محاربه ده وفات ایدنلر مدفنن محروم بر اقیله من ۲ مظفریتی متعاقب دائمی بر علامت ظفر رکز ایدیله من ۳ بر شهره هجوم وقوعنده معبدلره التجا ایدنلر قتل اولنه من ۴ اشیای مقدسه یی سرقت ایدنلر مدفنن محروم ایدیله بیلور ۵ یونانیلر — ولو زمان حربده اوله لر — معبدلره و عمومی او بولره سر بستجه کیدوب کلک و معبودلره قربان عرض و تقدیم ایتک حقنی حازدرلر .

قواعد مذکوره آفقیقتیون (Amphyction) مجلسی طرفندن قبول ایدلمشسنده ذاتاً مجلس مذکورک تشکلی حقوق بین الدوله عاقد برشی اولیوب اعضا سندن بولنان حکوماتک بعض حقوقنی و برده یونان مذهبنی وقایه مقصدینه مبتنی ایدی . باخصوص بونلرک یونان اقوامی آره سنده بلا استثنا جاری اولدیغنی فرض اولنسه بیله بویله اهمیتسز بر قاج قاعده ایله حقوق بین الدول تشکیل اولنه میه جنی درکار اولوب اقوام مزبور دنک مناسبات سیاسییه لرنده حقوقی دائماً ایاق اتنه الدقلری ایسه توارینخله مثبتدر .

یونانیلر نزدنده قورصانلق دخی ضایع مقبوله دن اولوب سالکری صاحب ناموس و اعتبار تجاران کبی مظهر رعایت و حرمت اولورلر ایدی قهرمانلر دورینک وقایع عظیمه سندن

اولان آرغونوت سفری ژازون و عونہ سنک ممالک بعیدہ بہ کیدہ رک اجرای شقاوت ایملرندن بشقہ برشی دکلدہ . قورصانلغک درجہ مقبولیتی سولونک آتہ قانونلرینی وضع ایتدیکی صرہدہ کلیاً رفعنه موفق اولہ میہرق اجراسنی برطاقم احوال ونظامہ ربطہ مجبور اولسندن تقدیر اولنہ بیلور .

قرون اولی دہ علم حقوقک از زیادہ ترقی ایتدیکی مملکت روماندر . رومالیر ایلک دفعہ اولہرق اخلاق ایلہ حقوق بیندہ اولان فرقی ظاہرہ اخراج ایلہ علم مذکورک باشلی باشنہ تأسس وترقیسنہ خدمت ایملر سده ینہ حقوق بین الدولی وجودہ کتیرہ مامشردہ . واقعا رومالیردہ جاری بعض اصول قواعد حقوقیہ بکزه دیلہ بیلور .

از جملہ روما دولتی اعلان حرب ایتمدن اول بینلرنده اختلاف تحدت ایدن دولته بر سفیر کوندروب رسماً تعیین مدعا ایدرک جواب رد آلدیغی تقدیردہ کیفیت بر صنف رؤسای روحانیہ دن مرکب اولوب نوعاً امور خارجیہ مجلسی مقامندہ بولنان فہ چیلر جمعیتنہ بالحوالہ — انک قراری اوزرینہ صورت رسمیه وعلنیہدہ اعلان حرب ایدیلور واولجہ اوزون دعاارلہ معاونت الہیہ رجا اولنہرق . بوسورتلہ اعلان ایدیلان محاربات محق عد اولنور ایدی . بومحق لغظندن محارباتک عدالتہ موافقتی نظر دقتہ الندیغی وفہ چیلر مجلسنک مذاکراتی حقسنر محاربه لر

اعلانہ ممانعت ایچون اولدیغی اکلشلامق وبوکا یالکز موافق قانون معناسی ویرلمک مقتضیدر .

رومادہ حقوق بین الدولک عدم تأسسنہ سبب جهانکیرلک فکریدر رومالیرک مقصد اصلیبسی عالمہ حکمران اولمق واقوام موجودہ نک کافہ سنی تحت تابعیتلرینہ آلمق اولمغله مقصدلرینہ وصول ایچون ہر حقسنرلغک اجراسندن چکنمذ کلری کبی بہمہ حال بروسیلہ بولہرق ملل متجاورہ بہ اعلان حربلہ ملکلرینی حوزہ حکومتلرینہ ادخال ایدرلردی مناسب کورد کلری حالده بعض شہرلری تخریب و احراق و اہالیسنی قتل و اعدام ایدرلر و اکثر احوالده ممالک مفتوحہدہ بولنان املاک خصوصیبی عسکر بینندہ تقسیم ایدرلر ایدی . اسیر دوشان حکمداران غالب قوماندانک عربہ سنہ حیوان مقامندہ قوشیلہرق مظفریت الایلرنده کزدیرلمک و صکرہدہ محافظہ استقلالہ غیرت بر جنایت عظیمہ ایمش کبی بر زنداندہ خفیاً اعدام ایدلمک عادات جاریہ دن ایدی . رومالیر ہیچ بروقت حقوق بین الدولک وجودینہ قائل اولمیدہرق کندیلرینی حاکم عالم اولمق ایچون یرادلش قیاس ایتد کلرندن یونانیر کبی ملل مستقلہ سائرہ ایلہ ہمپایہ اولمقلغی بروقت قبول ایلدیلر . بعضکرہ حرکات محقہ و عادلہدہ بولندقلری کورنسنہ بیلہ کیفیت اجرای عدالت و حقانیت آرزوسندن نشأت ایتیوب بلکہ برطاقم ملاحظات سیاسیہ سائقہ سیلہ وقوع بولمشدر . بو جہتلہ رومالیر برملنک استقلالنی محو ایدنبجہ بہ قدر حقندہ

هر نوع فنانگی اجرا ابتدکاری حالده بر کره مقصدلرینه موفق
اولدقدنصکره معامله لرینی دکشدیروب دها زیاده موافق
انسانیت حرکانه بولنورلر و بوسورتله روما تابعیتک استقلال -
لدن خیرلی اولدیغی فکرینک انتشارینه غیرت ایدرلردی . -
فی الواقع رومالیبرده ملل سائره ایله عقد اتفاق اصولی
جاری ایسه ده بوده زمانزده کی اتفاقات دولیهیه مقیس اوله من
مونتسکیونک افاده سی وجهله روما ملتی متفقلرینک کندیسیله
مساوات تامه اوزره بولمنسه راضی اولیه برق دائماً متفقه تبعه دن
ایمش کبی معامله و اکثر رومانک عظمت و شوکتته بز دلیل اولمق
اوزره معاهدات اتفاییه بونلر حقنده موجب تحقیر عبارات
علاوه ایدرلردی بوجهتله روما - متفقلکی عادتاً ضیاع استقلال
دیملک اولمغله شایان ارزو دکلسه ده ملل متجاوزه بو حالده هیچ
اولمزه سائرلری تجاوزاتندن مصون اوله جقلرینه و رومادن
دخی ممکن مرتبه آز فنانق کوره جکارینه امین اولدقلرندن بو
صفتیه دائماً طالب ایدیلر .

روما سفراسی نزدنده مرخص بولندقلری حکمدارانیه نهایت
درجه ده کبر و عظمتله معامله ایتدکلرندن بونلریده حققلرنده
حرمتسزلکده بولمغه مجبور ایدرلر و بوسورتله موجب حرب
احوال اکسک اولماز ایدی . رومالیبر حصول مقصدلری ایچون
یلان سونلکدن و خصملرینک حسن نیتندن استفاده ایلکدن
چکنزلر و اکثر وقتلر معاهداتیه بر قایح معنالی کلمات درجیه صکره

انلری ایستدکلری وجهله تفسیر ایدرلر و خصملرینی الدادیرلر
ایدی : قارطه چه نک حین تسلیمنده عقد ایلدکلری مقاوله ده یالکز
ستییه یعنی ایج قلعه یی تخریبله اکتفا ایده جکلرینی رسماً تعهد
ایلشکن مؤخرأ ستییه نک لاتینجه شهر معناسنده کادیکنی و حین
عقدده بومعنا مراد اولندیغی ادعا ایله شهری کاملاً احراق
ایلدکلری مشهوردر . - روما قوماندانلری تهلیکه لی بر حالده
قاله رق تضییق اولندقلری وقت دشمنلرینک آرزوسی وجهله عقد
صلح ایدرک کندیلرینی تهلیکه دن قورتارلر و سناتو مجلسی ایسه
مصالحه دن استفاده ایله تدارکات حربیه یی اکیال ایلدیکی حالده
معاهده یی قبول ایتیه رک یینه حربیه دوام ایدرلردی .

مواد معروضه دن اکلاشیله جغی اوزره روما حقوق
عمومیه و خصوصیه نک مهد انتشاری اولمقله برابر حقوق دوله
بر خدمت ایده مامشدر . مع مافیله قطعاً مذکورده علوم و معارف
ومدنییت ترقی ایلدیجه حقوق انسانیه حقنده کی افکار دخی
توسع ایتکده و حقوق دولک بیله قبولنه تقرب اولمقله ایدی .
خصوصیه یونانستانده زنون نام حکیمک احداث ایتدیکی
و (Stoicism) حکمت رواقیون تعبیر اولنان مسلک و فلسفینک
رومایه دخولی حقوقیه بیوک ترقی یی موجب اولمشدر . بونک
سالکلری انسانلرک بجله جناب حقک اولاد معنویسی حکمنده
وبالطبع مساوی اوله رق طوغدقلری اساسنی قبول ایتشله و بر کره
مساوات بشریه قبول اولنجه مساوات دولیه ده تصدیق ایدملک

طبیعی اولغله حقوق دول علمك تحذنی تسهیل ایشلردر . -
 بومسلك رؤساسندن بولنان سیدهرون آثارنده حربدن مقصد
 اصلی بعدالمحاربه صلح اوزره یشامق اولدیغنی وحرکات
 خصمانهیه شروعدن اول رسماً اعلان حرب اولنمسی لزومنی
 بیان و بعدالظفر - حرکات نالایقه لريله کندیلرینی ناقابل عفو بر
 حاله قومدقلری حالده مغلوبینه عفو ومرتجته معامله اولنمسی
 و تکالیف صلحیه - حیلله و خدعه مقصدیله ایدلماش ایسه - قبول
 ایدلمسی توصیه ایتر . فقط مومی الیه حیث وطنیه و غیرت ملیه
 سابقه سیله رومالیرك دائماً بوقواعد رعایت ایتدکلرینی اثباته
 و بونلره مخالف اولان حرکتلرینی تأویلله قالمشدر . سیدسرونك
 قولنجه مغلوب ساین سامنتیت ولاتینلره رومالی حقوقی
 ویرلدیکی حالده قارطاجه و نومانس شهرلره تخریب اولنمسی
 بونلرک رومیله دشمنلکده اصرار ایله بقیاسنی تهدید ایتلرندن
 نشأت ایش و قورنیتك تخریبینه بویله برسبب بوقسهده بوکاده
 شهر مذکورک وجودی رومه علیهنده اولان محاربه لری تسهیل
 ایدهجکی ملاحظه سی باعث اولمشدر : رومالیر چبروغال
 اقوامی و پیروس و قارطاجه ایله اولان محاربه یه کندی حقوقلر -
 ینی وقایه ایچون تشبث ایتمشدر . سیدسرون دشمنه ویریلان
 سوزك مجبوری الاجرا اولدیغنی بالاتیان بوکا اعدام اولنه جغنی
 بلدیکی حالده ویردیکی سوزی وقایه قارطاجه لیر نزدیکه عودت
 ایدن ره کولوسك حرکتی مثال کوستر . ینه مومی الیه ایلك

دفعه اوله رق قورصانلغك مقدوح بر حرکت اولدیغنی و فاعللرینك
 قانون وملت خارجنده بولندیغنی و هر شخص و جمعیتك قور -
 سانلری تأدیبه حق اولدیغنی بیان ایشدر .
 بعض ذوات یوس جینتوم (حقوق ائم) نامیله رومالیر
 بیننده متعارف اولان علمك حقوق دولدن عبارت اوله جغنی ادعا
 ایتکده لر ایسه ده بالاده دخی افاده اولندیغنی اوزره علم مذکور
 موافقت متقابله دول اوزرینه مؤسس بر حقوق دول اولیوب
 روما حقوق مدنیه سندن حقوق طبیعیه یه موافقتی حسینیله ملل
 سائره نزدنده دخی جاری اولان قواعدی حاویدر قواعد
 مذکوره ملل مختلفه بیننده مشترک اولغله روما محاکمی طرفندن
 بلا فرق هر صنف اهالی حقنده تطبیق ایدلمش و بوسبیلله
 کندیسنه حقوق ملل اسمی ویرلشدر . رومالیرك دائره حکوم
 متلری توسع ایتدکجه بوس جینتوم دخی توسع ایشدر .

۲

رومانك انقراضی . عیسویت وجرمانلر

روما حکومتی یواش یواش توسیع دائره فتوحات ایدرک
 همان برعتیقك كافة قطعات معلومه سنه مالک اولمش و ممالک
 مذکوره ده ساکن بولنان اقوام مختلفه بی - هر ملتی کندی
 قانونلریله اداره اولنمده سربست بر اقله برابر - بعض قواعد

عمومیه و مشترکیه تابع ایلدیکندن انلر بیننده قوتلی برواسطه
ارتباط حکمنه یکم شسده قرون متقدمه نهایترینه طوغری بر
طرفدن باربار و غیر تمدن اقوامک پیدرپی روما مملکتنه دخولریله
گذرکهلرنده نشر ایتدکاری افکار استقلالکارانه و دیگر طرفدن
ولایات و الیرینه عارض اولان داعیه استقلال و خصوصیه
ایمپراطورلغک اقسام متعدده به تقسیمی ملل مذکوره بیننده
حصوله کلان روابطه خلل کتیرمش و ذاتاً خیلی وقتدنبرو بو
حکومت جسمیده انقراض و اضمحلال علامتلی رونمون
اولغه باشلامشدی . روما ایسه خلقنک فساد اختلافی و حکو-
متک طریق ظلم و تعدی به صایمسی جهته اولکی قدرت و قوته
صاحب اولدیغندن و قتیله جهانیه زیر تبعینده بیون اکرمش
ایکن مجتمعا ممالکنه هجوم و یادها طوغریسی هجرت ایدن و مع
مافیله حرکتلرنده اتحاد و اطراد بولنمیان جرمان قبائل متجاوزه سنه
تاب آور مقادمت اوله میهرق آز وقت ظرفنده محو و خراب اولدی
و و قتیله حکومتک افعالنده کی حقانیت عسکرنده کی شجاعت
قوانینده کی عدالت، افرادنده کی حیثیه عالمک کوزلرینی قاشدیر-
مش اولان ذی شوکت بر دولت معظمه دن شرق ایمپراطورلغی
کی قاعده اساسیه سی ظلم عسکرینک مزیتی جبانیت مأمورینک
هنری اخاتندن عبارت اولان و فساد اخلاقک دولت صورتده
تأسس ایتش تمثال مجسمی بولنان سونوک بر خیالدن بشقه بقیه
قالمدی .

بو وقعه اور و پابی بر بیوک ظلمت ایچنده بر اقصادی . بو قدر
مختلف ملتلی بر برینه ربط ایدن روما آرهدن قالقنجه ملل
مذکورهنک بر برلرینه اولان مناسباتی بسبتون غیر معین قالمغله
الحکم لمن غلب قضیه سی جله طرفندن قاعده اساسیه حکمنده
تلقی اولمغله و باربارلر حقوق بشریه دن انک معروف و معتبر اولانلرینه
بیله تعرض ایلدکلرندن بین الملل بر حقوق تأسسی ذاتاً مشکل ایکن
محالیت درجه سنه تقریه باشلادی مهاجرته حرکت ایدن
اقوام لایقی و جهله یرلشه مدکلرندن بر طاق دولتک
تشکلرینی متعاقب و قوع انقراضلی امور سیاسیه یی ناقابل
تعریف بر قاریشقلغه دوچار ایلدی . مع مافیله روما حقوق
مدنییه سی کلیاً اجرادن ساقط اولدی . آئیده بیان ایدیله چکی
و جهله جرمان اقوامی حقوق خصوصنده جهل تام حالنده
بولنلریله برابر اساساً حریت انسانییه یی مصدق بولندکلرندن هر ملتک
کندیسنه مخصوص قوانین ایله اداره اولمسنی قبول ایدرلردی
بو جهته ید ضبطلرینه چکن شهور و بلاددن اکثرینک روما
حقوقی موجنبجه اداره سنه مساعده ایلدکاری کی بولنلرک
امتیازات بلدییه و اداره محلیه لرینه بیله چوقلق مداخله ایلدیله .
روما حقوقنک محافظه سنه بر طرفنده قانولیک کلیساسی اعتنا
ایلمکده ایدی . کلیسا دین لسانی اوله رق لاتینجه یی قبول ورؤسای
روحانییه یه بونک تحصیلنی شرط ایتدیکی کی امور مذهبییه ده
تأمین نضباط ایچون انخاد ایتدیکی تدابیر و تنظیم ایلدیکی

نظامانده دخی روما حقوقی اساس اتخاذ ایتش و بو صورتله مرور زمانله بین الاهالی بونک اعاده حکمنی ممکن قیله جق بر استعداد حاصل ایلشدی . بو سببه مبنیدر که مشهور شارلمان ممالکنده مجبوری الاجرا اولمق اوزره روما حقوق مدنیه سیله ژوس جنتیوم قواعد مختلفه سندن مرکب قوانین نشر ایلدیکی حالده بونلرک تطبیقنده ذره مشکلاته دوچار اولمامشدر .

بو وجهله تدوین اولنان روما حقوقنک اوروپا حقوق جدیده سنک تولدینه پک چوق فائده سی اولدیغی اصلاً جای انکار اوله مز . ذاتاً قرون وسطی اثناسنده ارباب حقوقک کسب ایتدکری اهمیت ازهر جهت شایان دقتدر بعضکره اختلافات دولیه نک فصلی ایچون حقوق علماسنک حکم اتخاذ اولندقلری و بونلرک علی العاده ذی اقتدار اولان طرفی التزام ایتمکه برابرینه اساس حکملرینی روما حقوقنه استناد ایتدر دکری کورلمشدر ازجهله آلمانیا امپراطوری فره دریق بارباروس ایله ایتالیا شهرلری بیننده کی حق حاکمیت دعواسنک حسمی بولونیا دارالفنونی معلیمینه حواله ایلدیکی مشهور اولوب مع مافیه حکملرک شمالی ایتالیا شهرلرینک آلمانیا به تسلیمینه قرار ویرملری دخی بومثللو قرارلرک درجه عدالتنه بر نمونه عد اولنه بیلور . - کایسا حقوقی دخی ذاتاً روما حقوقندن النمه اولوب اوروپانک هریرنده تطبیق اولندیغنه و خصوصیه اساس مذاکره لری بوکا مستمند اولان جمعیات روحانیه یالکز مسائل مذهبیه دکل امور سیاسییه ایله

دخی اشتغال ایلدکارینه بناء بو قسمده حقوق حاضره دولک اساسلرندن اولمشدر . فی الواقع او وقتلر احوال دولیه ده پاپلرک و جمعیات روحانیه نک تأثیر نفوذلری منکر اولیوب پک چوق اختلافاته بونلرک رأیلرینه مراجعتله ختام ویرلدیکی توارینخله مثبتدر .

قرون وسطی دوری هر نه نقطه نظر دن محاکمه اولنورسه اولنسون اوروپاچه بر زمان طفولیت و جهالت عد اولنه بیلور . بوزمانده اوروپانک منقسم اولدیغی بیکرجه استبداد کاهلردن هربری یالکز کندیسنک منافعی دوشونوب رؤسانک کیفی خارچنده منبع حق موجود اولدیغنی کسه در خاطر ایتامش واک زیاده منافی حقوق اولان حرکات افعال محقه ایله مساوی طوتیلهرق بونلرک کیف مالتفق و قارمه قاریشق اجرا سندن اجتناب اولنمامشدر .

سن لوئی، فیلیپ اوکوست کبی عدالتله شهرت شعار بعض حکمدارلرک زمان حیاتلرنده پک چوق مناسبتر حرکاتده بولنملری ده مجرد اوزمانلر حقوق و عدالت حقنده موجود اولان افکار مطلقه نک بر اساس ثابت و متینه مستند بولنمامسندن ایلور کایر . [۱] - حالبوکه قرون وسطیده اوروپاده حاکم اولان ایکی

[۱] مثلا فیلیپ اوکوست فرانسهنک حقیقه عادل حکمدارانندن اولدیغی حالده بعضکره کرک کندی تبعه سنه و کرک دول اجنبیه به قارشو حقانیتک بروجهله تجویز ایتیه جکی معاملاتده بولندیغنی واقع اولور ایدی ازجهله خزینه مضایقه به دوچار اولدیجه فرانسده متمکن بولنان یهودیلری

عنصر یعنی مذهب عیسوی ایله جرمان اقوامی - بری محتوی اولدیغی نصایح و قواعد و دیکری مالک بولدیغی اخلاق و عادات سایه لرنده - حقوق دولتک تاسیسنه یک مساعد ایدیلر فقط نه چاره که بوجه زیر بیان اولنه جق اسباب متضاده و ما نعدنک تعددی بویکی عنصرك و یردکاری امیدلرک بوشد چیقیمسنه و اوروپانک بیک سنه دهها قواعد و حقوق بشریه دن بی خبر و خصائل انسانیه دن بی بهره اوله رق ظلمت جهالت ایچنده قالمسنه سبب اولمشدر .

حضرت عیسی علیه السلام جناب حق نوع بشرک پدیری و بالجمله انسانلری جناب حقت اولادی کبی عد و حضور الهیده چاهنک مساواتی و بر شخصک افعال و حرکانی تحقیق واکا کوره حقنده مجازات و مکافاة ایتمک یالکز جناب باری به مخصوص اولدیغنی بیان ایله مساوات بشریه اساسنی وضع ایلمشدر .

صوبه رق انلرک اموال و نقود مغصوبه سیمله احتیاجات دولتیه چاره ساز اولمق اکثر احوالده مراجعت ابتدکی تدابیردن اولدیغنی کبی بعضاده - فرانسه ده متصرف اولدیغنی ولایاتدن طولای دره بکلک اصولجه فرانسه قرالنه تابع یعنی واسال عد اولنان - انکلتره حکمدارینی صاچه بیانه لرله لاجل المحاکمه پارسه دعوت ایدر و دیکری ایسه بالظبع کله میه جکندن فرانسه ده کی اراضی سنی بر مدت معینه ایچون تحت حمزه آله رق واردانندن بو صورت غیر مشروع ایله استفاده ایلر ایدی . یهودیلرک بالجمله اموالی مصادره ایتدکدن صکره فرانسه دن طرد ایتمک و صکره ینه دخوالرینه مساعده ایله کسب ثروت ایلرینی متعاقب عین معاملیه بی حق لرنده تکرار ایتمک فرانسه قرالرندن کوزل فیلیبک مراقی ایدی .

انجیل شریف یالکز دوستلره دکل دشمنلره بیله محبت وانلره قارشو دائماً عفو و صفتح ایله معامله اولمسنی توصیه ایلر و هر نه نامله اولورسه اولسون هیچ بروجه نه انسان قانی دو کلمسنی تجویز ایتمز . صاغ یناغنه طوقات اورلدیغنی حالده صول طرفنکده چورلمسنی معلن اولان امر مسیحی هر نوع محاربه نک ظهورینه مانعدر .

مذهب عیسوینک اساسنه تماماً رعایت اولنورسه بر ملت دیکرلرینک حقوقنه تجاوز ایتمکدن بشقه کندی حقوقنی بیله مدافعه ایتمک و حتی علیه نه بر تجاوز و قوعبولورسه وطنی ملتنی عائله سنی دشمنک ایادی تسلطنده براقه رق اختیار مسکنته او امر الهیه عد اولنان و حقیقت حالده بردشمن غالبک تجاوزات غیر محتمه سندن عبارت بولنان مصائب و تسلطانه کردنداده تحمل و انقیاد اولمق ایجاب ایدر .

احکام مشروحه نک بالتمام معاملات دنیویه یه تطبیق - طبیعت بشریه یه مخالف اولمق حسبیله - قابل اولدیغندن صرف نظر اولنور و مسئله مدققانه بر صورتده دوشونیلورسه بونلرک قرون وسطی ده حقوق بین الدولک تاسیسنی صورت فوق العاده ده تسهیل ایده جکی و چونکه مساوات بشریه قاعده سی مساوات ملیه و دولیه بی انتاج ایدرک بونکله حقوق آخره عدم تجاوز قاعده سنک علم مذکوره اساس اوله جغنی ظاهر اولور . بو نتیجه خیریه نک حصولنده اوروپاده خرسه تیاندلغک

رئیس و واسطه اجرائیه سی اولان پاپار مانع اولمشدر .
 پاپارک اذمنه متوسطه حاز اولدقلى اهمیت و قدرت
 زمانزده هیچ برشیئه مقیس اوله مز . او وقتلر پاپا خرسیتیانلق
 عالمنک رئیس روحانیسی بولمئسندن بشقه امور دنیویه جه دخی
 رأی حاشا او امر الهیه مقامنده طوتیلور و دولتلر بیننده وقوع
 بولان اختلافات نظر تدقیقنه عرض اولنهرق و یردیکی حکمه
 طرفینجه ده رعایت اولنور ایدی . پاپانک الیوک سلاح مدافعه سی
 آفوروز اولوب آفوروز ایدیلانلره اختلاط ایدنلر دخی کافر
 عد اولندیغندن بو بیچاره لره کسه کورشمز و اکثریسی آچلق
 و سفالتله ترک حیات ایدرلردی .

حتی آفوروز ایدلمش بعض حکمدارانک اولاد و عیال و تبعه
 و امراسی طرفندن ترک اولنهرق یالکز باشلرینه پاپا نزدینه
 کیدوب طلب عفو و مرحمت ایلدکلى و بوکاده برچوق مذلت
 و حمتارتن صکره نائل اوله بلدکلى و قایع تاریخیه ایله ثابتدر . [۱]
 و الحاصل پاپارک نفوذ و قوتلرینک وسعتی و کندی تخت امرلنده
 اولان رهبانک علم و معرفتجه اهالی سائره اوزرینه اولان
 رجحانی درپیش نظر ایدیلورسه بونلرک جداً آرزو ایتدکلى

[۱] آلمانیا ایمرطورلرندن درنجی هانری پاپا طرفندن آفوروز
 ایلدکدنصکره صورت مشروحه ده نائل عفو و مرحمت اولمشدر . حکمدار
 مشارالیه مؤخرأ ینه آفوروز ایلدیکندن بالجله عسکر و تبعه و امراسی و حتی
 اوغللری طرفندن بیله ترنه اولنمش و وفاتندنصکره یدی سنه مدفندن محروم
 براغلمشدر .

حالده مناسبات دولیه بی قواعد حقوقیه معینه یه ربطه موقعتلری
 مستبعد اولدیغی کوریلور بو قدر مساعد احوال ایله برابر
 بو نتیجه نك عدم حصوله ایسه پاپارک اصول سیاسیه نری سبب
 اولمشدر : معلومدرکه ملل مختلفه نك حقوق و وظائفجه مساواتی
 تصدیق اولنمسه حقوق بین الدولک ظهوری ممکن اوله مز
 حالبوکه پاپار روما ایمرطورلری کبی حاکم عالم اولغنه میل
 ایتدکلرندن طبیعی بو اساس مهمه هیچ اهمیت و یرمدیلر بورئیس
 روحانلرک التزام ایتدکلى فکره کوره کوره ارضک اداره سی
 جناب حق طرفندن کندیلرینه مفوض اولوب حتی یکی کشف
 اولنان مالکک حق حکومتی ایتدکلى دولته بابرات توجیه
 ایدرلردی . ایمرطورلره رسماً پاپا طرفندن تاج کیدیریلور
 و اثنای توجده رئیس روحانی حکمدارلغک سن پیر طرفندن
 ایمرطوره اهدا قلندیغنی معان کلمات بیله تفوه ایدر
 ایدی سن پیرک و کیلری برچوق وقت حکمدارانک
 حق سلطنتلرینی تصدیق ایتیب اصل حکومت کلیسا اولدیغنی
 و قرالارک وظیفه و صفتی ایسه یالکز دین رئیسنک او امرینی
 اجرادن عبارت بولندیغنی ادعا ایلدیلر و صکره لری اوروپاده
 حکومت مرکزیه کسب قوت ایتلی اوزرینه بو ایدم ام ایده میوب
 فقط هر هیئت سیاسیه ده ایکی حکومت مشروعه بولندیغنی
 و کرک حکومت روحانیه و کرک حکومت جسمانیه دن ایکیسیده حق
 اداره لرینی جناب واجب الوجوددن آلدقلى اساسی قبول

ایدلدی . مواد مجبوره دن اكلاشيله جغی اوزره پاپار طرفدن
حقوق دولت تاسیسنه مانع اولان سبب بونك رو مالیر جانبدن
وضعی محال قیلان سبب عینی یعنی عالمه تحکم ارزوسیدر
خصوصیه که روما رؤسای ادعای تحکملرنده آرزوی ملته
وپاپار ایسه حاشاً اوامر الهیهیه استناد ایتدکلرندن بونلرک
اصولی حقوقه دها تهلهکه لی اولدیغی درکاردر .

پاپار حقوق بین الدولی تاسیس ایده مدیلر سده مناسبات
ملله متعلق بعض قواعد جزئییه وضع و مثلاً ملتر و خصوصیه
اصلزادکان یعنی دره بکر آره سنده اولان مجادلات دائمیه
بر حد تعیین ایتک ایچون هفته نك بر قسم معیننده حربی منعه
متارکة الهیهیه تاسیس و خرسیتیانلرله اولان محاربه لرده اسرانک
صکره ینه اعاده سنی و هر حالده اسیر کندینی طوتان شخصک
مالی اوله میه جغنی و سائر بو مثلوه بعض قواعدی اعلان ایلدیلر
فقط پاپارک اوزمانکی اقتدار بینهایه لرله بیک سنه لک بر زمانده
وضع ایده بلدکری بر قاچ قاعده نك اهمیت سزلیکی دوشوینلورسه
بونک هیچ مشابه سنده قالدیغی کوریلور .

قرون وسطی ده حقوق بین الدولک تاسیسنه مانع اولان
اسبابدن بریده او وقتلر غلیبان تعصب زمانی اولغله خرسیتیان
و حتی قتولیک اولمیانلره آدم نظریله باقلماسی و پاپار ایسه
قتولیک عالمنک رئیس اولملریله بوفکر متعصبانه یه اتباع ایللریدر
حتی قواعد مجبوره یالکز قتولیک ملترینه مخصوص اولوب

بو مذهبه منسوب اولمیانلره مغلوب اولدقدن صکره یاترک حیات
ویا خود ترک دین ایتدکلرن بشقه چاره نجات یوقدی .
خرستیان اولمیانلرک اوروپا حقوق عمومیه سندن محروم بر اقلسی
عصر مرزه قدر جاری اولوب حتی ۱۸۱۵ سنه سنده ویانه
قونفره سنی متعاقب روسیه اوستریا و پروسیا دولتلی ییننده
عقد اولنان اتفاق مقدسه خرسیتیان دینی اساس طوتلشدی حقوق
دولک عموم ملل متدنه یه تعمیمی بوندن صکره و پارس معاهده سیله
دولت عثمانیه نك اوروپا هیئت سیاسیه سنه دخولی متعاقب
وقوع بولوب مع مافیه حالا مذاهب سائرده دن اولان حکوماته بر
صورت استثنایه ده معامله ایدلک آرزو اولدیغی اکثر اوقاتده
نظر تأسفله کورلمکده در .

جرمان اقوامنک عادات و اخلاقی دخی حقوق دولت
تشکلنه پک مساعد ایدی جرمانلر حریت شخصیه یی زیاده سیله
التزام ایتدکلرندن و افراد ملت بیننده حقوقه بر فرق بولمیدیلر
کندیلرینی سائرلره مرجح طوتمقله برابر ملل مختلفه نك حقوق
ووظائفه مساواتی اساسنی دخی قبول ایدرلردی . کندیلری
جنک و حربیه میال ایسه زرده عندرلنده محاربات ملیه نك اشخاصک
اختلافلرینی فصل ایچون ایتدکری مبارزات منفردده دن فرقی
اولیوب ظنلرنجه جناب حق دائماً حقلی طرفه فوز و نصرت
احسان ایده جکندن محاربه حقک ظاهره اخراجی ایچون بر
وسيله الهیه ایدی جرمانلر کتدکری برلرده چوق ظلم ایتدکلر

و بر طاقم اموال و املاکی صادره اینلش رسیده بونی برحق موهومه مستنداً دکل مجرد طبیعتلرنده کی شدتی تسکین ایچون یامیشلر و اقوام مغذوبه نك حقوقنه رعایتی ایسه هر برینك کافی السابق کندی قانونلریله اداره اولنمسنه مساعده ایتمک درجه سنه قدر ایلر و کتورمشلردر : حتی برملت افرادندن قوم دیگر نزدنده بولنان مسافرینك اوراده بیله ینه قانون ملیسی احکامنه تابعیتی جرمانلرک عموماً قبول ایلمدکاری عاداتنددر . فقط نه چاره که بونلر اوروپاده برلشدکاری وقت منتظم دولتلر تشکیلنه وکندی دهاءملیلرینه کوره حقوق عمومیه لرینی تنظیمه موفق اوله میوب صکره لری ایسه ینلرنده دره بکلک اصولنك تأسیسیله اولکی افکار حریتك مبدل آرزوی اسارت اولسی و برده پاپارک ازدیاد نفوذی ورهبانك هم متوالیه سی سایه سنده عمومك بالکلیه ظلمت جهالته طالمسی بو قدر استعداد واحوال مساعده نك نتیجه سنر قالمسنه و بویله بر فرصتک ضیاعنه سبب اولدی .

۳

اسلامیت

دین اسلامک ظهوری هر نه جهتدن نظر مطالعه یه النسه انسانیتجه تأثیرات و منافع عظیمه یی موجب اولمش وقایع مهمه دن اولدیغی کوریلور بودین مبین کرک نشر ایتدیکی عقائد

مذهبیه نك صغوت و بساطت و علویتی و کرک حاوی اولدیغی احکام دنیویه نك عقل و حکمته و نوع بشرجه بر قانون لایتغیر اولان قاعده ترقیه موافقتی ایله ادیان سائره یننده تمیز ایلمشدر هجرتك ایلاک عصرلرنده شرقده همان بردنبره وقوعه کلان ترقی فوق العاده اسلامیتک تأثیرندن بشقه برسیده جل اوله من زیرا دین مذکور قومک ترقی مادی و معنویسنه لازم اولان کافه وسائلک اتخاذینی امر ایتمکله احکامنی تمامیه اجرا ایدن برجمیتک مدنیته سائرلردن دون قالمسی و یاخود انلره فائق بولنمسی درجه المحالده در . معلم محترم مرادبک افندی تاریخ عمومیلرنده بو خصوصده بوجه اتی بیان ملاحظه ایدرلر :

« تاریخ عمومینک هر صحیفه سننده بر مقدس و عاقل یاخود کبیر و قهرمان لقبلیسنه راست کلنیر . - بری زیاده جه فضیلت کوستردیمی مورخ آنی مقدس اعلان ایدر . امور سیاسیده زیاده جه ابراز لیسافت و اقتدار ایدن حکمدارلره کبیر آحاد ناسه ده قهرمان دیر . علوم و معارف خصوصنده اقرانه » فائق اولان عاقل یاد اولنور . -

« تاریخ اسلامده بوکبی احوال کورلیور و بودخی تاریخ اسلامده غربده کبیر و مقدس و عاقل یاد اولنان ذوات عیارنده » آدملر ظهور ایتماسندن ایلر و کلنیر . - غربده القاب مذکوره » دن برینه نائل اولمق ایچون حد وسط خارجنده یعنی فوق العاده » برایش کورمک لازمدر - هر شینک کالنی التزام ایلمکده بولنان

« دین اسلام ایسه فوق العاده یه محل بر اقامشد . یعنی حیت
 « صداقت غیرت تربیه و تحصیل و سائر خصوصیت لرنده دخی حد
 » مطلب و بی غربیده اولدیغی کبی و سـ طده کوستر میوب درجه
 » نه یه ده کوستر مش اولدیغندن ملل سائر نك فوق العاده
 » کوره رك تقدیس و تعظیم ایندکری حالات و حرکات عالم
 » اسلامیتده حرکات عادیه دن معدود اولوب انجق مسلم
 » و انسان یاد اولمسنه مدار اوله بیلیر . ایشته بوسیدندر که
 » تاریخ اسلامک پارلاق دوری بیله غیر مسلم بر مورخ
 » نظرنده حد ذاتندن دون کور بیلیر . ایشته بوسیدندر که تاریخ
 » اسلامده بیکرجه ظهور ایدن اسکندر لرسوقراطی برو توستر ره .
 » کولوسلر دلی پترولر و اشینه تون و فرانقلر نظر مزده توارنج
 » سائرده ظهور ایدنلر قدر مشهور و نامدار دکدر لر .
 بو مطالعاتک درجه صحتی اثبات و ایضاح احتیاجندن وارسته در
 اهل اسلام بیننده ظهور ایدن حضرت ابوبکر حضرت عمر -
 الفاروق، عمر بن عبدالعزیز، هارون الرشید، عبدالرحمن ثالث،
 صلاح الدین ایوبی، فاتح سلطان محمد و سلطان سلیم اول کبی عدل
 و سطوتی ید اقتدارنده جمع اینمش حکمدار لر حضرت علی، جلال-
 الدین خوارزمشاه، سلطان عثمان کبی قهرمان لر امیر نوروز کبی
 مجاهد لر بالکیز اوروپا تاریخننده دکل تاریخ عالمده بیله امشالی آز
 بولنور نوادر روز کاردن و ابن سینا، ابن رشد، فارابی کبی علامه لر
 صحائف تاریخ علومی تزیین ایدجک اصحاب ده اندر لر .

طوائف ملوکدن عادی بر ترک بکنک ترجه حالی تدقیق اولنسه
 اوروپا بیلرک بیوک لقبی ویر دکری بعض اشخاص قدر خصائص
 اخلاقیه و یا فضائل عسکریه سی بولنه بیلور .
 شریعت اسلامیه بعض کج بینرک ادعاسی وجهله حقوق
 بین الدولک تشکله هجج بر وجهله مانع اوله مز . اسلامیت
 مذاهب سائر اربابی اصلاً نظر حقارتله کور میدیکی کبی مسلمانلری
 انزله اختلاطدن دخی منع ایتمز اسلامک بعض اقوام عایهنده
 حربه دعوت اولمش اولسی بولرک طریق تدرود بد خواهیده اصرار
 ایله حقوق اسلامه تعرض ایتمزندن نشأت اینشدر . احکام
 شریعتیه نظرأ بر ملته بلا سبب اعلان حرب اولنه مز و حتی
 حرب دها محق اولمق ایچون حرکات خصمانه نك ایلك اول
 دشمن طرفندن وقوعنه انظار اولنمیدر . حربده بالکیز سلاح
 بدست داخل جدال اولنره محارب نظریله باقیلوب اطفال نساء
 و اختیار لر دشمن عد اولمز . و انلر هجج بر سببیه قتل و اعدام
 اولنه مز . محارب اولان شخص دخی ترک سلاحه طلب عفو
 و امان ایلدیگی حالده اتلافی جائز دکدر . سفرایه حسن
 معامله ایتمک و معاهدات احکامنه تامیله رعایت اینک عین
 فرضدر .

« مذهبی اولدیغی جهتله شریعت غرایه طبیعی اولان
 حسیات مخصوصه مزی تسکین ایدرک مسئله دن فناً بحث ایدلم: »
 « فی الحقیقه دین اسلام قدر مدینته مساعد بر مذهب روی »

« زمینده کورلماشدر . پیغمبر ذیشان افندمزك ایلک کلامری
 « دنیا حقیقته نائل اولدی و افکار باطله یه محل قالمدی ایدی » و جاء
 « الحق . . . الخ » آیت کریمه سنک معنای شریفی دخی بودر .
 « هر یرده هر شیده حقیقی التزام ایتک و هر نوع شبهه لری ازاله
 « ایتک و هر شیدک کالنی ارامق اسلامیتک شرائط اساسیه سندندر »
 « استحصال معلومات ایچون دنیاک او جی عد اولنان چینه
 « قدر کیدلمسی پیغمبر ذیشان افندمز حضرتلری طرفندن امر
 بیورلمشدر جاهل اولان نام مسلمان اوله مز دینشدر »

« دنیا فانی یعنی موقت یاد اولنش و سلطنت کریمه کوسترلمش
 « ایسه ده بونلر امر دنیایی امر دینه ترجیح ایتماک دیمک اولوب
 « یوقسه اسباب مدنیت و معموریت اولان صنعت و معرفت
 « اصحابنه کویا دنیایی ابدی بیلهرک صنعتلرینک درجات عالییه
 « ایصالی توصیه اولنمشدر . الخ . . . » تاریخ عمومی : دردنجی
 جلد .

دول اسلامییه (خصوصیه ایلک عصرلرده) امور سیاسییه
 لرنده قواعد حقانیت و حقوقه زیاده سیله رعایت ایلشدر . مسلمانلر
 قتل و حاکم لرنده مغلوبینه حسن معامله ایله مذهب و عادات ملیه لرینه
 تعرض ایتماشدر و دائماً بغیر حق اتلاف نفسدن اجتناب ایتشدر
 هر ملت فاتحه نزدنده وقوعی طبیعی اولان برقاچ وقعه بو
 ادعاک عکسنی اثبات ایچون مدار اعتراض اوله مز . ادعایه
 اسلامک قدومیله برابر کتوردیکی معموریت و سعادتدن بیوک بر

برهان اوله مز . جرمان اقوامی - اخلاق لرنده محافظه حقوق
 آخره اولان میلانله برابر - کتدکاری برلرده معموره لری خرابه یه
 ثروتی فقره قدرت و قوتی ضعف و مسکنته تحویل ایتدکاری
 حالده عربلر قنح و ضبط ایتدکاری برلری معموریتله طانمز برحاله
 قومیشلدر . بدویت حالنده بولنان ترکستان همتر یله بلاد جسمیه
 و معموره ایله طولهرق رصدخانه لری ، مکتب و مدرسه لری و علما
 و فضلاسی ایله عالم مدینتک اک برنجی مملکتلری صره سنه کچمش
 و ایرانک دین مبین محمدی بی قبول ایتدکن صکره یتشدیردیکی
 فارابیلر طوسیلر ابن سینالر اسلامیتک مدنیتله اولان استعدادی
 سایه سنده ظهوره کلمشدر . اسکندر محاربه سندن صکره خرابه .
 زاره دونان عراق عرب عباسیلر زماننده بر دولت عظیمه یه مقر
 اوله جق درجه ده کسب معموریت ایلش و عربلرک اعمار
 ایتدکاری سوریه نک تخریبی انجق صلیبیون کبی قان ایچمک
 ارزوسیله ترک وطن ایلیان وحشی بر طاقم سرسریلرک هممات
 متعاقبه سیله ممکن اوله یلمشدر . و اندالیرک چوله بکرتدکاری
 شمالی آفریقانک اسلام التده قوی الشوکه بر قاچ دولت عظیمه یه
 مقر اولدیغی معلوم و اسپانیا شبه جزیره سی و خصوصیه اندلس
 قطعه سنک و قتیاه اکتساب ایلدیکی درجه ترقی مشهور عالمدر .
 بر ملتک کیتدیکی برلری آز و قتده بو قدر معمور ایتسی بر مذهبک
 جاری اولدیغی محللری مدت قلیله ده جنت آسا برحاله کتورمسی
 انجق اجرای عدالت و حقانیتله ممکن اولور عدالت و حقانیت

قاعده اساسیه سی اولان امتک ملل سائرہ نک حقوقہ رعایت ایتامسی ایسہ محالدر .

تاریخ اسلام سیاستہ اوچ قسمہ تقسیم اولنور کہ برنجیسی ظهور اسلامی یعنی پیغمبر ذیشان افندمن حضرت تریله خلفای راشدین حضراتی و دولت امویہ زمانتی و بناء علیہ اسلامک دور اتحادینی، ایکنجیسی دولت امویہ نک انقراضندن حکومت عثمانیہ نک ظهورینہ قدر چکن اعصاری یعنی ممالک اسلامیہ ده دول متعدده تشکیلہ قوای موحدینہ ضعف طاری اولدیغی زمانی و اوچنجیسی ایسہ حکومت عثمانیہ تاریخی مشتملدر . بونفردن برنجیسنہ دور استیلا و اقبال ایکنجیسنہ دور استراحت و انحطاط و اوچنجیسنہ دور تجدد دنیله بیلیر . فی الواقع اوروپا تاریخندہ کی قرون وسطی و قرون جدیدہ تقسیم عالم اسلامیت حقندہ تمامیلہ تطبیق اولندمن . ممالک اسلامیہ اوروپادن دها واسع اولوب وقتیلہ اوراده کیلردن دها قوی و ذی شوکت حکومتلری حاوی اولدیغندن تاریخنک تقسیمات مخصوصہ سی وارددر . بیان ایتدیکنمز تقسیم عمومی بر صورتده اولوب زمانک استعدادات مخصوصہ سی اعتباریلہ در یوقسہ دور اولده حکمین و کربلا وقعہلری یزیدک زمان سلطنتی و حجاجک مظالمی کبی خلقاً و دیناً علامت انقراض اوله جق احوال بولندیغی کبی دور ثانیدہ ده هارون الرشید مأمون و یاخود اندلسده عبدالرحمن ثالثک اوان حکومتلری کبی خلفای راشدین زمانتی خاطرہ کتیره .

جک پارلاق و شعشعلی سنه لره راست کاینر فقط اساس مسئله بو دکلدر : یزید و مروان کبی مناسبتسنز آدمربجالس تخت سلطنت اولدقلری زمانلر بیلہ اسلام برآن ترقی و توسیع ممالکدن خالی قالمدیغی حالده عباسیلرک و اندلسک اک شوکتلی زمانلرنده اواسکی قوت قالیوب هر طرفده سفاهت و فساد اخلاق اثرلری کورلمکده و مملکتی مهاجمات خارجیه دن محافظه بیوک موفقیت صایلمغه باشلانمشدر .

مع مافیہ هیچ بروقت مناسبات دولیہ ده حقوقہ رعایت خصوصنده اهل اسلام اوروپا لیلردن کیری قالمیه رق بو ایکی دورده دائماً انلره فائق بولنمشدر : خلفای راشدین زماننده حکومت اسلامیہ نک ملل سائرہ یه قارشو اولان حرکتی بوبابده نمونه اتحادینه شایان اولوب حضرت ابوبکرک حلیم و اعتدالی [۱] سوریه

[۱] سوریه سفرینه کیدن عرب عسکرینه و قوماندانلرینه خطاباً حضرت ابوبکر الصدیق طرفندن ایراد اولنان نطق اوزمانلر اسلامک نقدر عدالت و حقانیت اوزره اجرای حرب ایتدکلرینی ارأه الکلکه — بروجه آتی نقلنی مناسب کوردنک :

« یوریدبکک وقتده نه کندیکی نه ده ارقداشلرکی یور . انلره حدت »
 « ائله . مشورتی ترک ائمه . عادل اول ظلم و جوردن قاچین زیرا ظلم ایدن قوم »
 « نه فلاح بولور نه ده دشمننه غالب اولور — عسکرلر ! دشمنه قاوشدقده »
 « آرقه چویر میکر . دشمنه ظفر بولورسکنز نه چوجق نه اختیار نه ده قالدین »
 « اولدیریکنز . معاهده عقد ایتدیکنز وقتده غدر ایتیکنز . مصالحه اولدیغکنزده »
 « نقص ایتیکنز . یقینده مناسترلرده انزوا ایدن راهبیره تصادق ایده جک »
 « سکر در انلره ایشیمیکنز و مناسترلرینی یقمیکنز — بهادرلر ! هایدی الله سلامت »

ضبطنده حضرت عمر ك كو سترديكي آثار معدلت و على العموم
امرای اسلامیه نك كتدكلى یرلده مغلوبینه ایتدكلى حسن
معامله (باخصوص زمانك فرقى درپیش نظر اولنورسه) عموم
انسانیته مدار افتخار اوله جق مآثر جلیله دندر . شایان دقتدرکه
مسلمانلر محارباتده خرسستیاندن اولان مغلوب دولته مسلماندن
زیاده حسن معامله ایدرلردی برچوق وقایع تاریخیه ایله مثبت
اولان بو کیفیت ایسه اوزمانلر مجاهدینك نه درجه تعصب
بیهوده دن عاری اولدقلرینه بر دلیل کافیدر .

مناسبات سیاسیه ده ابراز تعصب شویله طورسون مسلمانلر
خرستیان دولتلر ایله مناسبات دوستانه احداشندن وانلرله
اختلاطن خالی قالمشدر . بوکا دینلری دخی هیچ بر وجهله
مانع اولممشدر حتی هارون الرشید معاصرى بولنان شارلمانه
سغرا وهدایا ارسال ایله اوروپا و آسیا بیننده حصول روابطه
غیرت ایلشدر . اسلام حکمدارلری دائماً مجاورلری اولان
خرستیانلرله مناسبات عدیده ده بولنمشدر وحتی عثمانلی پادشاهلرینك
چوغیله معاصرلری بولنان رؤسای عیسویه بیننده صهریت و قرابت
بیله حاصل اولمشدر . معاهدات منعقدنك اولامرده همان کافه

« ویرسون سزى الله امانت قیلدم . سز حق یولنده فدا کارسکز سز
« اصحاب ناموسسکز سزك شوو صفلریکز وصیتى اونو تمیه جفکزه بکا امنیت
« ویردیكى کبی فتوحاتیده شمیدین مزده نیور همان جناب حق نصرتلر
« احسان ایلسون . » (سوریه مظفریاتی جزء ۱ صحیفه ۱۱) .

دشمنلر طرفندن نقض اولندیغنی تاریخ اثبات ایدر . مسلمانلرجه
عهد هر حالده مجبوری الاجرا ایکن اوروپالیلر کفاره ویریلان
سوزك بر حکمی اوله مز دیهرك دائماً اسلامه قارشو نقض عهد
ایده کلمشدر . سلطان مراد ثانینك اعتدالنه قارشو ولادیسلاس
و ژان هونیادك حرکتی بو بابده مثال اوله بیلور .
علوم و معارفك قیمتی تقدیر خصوص صنده ده اولو قتل اسلامك
عیسویون اوزرینه فوق العاده تفوقی وار ایدی .

اسپانیوللر اندلسده بولدقلری خزائن الکبکی یاقه رق بر ملت
عظیمه نك یدی سکز عصرلق محصول فکری اولان نوادری
جزئی بر مدته دیار عدمه کوندر مکدن اجتناب ایتدیله . عباسیلر
ایسه شرق ایمپراطورلغی اوزرینه اولان بر موفقیت مهمه دن
صکره تضمینات حربیه اوله رق یالکز بر طاقم فلاسفه یونانك
تفایس اثارینی طلب ایتمشدر و بو حرکتلریله مدنی بر ملتك اک
پارلاق ذکالرینك محصولی کندیلرنجه بر قاچ قلعه و شهردن ویا
بر قاچ ملیون لیرادن چوق زیاده حائز قیمت اولدیغنی عالمه
کوستر مشلر ایدی . فرنکلر ید اسارتلرینه کچن فضلا و علمای
اسلامیه بی رسماً و مراسم دینییه ایله احراق ایتدکلى حالده
ممالک اسلامیه یه کیدن فضلاى عیسویه کمال حرمت و رعایتله
بالاستقبال علم و فضلارندن سائرلرک دخی مستفید ایدلمسینه غیرت
وا کثربیسی مدارس عمومیه ده تدریسه دعوت اولنور ایدی .
قرون وسطی ده کی اوروپا مدنیتیه مدنیت اسلامیه بیننده کی

فرق کلی اهل صلیب محارباتی اثناسنده ظاهر اولدی بو محاربه لرك ظهورینی موجب اولان سبب ظاهری او زمان قدسده حاکم بولنان اتراکک خارجدن کلان خرسستیان حاجیلرندن برر لیره رسم دخول ایستلری و بونی ویره میانلره ایغای حج ایچون مساعده ایتملری ایدی غریبدرکه ظلم تسمیه سی بيله جائز اولمیان ونه نهایت بر نزا کتسزلکدن عبارت اولان بو حرکتی بهانه ایدرک سلاحه صاریلان اوروپالیرایسه اوزمانده مملکتلرینه بر اسلامک دخولنه مساعده شویله طورسون اسلامیت ایله علاقه سی اولانلری درلواشکنجه لرله اولدیرمکی قاعده اتخاذ ایتملردی . بو محاربه یه کیدن فرنکلرک حرکاتنده حیدوددن بر فرقلری یوقدی کتدکلری برلرده شهرلری یغما بنالری تخریب اهالی اسلامیه بی قتل عام ایتمک و بو وحشتلرده اعتدال مجسم دینکه شایان اولان مذهب عیسوی بی سبب کوسترمک صلیبیونک اک عادی فضیحه لرندندر . قدس شریفک غود فروادو بو یون طرفندن فحشی اثناسنده یالکز بو شهرده یتیمش بیک اسلام حضرت عیسی نامنه حرکت ایدن باربارلرک سیف قهرینه اوغرامشدی . بو کارقار شو ایسه سلطان صلاح الدین ایوبی محاربلردن بشقه کسه یه ایلشمن اسرای حربیه بی صلحله برابر اعاده ایدر و الله یکن رهبان ورؤسای روحانیه یه حرمتله اشیای مقدسه بی محافظه ایتملرینه مساعده ایلردی حتی محاربه اثناسنده خسته لنان انکاتره قرالی ازسلان یورکی ریشارک تداویمی ایچون کندی

حکیمینی کوندره رک شفایاب اولسنه سبب اولمش و دشمنلری بولنان امرایه دائمًا تازه میوه لر و ساثر هدایا ارسال ایله نزا کتی حد نه یایه ایصال ایتمکدن بر آن خالی قالماشدی .

مسلمانلر حقوق اجانبه رعایتی ملککرینه کلانلرک کندی قانونلریله اداره اولنملرینه مساعده درجه سنه قدر کتور مشلر ایدی فقط بو قدر خلوص نیت کندیلرینه ده مضر اولدی زیرا اصل قواعد حقوقیه موجبجه اجانب بولندیغی یرک اصول و قواعدینه رعایته مجبور اولدیغندن بو کامغایر اوله رقی نائل اولنان امتیازات و وظیفه تشکر و لطف شناسی دن بشقه برشی تولید ایتمک لازمکلور حالبو که الیوم اسلامیتک اک بیوک بلا لرندن بریده اجنبیلرک امتیازاتی قونسلو سلرک مداخلاتی و الحاصل اجدادمزک لطف و احسان صورتیله ایلدکلری مساعده اتک علیهمزده سلاح صورتنده استعمالیدر .

افادات معروضه دن مقصد عاجزانهم انسانیته مدار مفخرت اوله جق هر خصوصده فوق العاده ترقی ایدن ملل اسلامیه تک قرون وسطی ده غریبونه هر وجهله فائق اولدیغنی و بناء علیه مدنیتی بو قدر ایلرولمش ملتلرک بین الدول معاملاتده رعایتی مقتضی اولان قواعدجه جهل تام اوزره بولنملری و بوبانده تدقیقات و تألیفاتده بولنملری محال بولندیغنی کوسترمکدر فقط نه چاره که حکمای اسلامیه تک آثارندن برچوغنی اهل صلیب و یاتانارلر معرفتیه محو و منعدم اولمش و بر قسمیده کتبخانه کوشه لرنده مستور

قلمش اولغله بو خصوصده بیان معلومات وسع عاجزانه مک فوقنده اولوب بویولده آثاری بالتحرری قدمای اسلامک حقوق بین الدول خصوصنده دخی غریبونه رجحانی اثبات ایتک علمای کرام حضراته عائد بروظیفه مقدسه در .

۴

قرون وسطی . دولت عثمانیه نک ظهوری .

قرون وسطی احوال سیاسییه نقطه نظرندن اوچ دوره تقسیم اولنه بیلور : دور اول جرمان اقوامنیک روما دولتی محو ایتدکن صکره یرلشوب ثابت ومتین برر حکومت تشکیله موقیتلرینه قدر کچن زمانی حاویدر که بو مدته ذاتاً اوروپا دول حاضره سندن هیچ بری بر صورت متینه ده تشکل ایتامش وعموم قطعه بر حال هرجومر جیده قلمش اولغله بر قاعده حقوقیه ارانیله مز . دور ثانیده یعنی فتودالیه (دره بکلک) اصولنک زمان جریاننده ایسه جمعیتک حالی اسکیسنه نسبتله دهها منتظم اولقله برابر اوروپا ملل موجوده سی — لایقیله تأسس ایتامش وهر بر دره بکلک زیر اداره سنده بولنان خلق ینه عین ملتیه منسوب اوله رق یالکز دیگر دره بکنه تابع بولنلرله اجنبی نظریله باقنده بولمش اولدیغندن بین الملل مناسبات نه دیمک اولدیغی هنوز معلوم دکل ایدی . او وقتلرده بر اصلزاده

جانی استدیکی وقت توابعیله برابر مجاور لرینک ملکته هجوم ایلر و بو حرکت تجاوز کارانه — باخصوص موقیتله ختام بولورسه — حقنده موجب شهرت اولقدن بشقه بر نتیجه بی منتج اولزدی .

اصلزادگان ملکرندن کچن سیاح و تجاری صویه رق و قطاع طریقلمک ایدرک اثبات جسارت ایلدکری کبی حکومتک بولار و کوپر یلره ایستدیکی قدر مروریه رسمی قومغه حق اولدیغنه و بر ملک منقسم بولندیغی بیکرجه دره بکلکک برندن دیگرینه کچمک ایچون غایت آغر رسوم تأدیسه سی اقتضا ایلدیکنه مبنی بین الملل حصول تجارت ممتنع حالته کلمشدی . ذماتک اخلاقی او قدر وحشی ایدی که سوا حلقه پارچه لنان کیلری یغما ایتک و تخلیص حیاته موفق اولان بیچاره کانی صومیق و بعضاً حال اسارته ارجاع ایتک ساحلر اهاالیسنک اک معزز حقوقدن معدود ایدی بو دور ده اولان وقوعات سیاسییه نک اک مشهوری اهل صلیب محارباتیدر . بو محاربه مجرد اسلامی تشکیل و ملکرینی ضبط مقصدیله و صرف بر تعصب مذهبی سابقه سیله اختیار اولندیغندن اساساً حقمنزلغندن قطع النظر اوروپا لیلر طرفندن ایدیلان وحشتلر و لزومسز یره کوستریلان شدتله بر یره طوپلانسه مکمل بر دفتر ظلم و تعدی حاصل اولور . مع مافیله اهل صلیب محاربه لری شرقده برچوق قطعاتک خرابنه سبب اولقله برابر اوروپا لیلر حقنده منافع عدیده بی موجب اولمشدر . محاربات مذکوره

برملت افرادی بریره طوپلایوب ممالک بعیده به کوندره رک کوبی
 خلقنی مجموع ملت ، اقامتگاهی اولان مملکتی بتون دنیا مقامنده
 طوتان جهلای اهالی به وطن و ملت نه اولدیغنی کوسترمش و
 خرسیتیانلق عالمیه مسلمانلغی بربریه قارشیدیره رق مسلمانلرک دخی
 انسان اولدقلرینی اوروپالیره اکلاتمش و برده اخلال آسایش
 ایتکله مشغول بولنان سرسری طاقنی محو و اصلزادکانی دخی
 ضعیفله رک قراللرک اقتدارینی تزیدایله اوروپا دول حاضره سنک
 قوی برر اداره مرکزیه به ممالک اولملرینه سبب اولمشدر .
 قرون وسطی نک دور اخیر حکمدارانک اصلزادکانک قدرتی
 آزالتق ایچون اولان تشبثات و محارباتیه مملو اولوب مع مافیه بر
 قاچ محاربه دولیه به دخی تصادف اولنور مثلا فرانسه و انگلتره
 بیننده اولان یوز سنه محاربه سی ظاهر ادره بکک احوالجه بر
 تابعیت اخلافندن متولد ایسه ده اساساً ایکی ملت عظیمه نک
 اوروپاچه نائل نفوذ اولق ایچون اجرای رقابتلرندن حاصل
 اولمشدر . بو دور قرون وسطی ایله قرون جدیده بیننده بر
 واسطه ارتباط عداولنه بیلور .

قرون وسطی ده حقوق بین الدولک بعض اقسامنه متفرع
 برطاقم قوانین یا پلمشدر که بونلردن بعضیلری بروجه آتی بیان
 ایدیلور :

تجارت بحریه به دائر الک اسکى قانونلر ردوس اطه سننده
 تنظیم اولنهرق بر مدت اوروپانک حقوق بحریه سنه اساس عد

اولمشدر . بونلر امور جزاییه و انضباطیه به عاقد اولق اوزره
 ایکی قسم اولوب قسم اولده بحراً ایقاع اولنان جنایاته متعلق
 قواعد وضع اولمشدر : شویله که طائفه لر بیننده وقوعبولان
 جرم و جنایتلرک فاعلری جزای نقدی ایله تأدیب قلوب یالکز
 قتل نفوسه جرأت ایدنلر اعدام اولنور و سفینه داخلنده
 سرقت ایدنلر حقه ده اشکنجه لر دخی اجرا ایدلدیکی کبی غرق
 اولان سفائنی یغما ایدنلر دخی شدیداً مجازات اولنور ایدی .
 قوانین مذکوره نک امور انضباطیه به متعلق احکامی ایسه بر سفینه نک
 حرکتندن اول اجرای لازم اولان معاملاتى و سیاحین خزینه لر یله
 نقلیه اجرتنک تأمین تأدیبه سی و تهملکه حالنده دکزه آتیلان آشیایه
 مقابل و بریه جک تضمیناتک تعیینی کنی مقاصده مبنی تنظیم ایدلمشدر .
 قدیم ناپولی قراللغی داخلنده بولنان آمالنی شهرى [۱] دخی
 قرون وسطی ده پک معمور و تجارتگاه اولقله قوانین بحریه سی بتون
 ناپولی حکومتنده مرعی الاجرا اولدیغنی کبی کاه کووین دوشسی
 قرالچیه الئونوره به و کاه انگلتره قرالی برنجی ریشارده عطف
 اولنان و اولهرون حکملری اسمی و یریلان نظام بحر محیطلیمانلرنده
 قوه قانونیه بی حائز ایدی زمان مذکور نظامات بحریه نک اک

[۱] روایتة نظراً اوروپالیلردن دول اسلامیه ممالکی ایله ایلک اول
 اجرای تجارت و اخذ و اعطا ایدنلر آمالنی اهالیسیدر فی الواقع قرون وسطی ده
 سوریه مصر و آفریقای شمالی سواحلنده برچوق آمالنی سفائن تجاربه سنه
 تصادق اولنور ایدی .

مهمی بروجه زیر بیان اولنه جق «شهبندر خانه» بحری « اولوب بوندن بشقه فلنک اسوح و سائر ممالکده واقع تجارتگاه لیمانلردن هر برینک عادات و اصول بحریه لری قوانین و نظامات مخصوصه سنده مقید اولوب اهالیسی طرفندن بونتره تمامیه رعایت و محافظه لرینه اعتنا و همت ایدیلور ایدی .

بارسلون شهرنده قدیمأ اصول و عادات بحریه بی حاوی بر مجموعه ترتیب ایدلمشده بونک لاتین لسانی اوزره یازلمسی حسینیه سفینه صاحب لری و تجاران اکلیایه مدقلرندن اون دردنجی عصرده رومانول لسانی اوزره شهبندر خانه» بحری نام مجموعۀ عادات بحریه تنظیم ایدلمشدر . شهبندر خانه» بحری طرف حکومتدن نشر و اعلان ایدلیوب من القدیج جاری اصول و قواعدی جامع اوله رق افراد طرفندن چقارلمش و فقط بحر سفید اطرافنده کی دولتر تبعه سی طرفندن عادات رسمی بر قانون کبی احکامنه رعایت ایدلمشدر . مجموعۀ مذکوره عموماً تجارتیه وسیر سفانته دار قواعد عادیه دن بشقه صرف حقوق بین الدوله دار بر طاقم خصوصاتی حاوی ایدی . از جمله مصادرات بحریه حقنده کی احکامی شایان دقت اولمغله بعضیلری بروجه آتی بیان ایدیلور :

« بر حرب سفینه سی دوست دولت کیسنده بولدیغی دشمن مالنی ضبط ایده بیلور سه ده انک نقلندن سفینه صاحبنک آله جغی اجرتی دخی تأدییه مجبوردر . قوماندان مصادره اولنان اموالی ذاتاً انلری حامل اولان کی ایله ایستدیکی یره نقل ایتدیره بیلور

وبوکا سفینه صاحبی ممانعت ایده من فقط مقاوله» مخصوصه اولسه بیله اشیانک محلینه دخولندن صکره هر حالده اجرت نقلیه نك تأدییه سی لازمدر . اگر مصادره اولنان اشیا میاننده سفینه افرادینک اموال ذاتیه لری دخی بولدیغی ادعا اولنور سه بونک سفینه دفاتریله اثباتی و یا خود قیودان و طائفه لری - ارباب ناموسدن بولندقلری حالده - مع القسم اثبات کیفیت ایتلری اوزرینه اموال مزبوره اصحابنه اعاده اولنور . سفینه صاحبی اشیانک نقلنه ممانعت ایدر و حرب کیسنده امین بر محمله بولنر ایسه طائفه سی قور تارمق شرطیه تجار کیسی باطریله بیلور بوندن طولایی بر مسؤولیت لازم کلز . جوله بیطرف و یادوست دولت تبعه سنک اولوبده سفینه دشمنه منسوب بولنور سه اشیانک صاحبی اولان تجار یا سفینه بی حرب کیسی قوماندانندن مناسب بر فیثاتله اشترا ایدرک ایستدیکی یره کتمک و یا خود کی بی مصادره ایدن قوماندانک امر ایتدیکی یره کتدیکی حالده کندی اموالی ایچون ذاتاً و یره جکی اجرت نقلیه بی مصادره ایدن قوماندانه تأدییه مجبور اولق شقلرندن برینی ترجیحده مختاردر . اگر تجار شق اولی ترجیحله سفینه بی آلق ایسترده قوماندان بو معامله یه رضاداده اولز ایسه اجرت نقلیه و یرلمدکن بشقه تاجرک تضمینات طلبنه بیله حق اولور . شهبندر خانه» بحری حکمنجه بر مصادره نك موافق قاعده اولوب اولدیغنک تدقیقی یالکز آمیراله عائد اولوب بو مجموعده مصادره» بحریه

محاکندن اصلاً بحث یوقدر محاکم مذکورہ نك تشکیلی ایسه اون
 بشنجی عصر ابتداسنده و فرانسده قرار کیر اولوب موخرأ
 بالجمله اوروپا دولتری جانبدن قاعده اتخاذ اولمشدر .
 بالاده ذکر اولنان اثارک وجودیله برابر اوزوپاده معاملات
 بحریه هنوز بر انتظام تام تختنه کیر مامشدی . قورصانلق پک
 زیاده رواج بولان صنایعدن اولوب بو حیدودلر اکثر سواحلده
 اراضیء جسمیه و بیوک دو نماره مالک اولدقلرینه و حکومتلرده
 ایسه بونلری تأدیب اقتداری مفقود بولندیغنه و یا اقتدار اولسه
 بیله اشمال و تسیب سیئه سیله اعاده امنیت بحریه ایچون جداً
 تثبت اولندیغنه مبنی هر کس سفائننی باشلی باشنه و قوای ذاتیه
 سیله مدافعه یه مجبور ایدی . حالبوکه بر سفینه نك یالکزجه
 سیاحت ایتمی او وقتلرک امنیتسز لکنه نظراً قابل اولماغله
 سفائن بر لکنده کیدرلر و آمیرال اسمی ویریلان بر ذات جمله سنه
 قومانده ایردی . بو سفائن تجاریه دو نمارلی قورصانلره محاربه
 لرده بولنه رق ضبط ایده بلدکلری اموالی بینلرنده تقسیم ایتدکلری
 کبی بعضأده بالخاصه حرب نیثیله سفره چقدقلری و حکومتلرک
 منتظم دو نمارلی اولماغله محاربه زمانلرنده حکومت نامنه اوله رق
 غوغایه قارشدقلری واقع اولور ایدی . بر ذاتک املاک و یا شخصنه
 تبعهء اجنبیه دن بری تعرض ایدرده بو تعرضک فاعلی
 حکومت طرفندن تأدیب و ضرر واقع تضمین ایدلر ایسه
 متضرر اولان شخص دولتندن مساعده الهرق تجهیز سفائن

ایله دشمنک هم ملنلرندن راست کلدیکی کیلری احراق و غرق ایدر
 و بعضأ او دولت سواحلنی دخی یغما و تاراج ایلر ایدی .
 حکومت مختلفه نك بو خصوص ایچون ویردکلری رخصت
 نامه یه مقابله بالمثل و یا مارق مکتوبلری دینلوب بونلر برینک دیگر
 دولت تبعه سنندن برنده اله جغنی اولوبده مدیون ادای دینندن
 امتناع ایلدیکی حالده ده ویرلدیکندن عادتاهم ملت اولان تجارانک
 جمله سی بر برینه کفیل ضامن عدا اولور ایدی . مدینتک انتشاریله
 اوروپاده بو بار بار اصولر پیدر پی قائم شسده محاربه زمانلرنده
 سفائن تجاریه نك دخی استعمالی و بونک ایچون اصحابنه رخصت نامه لر
 اعطاسی یعنی (Course) تعقیب بحری اصولی عصر مزه قدر دوام
 ایدرک یالکز پارس معاهده سیله قالدیرلش و حالا امریقا و بلجیقا
 حکوماتی طرفلرندن فسخته موافقت اولنماشدر .
 ملل مختلفه نك بر برینه دشمن اوله رق طوغدقلری حقنده کی اعتقاد
 قدیم قرون وسطی ده اوروپانک ملل عیسویه سی بیننده دخی
 معتبر ایدی . اجانبک کندی وطنی خارچنده اولان اراضی ده کی
 اموال و املا که حق وراثتی مصدق اولیوب اصحابنک وفاتی و قو
 عنده بو قبیلدن املاک حکومت محلیه یه قالور (Droit d'aubaine)
 ایدی . زمانجه معتبر اولان حقوقدن بریده (Droit de noufrage)
 یعنی بریر حاکمنک فورطنه ایله اورالره دوشان سفائنه
 مالک اولسی اولوب بو قبیلدن سفائن جهلای عصرجه جناب
 حق طرفندن احسان اولمش بر نعمت عدا اولندیغندن اشیا

و جوله‌لری یغما و قورتلان یولجی و طائفه‌لر حال اسارته ارجاع ایدیلور ایدی . بو عادت و حشیه او قدر قوتلی ایدی که لغوی ایچون بر طاقم دولتلر دفعاتله قوانین و نظامات منهیه نشر ایتدکلی حالده ینه بر چوق یرلرده قرون جدیده ایتدالرینه قدر باقی قالدی . دها غریبی شوراسیدر که ناپولی قرالی شارل دانترو متعصب بر قاتولیک اولدیغی و پاپانک اک صادق بندکانندن بولندیغی حالده سواحلنده قضازده اولان اهل صلیب سفائنده دخی عین صورتده معامله ایشدر . انکلتزه و فرانسه حکمدارانلی بو اصولک لغوی ایچون متعدد قانونلر یا پیشلر سده دول اجنبیه ایله منعقد اولان معاهداتک بعضیلرنده ملت متعاهدهیه قارشو بو حقتک اجراسندن رسماً فراغت ایلدکلی مصرح اولسنه نظراً کلیاً لغو اولندیغی و ینه کما فی السابق جریان ایش اولدیغی اکلاشیلور . انکلتزهده بو خصوص حقنده نشر اولنان بر نظام حکمنجه سفائن مغروقهدن ضبط اشیا حقیقه طائفه دن کسنه ننگ قورتلانسی حالته منحصردر . المانیاده بولنان و هانزه اتفاقنی تشکیل ایدن شهرلرایلک دفعه اوله رق اشیانک کاملاً مصادره سی اصولنی حق تخلیص اوله رق بر مقدار پاره مقابلنده اصحابنه اعاده ایلک صورتنه تحویل ایشلر و دول سائر ایله معاهده لرنده سفینه ده آدم بولنسه بیله جوله صاحب لرنک بر مدت معینه ظرفنده استرداد امواله حق لری اوله جغی قاعده سنی درج ایشلردر .

بالاده افاده ایتدیگمز و جهله غرقدن خلاص اوله رق اسیر

ایدیلان بیچاره لر بر چوق فدیة نجات التمدجه قویو یرلمیوب بو تدبیردن حکمداران بیله استئنا ایدلمزدی حتی انکلتزه قرالی ارسلان یورکی ریشارک اهل صلیب محاربه سندن عودتنده اوستریاسواحلنده سفینه سی غرق اوله رق اورانک دو قه سی لئوپولد طرفندن اسیر و برقلعه یه حبس ایدلدیکی و بعده آلمانیا ایمراطوری التنجی هانری به صانلدیغی و نهایت انکلتزه اکابر و امراسی طرفندن کلی ایچه و یربله رک اسارتدن تخلیص ایدلدیکی مشهوردر . قرون وسطی تاریخی تحری اولنسه زمانمز باربارلرنده بیله امثالی نادر کورینان بو مثل و عادات و حشیه و وقایع مؤلمه ننگ کثرتی داعی تعجب او اور . او وقتلر احوالنک زمانمله مقایسه سی ایسه حقوق دولک شو درت بش عصر ظرفنده کی درجه ترقیسی اثبات ایچون بر دلیل بیعدیلدر .

قرون وسطی ننگ قسم اخیرنده میدان ظهوره کلان وقوعات سیاسیهدن اک مهمی دولت عثمانیه ننگ ظهوریدر دولتیزک تشکلی بر قاج جهته اهمیت عظیمه یی حازدر عثمانیلر استانبولی فتح ایله قرون جدیده یی کشاد و بو وجهله تاریخده بر دور جدید احداث ایلدکلی کبی بر مدتدبرو قدرت و شوکت قدیمه سی مبدل ضعف اولمش اولان شرقی بر دولت جسمیه یه مقر ایدرک غربه قارشو بر قوه موازنه حصوله کتورمش و من القدیم ایکی قسم بیتنده موجود اولان رقابت و خصومت تجدد ایلدیکنندن قوای غربیه یه قارشو شرقک مدافعه سنی در عهده ایشلردر .

دولتمز حین تأسیسندہ ترقی ایتک ایچون لازم کلان و سائطک
 چله سنی حاز اولوب فی الواقع امراسنک حسن تدبیر و درایتلری
 عمومک حیث دینیہ و وطنیہ لری حکومتک عدالت و حقوق شناسلغی
 سایه سنده آز وقت ظرفندہ دول معظمہ بینندہ بر موقع مستثنا
 کسب ایلدی . عثمانلیلرک ابتدای ظهور لرندبری مجاورلرینہ
 قارشو اولان معامتلری بر صورت عمومیہ مطالعہ اولنورسه
 حقانیت خصوصندہ معاصرلری بولنان ملتله فائق بولندقلری
 تین ایدر باخصوص دول اسلامیہ ایله مناسبتلرنده اجدادمز
 قوق العاده خلوص قلب و حسن نیتله حرکت و معاهدات
 و مقاولات احکامنک تمامی اجراسنہ پک زیاده غیرت ایدوب
 بر دولتک استقلال کندیلرنجه بیوک تهلکه لری موجب اوله جغی
 و امنیت داخلیہ و خارجیہ لرینی اخلاص ابدہ جکی ثابت اولدجہ
 ملکنی ضمیمه ممالک ایتزلر و اسرای حربیہ بی اعاده ایتدکاری کبی
 اسیر اولان امر او اکبری دخی انواع تلطیفات و احترامات
 ایله وطنلرینہ کوندرلر ایدی قره مان حکومتک تاریخی بو
 خصوصده بر شاهد عادلدر قره مان بکری دولت علیه علیهنده
 تشبثانده بولتمقدن و فرصت بولدجہ رفع لوای خصومت ایله ملل
 عیسویہ ایله بیلہ اتفاق و اتحاد ایتلکدن بر آن خالی قالدقلری و
 بونکله برابر هر محاربه ده انہزام کلی به دوچار اولدقلری حالده
 مجرد غالبلرینک اعتدال و مرجتلری سایه سنده - ایکی عصر
 قدر محافظه استقلال ایتشلر و نہایت ملکترینک فتحی ایسه

حکومتلری بقابولدجہ دولتمزک امنیت خارجیہ سی دائما رخنہ دار
 اوله جغی و بونلرک ایسه هیچ بر حسن معامله ایله اصلاح حسیات
 ایتیه جکری ثبوت بولدقدن صکره و بالمجبور به وقوع بولمشدر .
 عثمانلیلرک دول عیسویہ ایله مناسباتی دخی - زمانک اخلاق
 و عاداتدن و دین اختلافندن متولد بعض احوال استثنائیہ دن
 صرف نظر اولنورسه - ینہ اولکی به مشابه برداره حق و قپروری
 داخلنده جریان ایدردی ایلاک حکمدارلرک جوارده بولنان روم
 پرنسریله اولان معاملات اعتدالجویانه و حرکات اعتماد کارانه لری
 معلوم اولوب اکثر محارباته خرس تیانلرک سبب اولدقلری او وقتلر
 احوال سیاسیہ سنک تدقیقیله ظاهر اولور بوبایدہ مثالر غایت
 چوق اولوب بیله جک وقعه سندن بدأ ایله بلغار قرالی سیممانک
 حرکات نالایقه سنہ و مجار قرالی ولادیسلاسک نقض عهدی [۱]
 و یا اسکندر بکک افعال و حشیہ سنہ قدر دور استیلامزک حاوی
 اولدیغی محارباتک همان کافه سنہ دولتمز مدافعه نفس ایچون
 کیرمش و نائل ظفر اولدقدن صکره ایسه بالطبع و فقط ینہ
 اعتدال ایله - حق غالبیتدن استفادہ ایتلشددر . بعض توارینجده

[۱] حکمدار مشارالیه ایله سلطان مراد ثانی بیلنلرنده اون سنہ مدتله
 بر صلح عقد اولندیغی حالده قرال معیتنده پاپانک مرخصی بولنان قاردیتال
 سزارینی کفارہ و یریلان سوزنک حکمی بوقدر دیهرنک مومی الیهی نقض عهدہ
 تشویق ایلدیکی مشهوردر فقط محاربه واقعه ده ژان هونیانک اردولری منہزم
 و قرال ولادیسلاس مقتول اولغله عدالت الیهی یرینی بولمشدر .

پك زياده حقمنز كوستريلان قسطنطنيه فنجى بيله بونك عليهنه مدار اعتراض اوله مز . بعض وقايع واردر كه - چوقد نبرى ظهورى بلكه نملكده اولديغى وذاتآده طبيعت مصلحت ايجاباتندن بولنديغى ايجون انلرده اشخاصك چوقلق دخلى اوله مز . احق و جاهل ايمپراطورلر حيثسز اكابر و قورقاق ضابطان ايله اداره اولنان و قدیم رومانك هيچ بر فضيلتنه مالك اولمسنزين هر نوع رزائلنه وارث بولنان بيرانس ايمپراطورلغى ذاتاً انقراضله محكوم اولديغى حالده صكره لرى ياللكز عثمانلى حكمدارلرينك صبر لرى سايه سنده بقا بولمده ايدى فاتح سلطان محمد ايسه بونك ضبطيله ذاتاً وقوعى لابد اولان بروقه نك فاعلى اولمقدن بشقه برشى ياپمامشدر . واقعا بوقدر اعتدال اوزره حرکت ايدن بر ملتك آز وقت ظرفنده قوجه بر دولت تشكيلنه نصل موفق اوله بيلديكى شايدان حيرت اوله بيلير فقط او عصر لرده حكوماتك كثرت و تنوعى اهالى به اجرا ايديلان ظلم و اعتراف بيرانس و شعباتنده كى فساد اخلاق و اوزمانده كى سلاجقه و سايره كى دول متجاوره نك ضعف حيثلرى و بوكا مقابل عثمانلى لرده كى جسارت، حيث و عدالت نظر دفته النورسه بو كيفيتك پكده او قدر خارق العاده برشى اولديغى تدبیر ايدر .

فصل ثانی

قرون جدیده ابتداسندن وستفانیه معاهده سنه قدر

وقوعات سیاسیه

استانبولك فاتح سلطان محمد طرفندن فنجى قرون جدیده يي كشاد ايدر فقط بو دورى قرون وسطى دن تفریق ایدن وقعه ياللكز شرق ايمپراطورلغك انقراضى اولمىوب اون بشنجى عصر ايجنده بر چوق احوال اوروپانك حال قدیمى كلياً تغيير ايلشدر . مثلاً باروت و اسلحه نارينه نك شیوع استعمالی حكمدارلرك قدرت و قوتلرینی تزید و متبوعلرینه فارشو دائماً سر كشلكده بولنان اصلزادكان و دره بكرينك اهمیتنى تنقیص ايله قوی الشوكه دولترو وجوده كتیرمش و طباعتك انتشارى افكار عمومیه نك ترقيسنه و بالاخره پروتستانلغك رواج بولسنه بيوك ياردملر ايدر كى ازمنه متوسطه نك خواص میزسنندن اولان ظلمت جهالتى رفته رفته ازاله ایتشدر . آمريقا قطع سنك و هندستان طريقنك كشفى دنيايه بر عالم ديكر علاوه ایلديكى و كسب شهرت و ثروت ارزوسننده بولنانلره واسع بر میدان امتحان آچديغى كى مستعمرات تملكه باشلايان دولترو پيننده اوللرى مجهول برطاقم مناسبات جدیده حصولنى اتساج ایتش و اصلاحات مذهبيه

ایسه اجرا اولندیغی محالری قاتولیک کلیسا سنک دوچار ایلدیکی جهالت و ظلمدن تخلص ایله فکر بشرك توسعنه سبب و سربستی و جدانی اعلان ایله حریت شخصیه نك تأسیسه مبدأ اولمشدر .

اسباب مذکورهنك تأثیر یله اوروپا قطعہ سی یارم عصر طرفنده طمانمز بر حاله کلمش ایدی قرون وسطی ده المانیا و فرانسه حکمدارلری اصلزادگان ایله، انکلتزه امور داخلیه سی و اسپانیا اندلس دولت اسلامیه سیله مشغول اولوب ایتالیا ده بر چوق حکومت صغیره یه منقسم و اجانب نفوذینه تابع بولندیغندن قوتلی بر دولت بولندیغی حالده اون بشنجی عصرده فرانسه انکلتزه المانیا و اسپانیا حکوماتی پک زیاده کسب نفوذ ایشلر ایدی . بو صورتله دول معظمهنك تشکلی ایسه بالطبع محاربات دولیه تولدینه بادی اولمشدر .

بو دورک انک مهم وقوعات سیاسیہ سنندن اولان اوروپا موازنه سی مسئله سیله ایتالیا محاربه لری همان قرون جدیدهنك کشادیله برابر ابتدا ایشلدر . قرون وسطی نهایتنده اوروپانك شمالنده انکلتزه و سطنده المانیا و فرانسه و جنوبنده اسپانیا دولتلی حکومت معظمهن دن بولنوب سائر شمال دولتلی اوروپا مورینه مداخله ایشلدر کی ایتالیا دخی قسما پاپا و ناپولی و ونڈیک حکومتنه و جواهر سائر یه و قسما اوستریا یه تابع اوله رق هیچ بر دولت دیگرلرینه تجاوز ایدهنك اقتداری حاز او لماقده و بونك مجموعندن ایسه بر موازنه سیاسیہ حصوله کلکده ایدی .

فقط فرانسه قرالی سکزنجی شارلک اساسن بر وراثت مسئله سنی بهانه ایدرنك لومباردییه داخل اولسی و آز وقت طرفنده ایتالیا نك قسم اعظمی فتح ایشی فرانسه نك توسع حدود و تراید نفوذینی موجب و موازنه واقعه نك اخلاقی منتج اولغله دول سائرهنك شکایاتنه و ایتالیا محارباتنك ظهورینه سبب اولمشدر محاربات مذکورهنك بش قسمة منقسم اولوب قسم اول انکلتزه المانیا اسپانیا و ونڈیک و پاپا ایله بعض ایتالیا حکوماتی بیننده بر اتفاق عقدی و فرانسرلرک ممالک مفتوحه دن طردیله مرور ایشلدر و ونڈیکک توسیع ممالکه تثبیت ایشی ایتالیا جه اولان موازنه یی اخلاقی ایشلکه پاپا ژولک تشویقیله جمهوریت مذکورهنك علیه فرانسه دخی داخل اولدیغی حالده بر اتفاق تشکیل اولندیغی کی مؤخرأ فرانسرلر آمال قدیمه لرینك اجرا سنه قیام ایشلری اوزرینه اتفاق مذکورهنك و ونڈیک دولتیده داخل اوله رق و مقدس نامی و یریله .

رک کندی علیه لرینه چورلدی . او زمانده موازنه فکرینك نه درجه کسب اهمیت ایدی کی بو اتفاقلرک دائماً تجاوز ایدن دولت علیه دن دو نمسندن و بو صورتله فتوحات آرزو سننده بولنان هر ملتنك سائرلرک قوای مجموعهنه قارشو محاربه ایشک و یا خودلرک نیت ایشک شقلرندن برینی ترجیحده مضطر قالمسندن اکلشیه بیلور فی الواقع بو پولتیقه نك تأثیراتی صکره لری ده از یاده کورلمکه باشلامش و فرانسه دولتنك حین تجاوزنده اوستریا و المانیا دائماً متفق طرفنده بولندیغی حالده اسپانیا فلتنك و مستملکاتیله

برابر بو ایکی تاجک بشنجی شارل عهده سنده جمعی و خصوصیه فرانسه لک انهمز امیله برنجی فرانسوانک پاوی ده اسارتی اوزرینه بالجه دولتر المانیایی ترکه حکمدار مغلوبی التزامه باشلامشدر حتی او زمان سلطان سلیمان قانونی دخی فرانسه ایله اتفاق ایدرک المانیایه اردولر و بحر سفیده دخی دو نمار سوق ایدلمش واسپانیا ایله اوستریا دولتری و دولت علیه بیننده بعضی فاصله لرله عصر لر جه مدت دوام ایدن محاربات عظیمه به بو وجهه باشلامشدر .

هر نقدر فرانسه نك متفقری چوق ایسه ده بشنجی شارل ده اوروپانك نصفندن زیاده سنه حاکم و اوقتر حکمنجه ثروتك منبجی اولان آمریقا قطعه سنه مانك اولغله مدت مدیده محاربه دن و مادرید و قامبره معاهدات موقته سنندن صکره ینه غلبه اوستریا خانداننده قالمش و ایتالیا محارباتنه صورت قطعیده ختام و یرن قاتو قامبره زی معاهده سیله پایا ملکی و ونیک جمهوری مستثنا اوله رق شمالی ایتالیا کاملاً خاندان مذکورده ترک اولمشدر .

فرانسه نك تجاوزاتی نتیجه سی اولان موازنه عمومی و مناسبات سیاسیة دول حقنده کی افکارك وجودیله برابر بو دورده حقوق بین الدولدن بر نشانه بولمق خیلی مشکدر هر نقدر اتفاق و صلح معاهده لری عقدی موده حکمنه یکم شسده بونلرک بر امنیت متقابله اساسی اوزرینه مستند اولدیغنی و جله سنك بر سوء نیت اثری اولدیغنی اوزمانك وقوعات سیاسیة سی اثبات ایدر . اتفاق مقدس و قامبره اتفاقده کورلدیکی اوزره متفقردن

ك قوتلیسی دشمن مشترک مغلوبیتندن صکره کندی حسابنه اوله رق اجرای فتوحاته و متفقرینك ضعفندن استفاده یه غیرته قصور ایتدیکی کی بالطبع سائر لیده انك علیه اتحاد ایدرلر و بوکا بعضاً دشمن قدیمده داخل اوله رق بو وجهه اتفاق متصل تبدیل اعضا و تحویل مقصد ایدرلر ایدی . معاهداتی غایت سهولتله عقد ایدرک محتویاتی ممکن مرتبه اجرا ایتماک حازر وظائف اولانلر جه بر فضیلت عد اولنوب علی العاده مغلوب ناچار قانجه غالبك بالجه مدعیاتنه رضا داده اولور و تهلکه دن خلاص اولور اولمز تعهداتنه خلفه باشلار ایدی . مادرید معاهده صلحیه سنی بالامضا اسارتدن قورتلدقدن صکره فرانسه حدودینه مواصلتنده کندینی نقض عهده حقی کوسترک ایچون برنجی فرانسوانك سویلدیکی سوز معلوم و نابولی فتحی اثناسنده اون ایکنجی لوئیئیک متفق اولان فردیناند قاتولیک حرکتی مشهوردر . مومی الیه زمانك الذی شهرت حکمدارانندن اولوب اندلس اهالی اسلامیه سنه قارشو اجرا ایتدیکی مظالم و وحشتلره مکافاة قاتولیک عنواننی قازانمشدی حالبوکه حضرت عیسی و کیلی طرفندن بو وجهه تلطیف اولنسان ذاتك قواعد اخلاقیه به رعایتی اولدرجه ده زیاده ایدی که فرانسه قرالنی اون دفعه دن زیاده الداتدیغنی علناً اعتراف ایله بو حرکتنی کندیسنجه سرمایه افنخار ایدردی . معاصرلری دخی فردیناندن اشاغی قالمیوب پاپا الکساندر بورجیا وانکلتره قرالی یدنجی هانری

بلکه فنالقی خصوصاً کندیسنه بیه فائق ایدیلر بو جهته
 یلانجیلق حیله کارلق و سوء نیت امور سیاسییه به جه پک مقبول
 برخط حرکت اولوب بجه طرفندن اجراسنه بالطبع اعتنا و
 غیرت اولنور ایدی. او نیشنجی و اون النجی عصرلرک احوال
 عمومییه سی خصوصیه ایتالیاده تجسم ایدر. قطعاً مذکور
 من القدییم و باخصوص بو عصرلرده متعدد حکومت صغیره
 بیننده منقسم و شمالی ایسه ککادلاً اوستریالیلر یئنده اولغله
 حکومت مزبور کک برلرینک شرنندن امین اولق و کک
 اجانبه قارشو استقلال اداره لرینی وقایه ایلیه بیلک ایچون حیله
 و خدعه دن مرکب و احتیاط ایله مملو برپولتقه انخازینه مجبور
 اولمشلر ایدی. فی الواقع میلان و فلورانس جنوه و ونڈیک
 حکومتلر قرون مزبورده کی تاریخ سیاسیله کوز اوکنه
 کتیریلور ایسه امور دولیده و اجرای معاهدات خصوصاً
 هیچ بروقت حسن نیتله حرکت ایتدکلری و دائماً تبدیل اتفاق
 و برکون دوستلری اولان دولته ایرتسی کون دشمنلک ایتکه
 و حتی بر دولته متفق بولندقلری حالده سفیرلری واسطه سیله
 و خفیانک دشمنی بولنان دولته ده عقد وفاق و اتحاد چالشدقلری
 کوریلور بویسه طبیعی بر کیفیت اولوب بر دولت محافظه
 استقلالنه کافی قوته مالک اولمزه بو مقصده وصول ایچون
 حیله کارلغه و تدابیر غیر مشروع انخازینه تشبث ایدجکی
 بدیهیندر. ایتالیاده او وقت موجود اولان اداره لرک بر طاقی دولت

ایسنه بیه لایق اولمیهوب عادتاً برر حیدود جمعیتی عدینه سزا
 ایدیلر. زمانک قاعده سی حکمنجه مقصده وصول ایچون هر نوع
 وسائط مقبول اولوب بومساعده ایسه بعضیلری طرفندن پک
 زیاده سوء استعمال اولمشدی: پاپا النجی آلکساندرک و اوغلی
 سزار بورجیانک ایتالیانک و سطنده بر پرنسلاک تشکیلی مقصدیه
 ارتکاب ایلدکلری جنایات عظیمه انسانه دهشت کتیرر. احوال
 مشروحه ایله برابر ایتالیای حکومتی حقوقک اساسلرندن اولان
 بعض تأسیسات و عادات وجوده کتیرمشلردر. از بجه دول
 اجنبیه نزدنده صورت دائمه ده سفارتلر احدائی تجارتگاه
 شهرلرده شهیندر مقامنده مأمورین اقامه سی و معاهدات تجاریه
 و سیر سفاین مقاولاتی عقدی کی اصول جدیده بونلر طرفندن
 احداث ایدلشدر. حتی ونڈیکولر اوزمان کفار عد اولنان
 عثمانیلرله بر تجارت معاهده سی عقد ایله دولتمز علیهنده کی
 خرسیتیان اتفاقی ترک ایلشلردی. [۱] جمهوریت مذکور
 سفراسی مرخص بولندقلری دولتک صورت اداره ملکیه

[۱] حتی او وقت عثمانیلرله عقد معاهده ایتلرندنطولای سائرلر
 طرفندن دوچار اعتراض اولدقلرنده «بز اولا ونڈیکولر صکره خرسیتیانز»
 دیه جواب ویره رک کندیلر بجه منافع تجاریه امور مذهبییه مرجع اولدبغنی
 اعلان ایتشلر ایدی. فقط ایکی دولت یئنده دوستلق چوق وقت
 سورمیوب و قوعب اولان محاربات عظیمه مدت مدیده دوام ایتش و نهایت
 ونڈیک مستلکانک کاملاً دولتمزه انتقالی و جمهوریتکده خراجگذار اولمسیله
 ختام بولمشدر.

و سیاسیه سی، نفوس و سکنه و اخلاق و عاداتی، ثروت و معموریت و قوای حربیه سی و الحاصل بلنسی لازم اوله جق کافه خصوصاتی حقنده حکومتنه معلومات مفصله و یرمکه مجبور اولوب ره لاتزیونی (Relazioni) تسمیه اولنان بو لو ایچدن و ندیک دولتی چوق استفاده لر ایشدر.

قرون جدیده ابتداسنده وقوع بولان کشفیات دخی حقوقه شایان دقت بعض احوال ظهورینه سبب اولمشدر آمریکا قطعہ سنک کشفی اوزرینه پاپا التنجی الکساندر رئیس روحانی و حاکم عالم صفتیله بر فرمان نشر ایدرک آصور اطه لرینک یوز میل جهت غریبسندن بدأ ایله جهات غریبه ده کشف اولنان و یا اولنسی ملحوظ بولنان مالکک حق سلطنتی قاسمیلیا و آراغون قرالی فردیناند و قرالچیه ایزابله و بونلرک بوا یکی تختنه وارث اوله جق اولاد و احفاد لرینه احسان ایش (!) و مؤخرأ دیگر بر براتله بو امتیازی تأیید ایله اولجه اراضی مکشوفه نک تصرفه دائر اوله رق پور تکیرلره و سائره به و یریلان امتیازات و مساعداتی ابطال ایشدر. فقط احکام مزبوره ایله حقوقنه زیاده سیله خلل کلان پور تکیر دولتی شکایته باشلا یه رق پاپاده بو خصوصی اصلا نظر دفته آلمدیغندن نهایت مسئله ایکی دولت بیننده مذاکره اوله رق تحت قراره النمش و ۱۴۹۴ (۸۷۳ هجریه شمسیه) ده اسپانیا و پور تکیر دولتری بینلرنده عقد اولنان توره زیلا معاهده سیله الکساندرک تعیین ایلدیکی خط بشیل برون اطه لرینک

او چیوز النمش میل غربنه کتیر بله رک بونک شر قنده کشف اولنه جق اراضی به هانکی دولتک زیاده حقوقی بولنورسه انک متصرف اوله جغی بیان ایلمشدر. - پاپارک بو صورتله ممالک مکشوفه و حتی قطعات غیر معلومه بی ایستدکاری حکومت عهد سنه تفویض ایتلری کندیلرینک اداره عالمه حق لری اولدیغی اعتقادندن منبعث اولوب بو صورتله نائل مساعده اولان دولت ایسه ممالک متروکه بی ید ضبطنه آله رق اها ایسنه تبعه معامله سی ایدرو بونلر وقایه استقلال ایچون محاربه ایتدکاری حالده حق لرنده عاصی معامله سی ایدیله رک محاربلر شدید صورتده تأدیب اولنور ایدی. اولجه دخی افاده ایتدی کمز و جهله استقلال ملل و مساوات دول قبول و تصدیق اولندیجه حقوق بین الدولک و جودی غیر قابل اولوب پاپارک ادعای واقعلری ایسه نه درجه ده مغایر حقوق اولدیغی محتاج ایضاح دکدر بو ادعانک شایان استهزا اولدیغی دخی درکاردر فی الحقیقه مدت عمرنده پاپا اسمنی ایشتماش اولان و خرسدیانلغک وجودندن بیله بیخبر بولنان اقوامک ینه پاپایه تابع بولندقلرینی التزام ایتک کبی کونج بر حرکت اوله مز. موضوع بحشمز اولان دورک المهم و قوعا تندنبریده سلطان سلیمان قانونی طرفندن فرانسه تبعه و تجارینه بر طاقم مساعدات و امتیازات اعطاسنی متضمن اصدار اولنان خط همایوندر بو امتیازات اوللری دولت مذکوره حقنده بر لطف مخصوص اوله رق و ابراز علائم دوستی و مخادنت مقصدیله احسان اولندیغی و بالکز

خط هما یونلرده مندرج اولوب تبدیل و تعدیلاری حکومت سنیه نك
النده اولدیغی حالده مؤخرأ پیدرپی توسیع و اکمال و بالجه له
دولتر تبعه سنه تعمیم ایدیله رك هر بریله عقد اولنان و بالاخره
قاییتولاسیون اسمی و بریلان معاهدات مخصوصه یه درج اولنش
و بوضورتله مملکتیزده حقوق سلطنتله توافق ایتیه جك بر حال
حصوله کیشدر . - اشبو برنجی خط هما یونك احکامندن
بعضیلری قواعد حقوقیه و یا خود عادات دولیه یه موافق
اولغله رسماً قبول و تصدیق برجهتله موجب مضرت اولدقدن بشقه
یونلرك الك شوکتلی زمانلرنده و هیچ ردولندن قورقورلی اولدیغی
بروقنده قبولی اجداد مزلکه درجه ده حقتشناس اولدقزیننه بر دلیل
علمندر . مواد آتیه بو قبیلنددر : فرانسه تبعه سنندن هر فرد
ممالک عثمانیه ده كرك برأ و كرك بجرأ سیاحت ایده بیلك و رسوم
عادیه یی ایفا شرطیله هر نوع اشیا اشتراف و فروختنده سربست
اولق ؛ فرانسه سفائن تجاریه سی صاحبلینك رضاسی لاحق
اولدقجه خدمت دولته استعمال اولنماق ؛ بر فرانسیلی ممالک
عثمانیه ده عقد دین ایتدکنصکره فرار ایلدیکی حالده بوندنطولایی
قونسلوس و یاسار بر فرانسیل مسؤل طوتیله میوب فقط مدیون
فرانسه ده بولندیغی حالده بورجی اوراده کی املاک و اموالنك
فروختیله تسویه ایلمك ؛ فرانسه تبعه و تجارینك سربسته
اجرای وصیتیه حق اولوب وصیتنامه سز اوله رق و فات ایدنلرك
اموال متروکه سی قونسلوس معرفتیله ورثه سنه تسلیم اولنق ؛

فرانسزلرك ممالک عثمانیه ده سربسته بجه اجرای دین و آینه حققری
اولق ؛ طرفیندن آلمان اسرا حفظ اولنمیه رق طرف دیگره اعاده
قلنق . - فقط نه چاره که او وقت رأس اداره ده بولنان ذوات
حقوق داره سنی دخی طاشهرق و ایولکی افراط درجه سنه
کتوره رك حالا دولتك باشنه بتمز توکنز غائله لر آچان بر طاقم
مساعدا تده بولنشلردر . بوزمره دن اوله رق فرانسی تبعه سی
بیننده و قوعبوله جق دعاوینك فصلی قونسلوسلره حواله اولنه رق
یونلرك و بر دکقری قرارك اجراسنه ضابطه دولتك مجبور
اولدیغی ، مختلط دعوالرده عثمانلی دعوا جینك دلائل قطعیه
محرره سی اولدقجه قاضی حضورینه ککیده میوب هر حالده
فرانسیل ترجانی حاضر بولندقجه محاکمه اوله میه جقری ، امور
جزاییه ده فرانسیل تبعه سنك انجق حضور صدر اعظمیده محکوم
اوله بیله جکاری و فرانسه یه منسوب بسقیوسلرك اجرای مأوریت
روحانیه لرنده سربست اوله جقری و دولتری ایله عقد معاهده
اولنمیان تجار فرانسیل باندره سیله سیاحت ایتدکقری حالده عین
مساعدا ت و امتیاز اتدن استفاده ایلیه جکاری کی بر طاقم خصوصات
قاعده اتخا ذ اولنشدر . مواد مجو ثه دن بعضیلری قواعد علیه یه
موافق و حقوق سلطنت ایله قابل توفیق اولما لرینه و بعضیلری دخی
اساساً اجراسی لازم اولغله برابر رسماً بر دولته قارشو تعهد اتنه
آلنلری محل استقلال اولسنه بناء یونلرك قبولی ازهر جهت
شایان تأمقدر . بو امتیازات بر مدت یالکز فرانسیلره منحصر

قالوب فقط سلطان مراد ثالث زماننده باب دولته هدایای کثیره ارسال ایله استدعای لطف (!) ایدن و نندیک وانکلتره حکومتلری تبعه سنه دخی تعمیم اوننش و پیدرپی اعصار آیه ده دول سائره ایله بو مآلده معاهدات تجاریه و قایتولاسیونلر عقد اولمشدر .
 فرانسرله ایدیلان مساعدات دخی سلطان مراد ثالث زماننده بر قاندها توضیح و اکمال اولندیغی کبی سلطان احمد اول دورنده فرانسه سفیری ساواری ده بره وک طلبی اوزرینه نشر اولنان بر خط شریفله امتیازات سابقه تأیید و تحکیم و دولت مزبوره تبعه سنک هر نوع تکالیف شخصیه دن معافیتی دشمن حکومت تبعه سنک فرانسر بایراغی التنده اوله رق سربستهجه اجرای تجارت ایده بیله جکری و فرانسر ایلیچیسنک سفرای سائره یه حق تقدیمی بولندیغی کبی بر چوق مواد وضع اولنش و اون دردنجی لوئی و کوپریلیلر زماننده قایتولا سیونلر بر کره دهها تجرید اوله رق بحسب الایجاب معاهده شکنه قونلشدر . الیوم مناسبات سیاسیه و احوال داخلیه مزی مشکلات مالانهایه دوشورن قواعد مجوئه وانتره مماثل خصوصات عهدیه سائره نك وقتله قبولی نه درجه شایان تأسف ایسه بونلرک - ترقیات علمیه ایله عدم مطابقتلری میدانده اولدیغی حالده - تمامی محافظه لری ایچون اوروپا لیلرک ایتدکاری اصرار و عناد دخی اولقدر بادی تعجب و حیرت اولسه بچادر . خصوصیه عصر مزده هر دوات قوایدنی بلا استشنا هر نوع سکان مملکت

حقنده تطبیق ایتدیگی حالده بزده اجابنک حاز اولدیغی امتیازاتک مینعی هیچ نظر دفته آلمیه رق بونلرک حکومتلر حقنده اک مضر اوله جق صورتده تفسیر و شرحنه غیرت اولشمس نه اسم ویرمک لازم کله جکی بلنه مز .

اوروپانک اک بیوک وقوعات سیاسیه سندن بریده اون دینجی عصر میلادی ابتدالرنده رقابت دینی دن محصل اوله رق آلمانانک قتلیم و پروتستان حکومتانی بیننده ظهور ایدن واسوج فرانسه ودانیمارقه دولتلری دخی قاریشه رق او توز سنه مدت دوام ایدن محاربه عظیمه [۱] درکه حقوق دولجه بر زمان تأسس عداولنان

[۱] اوتوز سنه محاربه سی قرون جدیده تاریخنک اک مهم واک فاجع وقایعندندر اساساً اختلافات مذهبییه دن متوند و آلمانانک قاتولیم و پروتستان حکومتانی بیننده منحدث اولغله سیاسی رقابتلردن محصل شدتله محاربات دینییه و غلبان تعصبک دهشتی دخی منضم اولمشدر بو محاربه ده طرفین امرا وارباب سیاسی بیننده پک چوق ذوات کسب شهرت ایلشمسده هیچ برسی کوستاو آدولف درجه سنه واره مز فی الحقیقه بو مظلم دورده بالکر مومی الیه اعتدال وانصاف وعدل ومرحمت اوزره معامله بی اعتیاد ایتش و ذاتاً حربیه انسانیتیه ایواک ایتک مقصدیه داخل اولدیغی کبی بو مقصد اوغرنده فدای جان ایلشدر . فرانسه رئیس وکلاسی قاردینال ریشلیونک حرکتی دخی شایان دقت اولوب دولتی قاتولیمک مذهبنک اهم ارکاندن و کندیسی قاردینال اولدیغی حانده محاربه ده پروتستان فرقه سنی التزام ایلش و بوسورتله دولتک منافع سیاسیه سی حسیات مذهبییه سندن آبری اولدیغی اثبات ایتشدر . کوستاو آدولف حربیه مجرد سربستی وجدانک تأسسنه یاردم ایتک وریشایو ایسه فرانسه نک خصم قدیمی اولان اوستریایی صنعتیلمک ایچون

وستفالیه معاهده سیله ۱۶۴۸ (۱۰۲۶ هـ ش) ده ختام بولمشدر .
معاهده مذکورہ حقنہ موسیو هنری و ویتون مطالعات آتیہ یج
ایراد ایدر :

« وستفالیه معاهده سی زمانک حقوق دول تاریخ جدیدینہ
مبدأ اولہ جق بر دور اولق اوزرہ انتخابندہ اصابت ایدلشددر .
« بو وقعہ اوروپا مدینتی ترقیاتندہ مهم بر مبدأ تاریخ ارانہ ایدر
« قالوین ولوترک اجرا ایتدکری انقلابات مذہبیہ دن و اوستریا
« خاندانک تفوذ سیاسی علیہ اولہرق دردنجی ہزاری
« وریشلیو طرفندن باشلانیلوب مازارن طرفندن دوام اولنان
« منازعہ سیاسیہ دن تولد ایدن محاربات متعددہ متعاقبہ بورادہ
« ختام بولور . »

« بومصالحہ آلمانیادہ اوچ اعتقاد مذہبی یعنی قاتولیک لوترین
« وقالوینست مذہبی بینندہ مساوات دائمہ تأسیس ویکیدن تجدیدات
دینیہ ظہورینی و مستقبلہ رهبان املاکنک مصادر اتنی منع ایچون
« دائمی برسد محافظہ تشکیل ایلدی . »

« مصالحہ مزبورہ آلمانیانک اوچیز الی عدد دول مختلفہ -
« سنی ہمان ایمپراطوردن مستقل قبیلہرق آلمانیانک قاتولیک

اشتراک ایتسلر ایدی ذاتاً بو ایکی ذاتدن برنجیسی غروچٹوسک و دیگر
ماشیاولک شاگردی عد اولنہ بیلورلر فقط ایکسیدہ وستفالیہ معاهده سنک
عقدینی تسہیل ایتدکری جہتلہ سعیلری انسانیت نظرندہ صورت
متساویہدہ مشکور اولق طبیعیدر .

« بیراغی التندہ اولہرق اتحادہ طوغری ترقیسی طور دیروب
« پروسیانک مؤخرآ کسب کمال ایتسنہ سبب اولدی . دولت
« مذکورہ ایسہ اصلاحات مذہبیہ دن تولد ایلککہ بالطبع
« پروتستان فرقہ سنک ریاستنہ یکجوب دیگر جانبدن قاتولیک
« ہیئتک رئیس جسمانیلیکی صفت قدیمہ سنی وقایہ ایلیمان اوستریا
« خاندانک سیاست رقیبی اولدی . بو صلح ایمپراطور لغاک تشکلات
« داخلہ سنہ ایکی اجنبی عنصر ادخال ایلدی و فرانسه ایلہ اسوچ
« کفیل و ضامن صلح اولملری حسیلہ و اسوچ ہیئت متفقہ
« اعضاسندن بولنسی جہتیلہ صورت دائمہدہ آلمانیانک امور
« داخلہ سنہ مداخلہ ایتک حقنہ نائل اولدیلر . وستفالیہ
« معاهده سی حکومت متحدہنک ایمپراطورلق علیہنہ
« چورلمامک اوزرہ - کرک بربرلری آرسندہ و کرک دول
« اجنبیہ ایلہ عقد اتفاق ایللری حقنی وقایہ ایلدیکندن بوحریت
« آلمانیہ ہیئت متفقہ سنی اوروپا موازنہ سی ایچون تأمینات
« جدیدہ حالنہ کتیردی آوروپانک وسطنہ موضوع اولان
« جرمانیا ہیئتی برچوق منافع مذہبیہ و سیاسیہ بجمع اولان
« صورت تشکیلہ دول متجاورہنک استقلال وراحتنی محافظہ یہ
« کلی فائدہ بی موجب اولدی . »

« وستفالیہ معاهده سی ذاتاً اسویچرہ نواحیسیلہ فلنک
« ولایات متحدہ سنی ایمپراطورلقہ برلشدیرن روابطی محو ایلیمان
« اختلاقی تصدیق ایلدی . »

« استقلالاری اوستریا خاندانک هر ایکی قسمی طرفندن
 دوچار اعتراض اولقله برابر خیلی وقتدنبرو صورت قوبوده
 تأسس و تقرر ایدن بوجهوریتلرک رسماً طائفی ملل مظلومه نك
 ظلمه نك قوردیغی دائره تصدیقندن چیتیمغه و ناقابل تحمل برحاله
 کلان اعتسافانه مقاومت ایتمکه حقاری اولدیغنی تصدیق ایتمک
 ایدی. »

« بویکی جهوریتلر ایله بامصلحه حقوق متساویه لری
 قرار کیر اولان آلمانیا سربست شهرلری مدت مدیده - بورالده
 امنیت نادراً اخلاص اولنش برملجاً بولان - تجاوزات سیاسییه
 و دینییه مصائبزد کانه بر جای نجات اولشلر و بورالده کی
 حریت مطبوعات ایسه بیچارکانی اورویا افکار عمومییه سنی
 ذی قدرت ظالملر علیهنه دعوت ایتمکه اقدار ایلمشدر . »

« وستفالیه معاهده سی اورویا حقوق عمومییه سنک اساسنی
 تشکیلده دوام ایله فرانسه اختلالنه قدر اوروپانک وسط
 حکوماتی بیننده عقد اولنان کافه معاهداتله تجدید و تصدیق
 اولندی . »

« فرانسه ایله اسپانیا بیننده (۱۶۵۹) ده منعقد اولان پیره نه
 معاهده سی دخی وستفالیه مصالحه سی تعقیب ایدوب ایکی
 حکومت بیننده کی رجحان و تفوق ادعاسندن منبعت منازعه
 طویل یه ختام ویرمش و اسپانیا قرالنک قیزی ماری تره ز ایله اون

« دردنجی لوئی نك ازدواجنه سبب اوله رق بوربون خاندانک
 اسپانیا تختنه جلوسنی حاضر لامشدر . »

« جنوبک حال صلحه اعاده سی بوضورتله اجرا اولندیغنی
 کبی اولیوا و قوپنهاغ معاهده لری (۱۶۶۰) دخی اسقاندینا ویا
 حکوماتنده قاتولیک و پروتستانلق طرفدارانک مجادلانسه
 بر نهایت ویروب وازا خاندانک اسوچ تختنه توارثنی تصدیق
 ایدرک و اسوچ دانیمارقه لهستان دولتلری اراضی سی حدودینی
 تعیین ایلمه رک شمالده تأسس صلحی تأمین ایلمکده ایدی . »

« غروچئوس دورینک ختام بولدیغنی وستفالیه معاهده سی
 مؤلف مومی الیه ک فلنک و آلمانیاده کی تلامیذ و اخلاقی بولنان
 محررلرک یکی مسلك حقو قلرینک تأسسیسه تطابق ایدر . بو
 معاهده - آلمانیا دارالفنونلرنده کمال دقتله تدریس اولنان
 و اورویا حقوق عمومییه سی علم عمومی سنی توسعه کلی یاردم ایدن
 ایمپراطورلق حقوق عمومییه سی قوانینی کمال ایلدی . مصالحه
 مذکوره بونلر دیشقه دائمی سفارتلرک صورت ثابتده احداثه
 باشلانیلان دوری ارئه ایدر بو کیفیت فرانسز لسانی کبی
 صورت عمومییه ده منتشر اولان واولا مذاکرات سیاسییه
 تطبیقی اولندیغنی حالده مؤخرأ حقوق بین الدول مباحثاتنه
 دخی تعمیم اولنان برلسانک قبول استعمالیه برابر غروچئوس

« طرفدن احداث و اخلاقی و اسطه سیله اکیال ایدیلان علمه
 « دها علی بر صفت ویر مکه یاردم ایتشدرد » [۱]

۲

مؤلفین و آثار

قرون جدیده ابتدالرنده ترتیب و جمع اولنان قوانین مجموعه
 لری بیننده اک مشهوری دکز کیدونی (فرانسر لساننده کیدون

[۱] وستفالیه معاهده سنک حاوی اولدیغی تشکیلاتک اک مهمی آلمانیا
 ایمبراطورنغیدر. آلمانیا ایمبراطورنغی انتخابله تعیین اولنان و دائماً اوستریا
 خاندانندن آلمان بر ایمبراطور و برده دیت مجلسی یعنی حکومات مختلفه
 پرنسلی و وکیلرندن مرکب جمعیت مرکزیه ایله اداره اولنوب اوچیوزاللی
 حکومتی مشتمل ایدی بو حکومتلر وسعت اراضی مقدار نفوس و قدرت و
 قوتجه غایت مختلف اولوب یوز الیسی. منتخبلر دو قده لر لاند غراولر مار
 غراولر قونتلر و بور غراولر معرفتیه و یوزیکرمی اوچی رهبانندن اولان منتخبلر
 (Electeur) متره پولیدلر بسقفوسلر رهبان رئیس و رئیسه لری تارک
 دتیا شوالیه شرکتلری امراسی و داعیلر (Prieur) واسطه سیله اداره اولنور
 ایدی ایش اکیسی دخی ایمبراطور شهرلری نامیه مشهور اوله رق حکومت
 جمهوریه و اداره بلدیه یه مالک ایدی لر. دیت مجلس عمومی ۱۸۰۶ سنه سنه
 قدر راتسبون شهرنده اجتماع ایدرک بریسی منتخبلردن بری پرنسلردن و
 دیگرلر شهرلر مبعوثلرندن مرکب اوله رق اوج قسمه منقسم ایدی منتخبلر
 مجلسی مایانز قولونیا تره و بسقفوسلری ایله بوهمیا قرالی ساقسونیا و باویرا

دیو اردوو دو تملارده قوماننده علامتی اولان کوچک بایراغه
 ویا بونک حاملنه تسمیه اولنور) نام اثر در که مؤلف و مرتبی
 مجهول اوله رق اون التنجی عصر میلادیده یعنی شهیندر خانه
 بحریدن بر قاج قرن صکره میدان انتشاره چیقمشدر . بو اثرده
 حقوق بحریه یه دائر او زمانلر جاری و متعارف بولنان عادات
 و قوانین جمع و خلاصه و خصوصیه مقاولات بحریه ، سیغور طه لر
 و صادرات بحریه یه متعلق مواد تفصیل و تعمیق ایلمشدر .
 دکز کیدونی هر تقدیر بر قانون دکسه ده مندرجاتندن اکثریسی
 فرانسه حکمداری اون در دنجی لوئینگ ۱۶۶۸ سنه میلادیسنده

دوقه لری براندنبورع مارکزی ورن پالاتیاسندن مرکب اولوب ایمبراطورک
 انتخابی حق بولنره عائد ایدی فقط ایمبراطورلرک بیونک اوغللری روما قرالی
 تسمیه اولنهرق پدینک وفاتنده برینه نصب ایلمک قاعده حکمنه کچمکله
 ایمبراطورلق فعلاً انقراضنه قدر اوستریا خانداننده قالدی دیتک قسم ثانیسی
 دخی اوج شعبه اولوب برنجیسی رهبانی ایکنجیسی دوقه لرله لاند غراولری
 و اوچنجیسی سائر پرنسلی حاوی ایدی و هر بر حکومتک رأی درجه اهمیتنده
 متناسب اولوب بوندن بشقه آلمانیا اراضیسندن متصرف اولدقلری برلر
 ایچون اسوج دائیارقه و اوستریا دخی بو هیئته اعضا کوندرلر ایدی شهرلر
 مرخصلرندن مرکب اولان شعبه ایسه عهداً اهستجه مساوی اولغله
 برابر فعلاً اونقدر حکمی اولنوب ایمبراطور ایله منتخبلر وزادکان
 شعبه لرینک موافقتلری منضم اولان خصوصیات هر حائده حکم قانونی
 اکتساب ایلر ایدی . آلمانیا ایمبراطورنغی تأسیساتک بعض نقائصی بولنغله
 برابر بو صورتله تشکیلی فوائد عیدیه یی موجب اولمش وضعف ممکن مرتبه
 دون عظیمیه قارشو وقایه اولندیغی کبی آلمانیه حقوق عمومیسی دخی
 حقوق بین الدولک صورت فوق العاده ده توسعنه سبب اولشدر .

نشر ایتدیکی امرنامه بحریله تأیید اولمش و امرنامه مذکورک
مقاولات بحریه دایر فصولی کیدونده کی مباحث مقابله نیک بر
خلاصه سی حکمنده اولدیغی درکار بولمشدرکه فرانسه تجارت
بحریه قانونک اک بیوک منبعی ۱۶۶۸ امرنامه سی اولدیغنه نظرا
مجموعه مذکوره قسماً زمانمزه قدر محافظه احکام ایش دیمک
اولور .

اون التنجی عصرده بر جدیدک کشفی و اوروپا اصول
سیاسیه سنده وقوع بولان انقلاب مناسب بتریله حقوق دول
مسائلی کسب اهمیت ایتدیکندن برطاقم ذوات بو علمده بین العیلا
تمیز ایشملردرکه بونلردن اک مشهورلری بوجه آتی بیان
اولنور [۱] :

اسپانیاده کائن سالامانق شهری دارالفنونی معلملرندن راهب
فرانچسکو ویقتوریا «پره لقیوننهس تئولو جیقس Proelectiones
Theologicoes» نامیله امور دنیویه و اخروییه دن باحث اولق
اوزره بر اثر نشر ایدرک بونک — De dadis (هندستان) و
De Juri belli (حقوق حربیه) قسملرنده حقوق دولدن دخی
بحث اولمشدر . قسم اولده مؤلف اوروپا دولتلرینک بر جدید

[۱] بو بحثده کوربله جکی اوزره اون التنجی عصرده اسپانیاده یک
چوق ارباب حقوق ایشملردرکه بوکیغینک سببی اووقنده اسپانیانک بردنبره
کلی مالکه صاحب اوله رق مناسبات دولیه سی چوغالمسی و برچوق محاربه لره
کیرسی اولمشدر .

اوزرینه نه درجدهده حق تصرفلری اوله بیله جکی تدقیق ایله
اورالر اهالیسنک هر حالده استقلال تام اوزره بولمغه و ملکارنده
حاکم مطلق قالمغه حقلری اولدیغنی قبول و بولونیا رئیس علماسی
بولنان بارتول نام ذاتک ادعاسی وجهله ایمپراطورک کره ارض
اوزرینه اولان (!) حق حکومتی و یاخود پاپارک مساعده سی
بهانه ایدیلرک اقوام مذکورنک حریت و استقلالرینه تعرض
جائز اولیه جغنی بیان ایلر . یالکز اوروپا لیلرک حقوق طبیعییه
موجبجه بر جدید اهالیسنه بر ضررلری طوقتماق شرطیله
اورالرده اسکان و اجرای تجارت حقلرینده تسلیم ایدرک اگر
یرلیلر بو حقل اجراسنه ممانعت ایدرلرسه بو حرکتلرینک موجب
حرب اوله جغنی و محاربه ده اوروپا لیلر نائل ظفر اولوبده نتیجه
حرب بر معاهده اختیاریه ایله تأیید ایدلدیکی حالده ممالکک
غالبلرک ید ضبطنه بکه بیله جکی و برده خرسستیان اولیانلره بو
سببله اعلان حرب اولنه میوب یالکز مشرکینک مملکتلرنده
خرستیانلغک صورت علمیدهده نشرینه مساعده ایلملری اقتضا
ایتدیکنی ادعا ایدر . — قسم ثانی ایسه حقوق حربیه مسائله
منحصر اولوب بونده مؤلف اول خرسستیان ملتلرک محاربه
ایتملری جائز اولوب اولدیغنی مسئله سنی تشریح ایله بونلرک تدافعی
و حتی — بر حقسنزلغک تعمیری مقصدیله اولورسه — تجاوزی بر
حربه داخل اوله بیله جکلرینی و دشمنک ید ضبطنه بکمش اولان
اشیایی اغتنامه حقلری بولندیغنی بالبیان بعده حربک اعلان

واجراسی کیمله عائد بولندیغی و بر حربك محق اولسی نه کبی شرائطه متوقف اولدیغی و محاربلك حقوقی نه دن عبارت بولندیغی مسائلی تدقیق ایدر . و یقتوریانك افاده سنه نظراً - کندی شخص و املاکنی وقایه ایچون محارب به ایتمك حتی هر کسه شاملسه ده افراد ایچون کندی وقایه سنه منحصر و تهلکه نك وجودیله محدوددر دولتک یعنی هیچ بر قوت خارجییه یتابع بولنیان هیئت مکمله نك ایسه کرک کندی شخصنه و کرک تبعه سنه ایدیلان حقسز لقلرک تعمیرینی طلبه و بونی تأمین ایچون اعلان محارب به یه حتی واردر . بر قوه مرکزیه نك متبوعی بولنان حکومات بالطبع بو حقندن کلیاً محرومدر . اختلاف مذهب و خرسستیاندیغی عدم قبولده اصرار بهانه لری و یا آرزوی شان و فتوحات موجب حرب اوله مز . اعلان حربك وسیله مشروعه سی بر دولتک دیکرینه بر فنالق ایتمسی اولوب مع مافیسه جزئی خطالر ایچون دخی بر طاقم بیکناهلرک اتلافی جائز دکلدر . حربده لزومی محسوس اولان هر تدبیری اجرا ایتمك ، دشمنك اشیا سنی ضبط ایتمك ، نقودینی آلهرق مصارف حربیه و یا خسارات و اقعینی تعمیره قارشولق طوتمق و حتی دشمن منکنك بر قسمی و قلعه لرینی استیلا ایتمك تجویز اولنور . بر حربك محق اولوب اولدیغنی بیلمک و بو خصوصده شبهه یه محل قالماق ایچون عاقل و عالم آدمیره مراجعتله رأیبری صورلمسی و اختلاف متحدت انرله بالبیان فصلی ایچون نصایح طلب اولنمسی مناسبدر محارب به ترکار

علیهنده اولسه بیله (!) قادینلرله چوجوقلره طوقونیه مز . خرسستیانلر نزدنده چفتجیلر رهبان و اجانب و سائر بو مثللو محارب به یه طوغریدن طوغری یه داخل اولمیانلر تعرضدن مصون اولوب فقط حربك دوامی ایچون لزومی تحقق ایدر سه بونلرک اموالی مصادره اولنه بیلور ؛ مع مافییه اموال مزبوره ضبط اولنمسیزین اجرای حرب ممکن ایسه بو فعلک ارتکابندن اجتناب اولنمیدر . دول سائره تبعه سنندن بری بر دولت منسوبانندن بر شخصه ایراث خسار ایدر ده حکومتی طرفندن دوچار مجازات ایدلمز سه ضرر دیده اولان طرف - دولتک مساعده سیله - متجاوزک هم ملتی بولنان تجارانك (بیکنناه اولدقلری حالده !!) اموالی ضبط و بو صورتله اخذ ثار ایدر بیلور . اطفال و یونلر کبی حربیه قطعاً مداخله سی اولمیانلرک - حال اسارته ارجاعی جائز اولدیغنی کبی اسرای حربیه نك دخی باخصوص ملل عیسویه آرله رنده بعد الحرب تخلیه سبیللری و یالکز مصارف محارب به یی قیاده حق قدر تضمینات اخذیله اکتفا اولنمسی لازمدر . محارب به بتدکدن و دشمنده اثر مقاومت قالمدقدنصکره دخی خصما بقیه سنك اعدامی ممکن اولوب فقط خرسستیانلر بیننده (!) بو قاعده نك تعدیل شدتی اولی و بر محلك حین تسلیمنده محافظلرک حیاتلری مقاوله مخصوصه ایله تأمین ایدلماشسه انلر کده اعدامی موافق حقوق اوله جنجی (!) بدیهی و هویدادر . حربده دشمنك نقود و اموالی و بعضاده قلاع و بلادی صورت دائمده اولهرق ضبط اولنه بیلوب فقط

بونلرک مقدار قیمتی آنک طرفندن کوریلان خساره معادل اولسی لازم ویالکز اموال منقوله نك بو حسابدن استثناسی جائدر . - مؤلف مومی الیهک بیانجه حقوق حریه نك كافة تفرعاتی اوج قاعده ده جمع اولنه بیلور که بونلر ده بلا سبب و حقسنز برده اعلان حرب اولنماسی ، دشمنک کلیاً تخریب و ازاله و جودی مقصد اتخاذ قلمیوب یالکز اساسلی بر صلح عقیدینه فائده سی اوله جق قدر فنالق ایلمسی و برده بعد المظفریه مغلوبه اعتدال و انصاف اوزره معامله اولنسی خصوصاً تندر . - مواد معروضه دن اکلاشیله جغی و جهله فرانچسکو و یقتوری یا حقوقه تماماً موافق اولیان بعض خصوصات و عاداتی تصویب ایلمش و حقوق دول امتیازاتی تمامیه اهل اسلامه دخی تطبیقه جسارت ایده مامش ایسه ده زمانه و خصوصیه صفت ره باینه سند نسبتله افکاری یك واسع و محق اولدیغی درکاردر .

ینه سالامانق دارالفنونی معلینندن و و یقتوریانک خلفی بولنان دومینیک سوتو Dominique-Soto حقوق و عدالت اوزرینه تألیف ایلدیکی کتابنده و یقتوریا مثللو اسپانیوللرک بر جدیده آچدق قری محارباته تعریض و بونلرک موافق حق اولدق لرینی بیان ایلمشدر . مومی الیهک بشنجی شارل طرفندن آمریقا بر لیلرینی التزام ایدن لاس قازاس ایله اسپانیوللری مدافعه ایلیان سه پول و هدا Sepul-Veda بیننده حکم نصب اولنه رق لاس قازاسه حق و برمش و بو رأیله آمریقا یرلی اهالیسنک اسیر مقامنده استخدامنی منع

ایدن اصلاحات فرمانک صدورینه سبب اولمشدی سوتو مؤخرأ زنجیلرک اسیر ایدیلهک صائلرینی دخی شدیداً تقبیح ایتمشدر . اسپانیازده زویت پاپاسلر نندن فرانچسکو سوارز Francesco-Suares نام ذات دخی De legibus et Des legislature (قانون و واضع قانون اولان جناب واجب الوجود) اسمنده کی اثرنده ایلاک دفعه اوله رق حقوق طبیعیه ایله حقوق دولی تفریق و حقوق دولک یالکز قواعد طبیعیه دن دکل اوروپا و آمریقا ده من القدیم جاری اوله کلان تعاملاتدن دخی متولد اولدیغنی بیان ایلمشدر . اسپانیا دولتتک فلنک اردوسی امراسندن بالتازار آیالا حقوق حریه یه دائر تألیفاتنده خیلی مدققانه صورتده بیان افکار ایدرکه مومی الیهک خلاصه مطالعانی وجه آتی اوزره اجمال اولنه بیلور :

اعلان حرب حتی حکومته عائددر . قورصان و حیدودلر منتظماً محاربه بیله ایتمه لرینه حقوق حریه دن مستفید اوله مزلر . اختلاف دین سبب حرب دکلدر . حقوق دولجه خرسیتیان اولمیانلرک دخی کندی ملکری اوزرینه حق سلطنتلری اولوب بوبابده نه پاپا و نه ده ایمپراطور مداخله ایده بیلور چونکه پاپا یالکز قاتولیک مذهبنده بولنانلرک رئیس روحانیسی اولدیغنی کی آلمانیا ایمپراطور لرینکده عالم اوزرینه تحکمه حقلری یوقدر . فقط اکر ملل مزبور خرسیتیانلغک وجودندن خبردار اولدق لری حالده نشرینه مساعده ایتمز لر ایسه ایله بوسپبله علیهلرینه اعلان حرب

جائزدر . مبارزه منفرده اصولی و علی العموم بین الافراد محارب به در
 علماً مردود اولوب یالکز اعلان حرب حقنه مالک اولان
 حکومتک اذن ورخصتی اوزرینه افراد مقابله بالمثل صورتیه
 معاملات خصمانه به ابتدار ایلیه بیلور . - حربده دشمنک اموال
 منقوله و غیر منقوله سی و سفائی اغتنام اولنه بیلور سه ده مملکتک
 حین تخلیه سنده اشیای مذکوره ینه قدیم صاحب لرینک تصرفنه
 رجوع ایدر یالکز اموال موجوده اشیای منقوله دن اولوبده
 غالب لر بیننده توزیع اولمش و مملکتدن خارجه چیقارلمش بولنور
 ایسه اصحابنه اعاده سی لازم کلز . اسرای حربیه غالبک مالی
 اولور سه ده بو اصولک خرس تیان دولتر بیننده عدم اجراسیله
 اسرا مقابلنده بر مقدار قدیه نجات النسانی عادت اولغله بو معامله
 دقت اولنهرق تدبیر مذکوری یالکز ترکاره (!) حصر ایتک،
 معاهدات و علی العموم دشمنله ایدیلان مقاولاتک احکامنی تمامیه
 اجرا ایتک، هیچ بر سبب و بهانه و یا حیلله ایله تعهدات واقعه بی ایفادن
 قاچماق لازمدر بو صورتله روما قوماندانلردن فابوسک سوریه
 حکمداری آنتوکوس ایله معاهده سننده حکمدار مومی ایبه
 دو تناسنک نصفی براقیله جغنی موعود ایکن هر کینک نصفنی
 کسوب آنتوکوسه ویره رک ظاهراً حکم معاهده بی محافظه و
 حقیقتده اجراسندن اجتناب ایلسی و کذار و مالیرک (فصل اولده
 بیان اولندیغنی وجهله) معاهده صلحیه بی یا ککش تفسیر ایله
 قارطاجه بی تخریب ایللرنی هر حالده شایان تعجبدر . مع مافیه

قور صانلره حیدودلره ارباب عصیان و سوء استعمال ایله غصب
 حکومت ایدن متغلبه یه قارشو ویریلان سوزک هیچ اهمیتی
 یوقدر . محارباتده حیلله و خدعه ایلله نائل ظفر اولغله چالشمقندن
 ممکن مرتبه اجتناب اولنمیدر .

بالتازار آیالا کتابنک سفارت و معاهداتده دائر اولان اقسامنده
 سفرائنک وجودی مقدس اولغله بونلره تعرض اولنماق و بالعکس
 حق لرنده دائماً حرمت و رعایت اولنماق واجبده دن بولندیغنی و
 مع مافیه بو حقوق و امتیازدن خائن وطن اولانلر ایلله ارباب
 عصیان و حیدودلرک حصه مند اوله میسه جقلرینی بیان ایدر .
 مومی ایبه افاده سنه کوره معاهدات یالکز حکومتلری طرفندن
 مأذونیت مطلقه بی حائز ذوات معرفتیه عقد اولنوب اوچ قسمه
 انقسام ایدر قسم اولده غالبک مغلوبه جبراً قبول ایتدردیکی
 شرائط صلحیه و قسم ثانیده بعد الحرب ایکی دولتنک اتفافی
 مشعر عهد داخل اولوب قسم ثالث ایسه غیر محارب ایکی
 دولتنک معاهداتی حاوی اولهرق بوده اوله تدافعی و تجاویزی
 اتفاق معاهداتنه و ثانیاً تجارت و سیر سفائن معاهده لرینه تشعب
 ایلر .

اون التنجی عصرده کسب شهرت ایدن علم حقوق دول علماسندن
 بریده عن اصل ایتالیالی اولدیغنی حالده پروتستان مذهبنده
 بولنمسنده ناشی انکلتریه هجرتله اوراده توطن ایلیان آلبریکوس
 جنتیلایس Albericus Gentillis نام ذاتدر . مومی ایله اسپانیا

وانکاتره بیننده کی محاربانده وقوعبولان مصادرات حقنده اعطای حکم ایتمک اوزره تشکیل اولنان محکمه حضورنده اسپانیا سفائنی مدافعه ایچون وکیل تعیین قلمقله بو خصوصده صادر اولان حکم لک کافه سنی بر کتاب شکلنده جمع ایتمشدر که مجموعه مذکوره حقوق بحریه دولتک باشلی و قدیم اثر لرنددر جنتیللیس حقوق حربیه به دائر تألیفاتنده اثنای محاربه ده طرفین طرفندن رعایتی لازمکلان قواعدی جمع و شرح ایلمش و سفارت حقنده کی اثری دخی بو مسئله به دائر تألیفاتک مقبول و معتبر لرندن معدود بولمشدر مومی الیه بو کتابده سفرانک خائز اولدیغی حقوق و امتیازادن بحثله بونلره هیچ بر وجهله تعرض اولنه . میه جغنی و کندولرینک بولندیغی مملکت قوانین جزائیه سنه دخی تابع اولدقلرینی ومع مافیسه بو امتیاز یالکز نزدنده مرخص بولندقلری دولت ممالکی حقنده جاری اولوب خارجه دایما سفرایه حرمت و رعایت ایتمک طبیعی اولغله برابر حکملری اولیه جغنی و فقط ایلیچیلر ترخیص اولندقلری یرلک قوانین مدنیه و تجاریه سنه متابعته مجبور بولندقلرینی بیان ایدر . بو صوئک مطالعه حقوق دول قواعدنجه مردود اولوب سفرا دایما وطنلرندن چیقماش فرض اولغله ینه کنندی مملکتلری قوانینه تابع قالملی و جوبی بدیهیدر . جنتیللیسک بویله یا کاش بر فکره ذهابنک سببی ایسه روما حقوقی موجبنجه له غا Lega تعبیر اولنان و ولایاتک پایتختنده کی وکیل مرخصلرندن عبارت

بولنان ذواتک روما قوانینه تابعیتی و مؤلفک بوله غاری عادی سفرا مقامنده بالتلقی انلر حقنده کی قاعده یی بورایه ده تطبیق ایلمسی اولمشدر . آلمانیا ارباب حقوقندن قونزاد بروننوس Conrad Brunnus نام ذات دخی اون التنجی عصر میلادینک قسم اخیرنده اصول سفارت (De legationibus) نامیله بر کتاب نشر ایدرک بونده سفرایه و عقد معاهدات و اعلان حربیه دائر معلومات مفیده درج ایلمش و خصوصیه سفرانک بولندیغی محل حکومتنه عدم تابعیت قطعیه سنی بر صورت واضحده اثبات و ارائه ایتمشدر .

غروچئوسدن مقدم حقوق و سیاسیاته دائر نشر آثار ایدنلردن هیچ بریسی فلورانسلی ماشیاوول درجه سنده کسب شهرت ایدر . مامشدر . ماشیاوولک آثارینک همان کافه سی تاریخ و سیاسیاته متعلق اولوب طوغریدن طوغری به حقوقدن بحث ایتماشسه ده حقوق دولت و لووک مختصر بر تاریخنده پرنس نام کتابنی ذکر ایتمدن کچمک قابل اوله مزه . اثر مذکور فلورانسیه دو قه سنک مخدومی لوران دومدیچینک تعلیم و تربیه سی مقصدیله قلمه النمش اولوب بر پرنسک نه صورتله حرکت ایتمسی لازم کله جکنی کوستر و مندرجاتی همان عموماً منافی حقوق بر طاقم قواعددن عبارت اولغله حقمنزلق و حیه کارلق اوزرینه مؤسس احوال سیاسیه مؤلفنک نامنه نسبت اولنهرق ماشیاوولیسیم تسمیه اولمشدر . پرنسک محتویاتنه نظراً بر حکمدار دولتینک

استفاده سیچون یلانجیلغی بغیر حق اتلاف نفسی نقض عهدی
تخریب مالیکی و اهلینک جهالتندن و افکار باطله سندن استفاده
و حتی انلرک تزايدینه غیرتله هر نوع نالایق حرکاتی ارتکاب
ایده بیلور یعنی - مؤخرأ مذهب عیسوی به خدمت ایچون متشکل
محترم بر رهبان کروهنک اتخاذ ایتدکاری قاعده حکمنجه -
ترویج اولنان مرامک حصولی ایچون هر نوع وسائطه مراجعت
جائزدر و نتیجه وسائطی محق قیلار بو وجهله پرنس مشهور
سزار بورجیانی بر ابو حکمدار مودهلی اولوق اوزره ارائه ایدر.
بعض ذوات ماشیاوه لک بو کتابی زمانی حکمداراننی تزییف
ایچون یازدیغنی ادعا ایدر لر سده مومی الیهک سائر آثارنده کی
مطالعاتی و ایثالیانک اتحادینی کمال شدتله آرزو ایتدیکی نظر دفته
آنور و او قاریش قلق و قتلنده بویله بر اتحادک حق دائره سنی
تجاوز ایتدکسزین حصول اجرایی ممنوع اولدیغنی دوشونیلورسه
اثرک جدیدی اکلاشیلور . فی الحقیقه شوراسی درپیش نظر
ایدلک ایجاب ایدر که حقوق دول حکومت مختلفه بیننده کی
مناسباتی تنظیم ایله باخصوص آنلرک وقایه و تأیید استقلالنه
ساعیدر او قتلر ایتالیاده اولدیغنی کبی و طنلرینک حصول اتحادینه
چالشان ذوات قواعد حقوقیه بی اساس حرکت اتخاذ ایدر لر سه
خلف املدن بشقه بر شیئه نائل اوله ماملری احتمالی و پرنس ده کی
احکام دها زیاده ایشلرینه رایه جغنی ایسه در کاردر . ماشیاوه لک
کتابی صرف حقوقه مقبول اولسه بیله بر طاقم یرلرنده کی

مطالعاتک صحتنه مؤلفنک حجت ملیه و محبت وطنیه سنه و خصوصاً
صیله بعض احوال و وقایعی تحلیل و اسبابنه ارجاعده کوستر -
دیکی اقتدار اعجاز کارانه به حیرت ایتماک قابل اوله مز .
بروجه بالا بیان اولنان ارباب تألیف حقوق دولک بعض
اقسام و تفرعاتی حقیقده بسط قواعد موافق اولمشار سده هیچ
بری علم مذکور ی بر صورت لایقده خلاصه ایدرک سائر
اقسام حقوقدن تفریقه و تحصیلنی تسهیل ایده جک بر ذبده
وجوده کتیر مکه موافق اوله مامشدی علم حقوق دولک تأسیس
و علم مخصوص و مستقل حالنه وضعی شرفی ایسه فلنکلی
غروچئوسه عائد اولوب مشار الیه حقوق حربیه و صلحیه
De Jure belli ac pacis نام اثرنده بو مقصدی بروجه مطلوب
استحصال ایشدر .

غروچئوسک اثر مشهورینه اعتراض ایدنر اوله بونده
حقوق بین الدوله اصلاً تعلق اولمیان و صرف حقوق طبیعییه
عائد اولان بر طاقم مواددن دخی بحث اولندیغنی ثانیاً مواد
مبحوته بر صورت منقحهده یازلمیوب تفصیلات زائده ایله مملو
بولندیغنی ثالثاً کتابک مقام استشهادده اوله رق بر چوق مؤلفین
و حکما اساسیه طولدیرلدیغنی بیان ایدر لر بو ادعای اساساً
طوغری ایسه ده بوندن طولانی اثرک تنقیص قیمتنه چالشمق جائز
اوله مز بالعکس انک بو قدر کسب شهرت ایتسنی موجب اولان
شیئینه بو انتظام سز لقلدر . غروچئوسک زماننده منقح و منتظم

بر حقوق دول کتابی یازمق مقتضی اولیوب اولامرده علمک
 وجودینی لزومنی و مشروعیتنی لایقی و جهله اثبات ایتک لازم
 ایدی بو سببه مبنیدر که مؤلف بر بحثی تدقیق ایتدن اکامتعلق
 اولان قواعد طبیعییه بی بیانه و اول بو یولده یازلمش اثر موجود
 اولامغله بختلرینک صحتنی اوزون اوزادی مطالعاتله اثباته و مقام
 استشهادده برچوق اسامی علماء و ادبایی ذکره مجبور اولمشدر .
 اکر کتابده بعضیلرک قصور عدا ایتدکلی بو خصائص بولنسه
 عادی بر حقوق دول کتابی اوله رق اندن اول تنظیم ایدیلان
 آثار کی حکمسنر قالور و زمانه بر تأثیری اولامغله مؤلفیده
 ایکنجی اوچنجی درجهده ذوات عدادینه داخل اولوردی
 دهها محصولاتنده انتظام و ترتیب برینه علویت و عظمت آرامق
 دهها مناسبدر . معترضلر نه دلیل ایراد ایتسه لر غروچئوسک
 علوقدرینه بر نقیصه ویرمزوبومؤلفک مطالعاتنده کی صحتنه حسن
 نیتنه ، حسیات انسانیتکارانه سنه ، درجه و سعتی خارق العاده
 اولان معلومات و تدقیقاتنه متحیر اولماق الدن کلمز .

فصل ثالث

وستغالیه معاهده سندن فرانسه انقلابنده قدر

۱

اوترخت معاهده سنه قدر

« وستغالیه و اوترخت معاهده لری بیننده کچن مدت فرانسه
 « حدودینی رن نهرینه قدر توسعه و اوستریا خاندانک اسپانیا
 « شعبه سندن ارکک وارث قالدیغی زمان بوزنکین وراثتی کنندی
 « عالمه سی ایچون اکتسابه حصر غیرت ایدن اون دردنجی
 « لویینک حریصانه پولتیقه سی نتیجه سی اولان اوزون محارباتله
 « مملودر . دور مزبور ظرفنده بو محارباتک ترقیسی وقتاً من
 ■ الاوقات ۱۶۶۸ ده اکس لاشاپل ۱۶۷۸ ده نیموهغ و ۱۶۹۷ ده
 « ریسویق مصالحه نامه لر یله تعطیل اولنمشسه ده حقیقت حالده
 « بو عهددن هر بری بر متارکه اولوب طرفین محاربتینک وقت
 « قزائمق و حربده دوام ایچون لازم اولان مهماتی جمع
 « ایلکدن بشقه نیتلری یوق ایدی . بو اوزون محاربه زماننده
 « فلنک جمهوریتی ، بو دولتلردن برینک توسیع اراضیسی مناسبیله
 « حاصل اولان خوف و وحشیت و یاخود دیکرنده کی رقابت
 « تجاریه و ادعای حاکمیت بحریه فلنک محافل سیاسییه سنده اس
 « حرکت انحاز اولنمنه کوره - فرانسه و انکارته نک گاه دوست
 « و گاه دشمنی اولدی . »

« بو اوزون و متعاقب محاربه لوله انی تعطیل ایدن مذاکراتک
 « تاریخی حقوق بین الدولک ، اوزوپا دولتری مناسباتده اکثر
 « وقوع بولدیغی اوزره احکامک اخلال اولمسیله برابر ، تر قیده
 « دوام ایتدیکنه بر چوق مثال اراهه ایدر فلنک واسویچره
 « انقلاباتی ۱۶۴۸ (۱۰۲۶) دهکی وستفالیه معاهده سیله تصدیق
 « ایدلشیدی . عین زمانده انکلتزده جمهوریتک تأسسیله ختام
 « بولان و برنجی شارل ایله تبعه سی اولان انکلیر ملتی بیننده
 « واقع اولان محاربه داخلیه بریتانیا اطهرینی اوزوپا اصول
 « سیاسیسندن بسبتون تفریق ایلدی . قروموه لک اصول سیاسی
 « شدت جهتیله ناپولیونک کینه بکزر سه ده فتح مقصدینه مبنی
 « اولیوب محافظه کار ایدی . بوندن بشقه انکلتزهنک اطه اولمی
 « حسسیله موقعی ایوم اولدیغی کبی ، انقلابات داخلیه مناسبتیه
 « توسعی کندیلرنجه امور داخلیه سنه مداخله به بر سبب و بهانه
 « اوله بیه جک رقیب دولترله محاط اولان ، فرانسه دن چوق
 « فرقلی ایدی . یالکز ایکی مملکتک منافع سیاسی و تجاریه لرینی
 « مطمح نظر ایدینان مازارن مقتل اوزرنده حکمدارینک قانی
 « دوکن بر خاصیک حکومتی رسماً طایمقدن چکتماشدی . مومی
 « الیه دولتر بیننده کی مناسبات تجاریه و دوستانه نک اشکال
 « حکومتلریله هیچ بر مناسبتلری اولدیغی قاعده سنی تأیید و کنددی
 « حکمداریله او وقت مطرود و مخلوع بولنان ستوارت خاندانی
 « بیننده عمد اولنان معاهداتدن احکامی باقی اولانلری تماماً و پک

« زیاد ه دقتله اجرا ایدرک انکلتز و فرانسه بیننده حسن مناسباتک
 « اقامه و ادامه سنه غیرت ایلدی .
 « انکلتزهنک ۱۶۸۸ اختلالی رأس حکومته ماهر و غیور
 « بر پرنس اولان و قطعه اوزرنده کی اتفاقلریله اون دردیجی
 « لوئی تصورات حریمانه سنک اجراسنی تصعب ایلین او چنجی
 « کیلیومی کچیرمشیدی .
 « فرانسه حکمداری یالکز او وقت ستوارترله طرفدار
 « اولدی : چونکه منافع سیاسی مشروعیته سلطنت و حق
 « آلهی قواعدیله مطابق ایدی . بو مدت ظرفنده غروچئوس
 « و اخلاقی کبی مؤلفین آثارینک مجالس ملل و حرکات دولده
 « تأثیر نفوذی ظاهر اولور اون یدنجی عصر دیپلوماسیسی
 « اجرای امورده غایت غیور و فعال ایدی . اوراق و محرراتی
 « یالکز ملاحظات سیاسی به دکل قواعد حقوقیه و عدالت
 « و حقانیت ، حقوق عمومی هاتقلرینک حکمنه ، و کندیلریله
 « و تهلکه عمومی ده ذی منفعت اولانلرک اتحادیله ضعیفک حقوقی
 « قوه غالبه نک تجاوزاتنه قارشو وقایه اولنان قواعد و احکام
 « عمومی به دخی بر چوق دعوت و اخطار اتله ملودر . عصر
 « مزده بو مناقشات مقدمانه زائد و متصلفانه کورینور بونلر
 « ضمناً اکلشیلور و اثباتلری ایچون محاکمات عقلیه به و یا علمانک
 « حکم و قوتنه مراجعته احتیاج یوقدر . فقط موضوع بخشمز
 « اولان زمانده انلر هنوز بدیهیات حکمنی حائز اولدقلرندن

« محاکمات ذهنیه و تدقیقاته مناسبات متقابلہ دولی اداره ایدن
 « ویا ایتسی لازم کلان قواعد حقانیت خصوصاً ذوقنون
 « اولانلرک اتفاقی اثبات ایدیجی شهوده مراجعت احتیاجندن
 « وارسته دکلدیلر . » (هـازی ووتیون : تاریخ ترقیات
 حقوق بین الدول . جلد اول صحیفه ۱۰۷ و مابعدی) .

اوروپا موازنه سی مسئله سی اکثریه بو اثارده کسب
 اهمیت ایشدر . فصل ثانیه بیان ایدلدیکی وجهله موازنه
 سیاسیہ دول معظمه نك قوت و قدرتجه همان بر عیارده بولنسی
 خصوصی اولوب بر دولت سائرلرک قوای مجموعہ سنه غلبه
 ایده جک درجده حاز اقتدار اولورسه موازنه اخلاص اولنمش
 عد اولنور بو قاعده نك تطبیقاتی آثاردن اوله زرق اون ایکنجی
 لوئی سکزیجی شارل و برنجی فرانسوا دورلرنده ایتالیا به وقوع
 بولان مهاجمات اوزرینه فرانسه علیه بر اتفاق دولی حاصل
 اولدیغی کبی بشنجی شارلک بر قاچ تخت سلطنتی زیر حکومتده
 جمع ایتسی دخی عین نتیجه یی منتج اولمش و محاربات متحدته
 وستفالیه معاهده سنک عقیده اوستریا خانداننک توسع نفوذی
 تهلکه سی بر طرف اولدقجه نهایت بولماشدی . وستفالیه معاهده
 سی ایسه اوروپاده بر موازنه جدیده حصوله کتیردی شویله که
 وسطی اوروپا یعنی آلمانیا بولنان بر طاقم حکومت اوزرینه
 امپراطورک اسماً و رسماً حق حکومتی اوله زرق حقیقتده ایسه
 بولنلرک جمله سی مستقل اولمغله اوراسی بیطرف حالنده بولنوب

ایتالیاده بو وجهله منقسم قالمش و اوستریا انکلتره اسپانیا
 فرانسه دولتریده بر لرندن اقتدارجه کلی صورتده فرقی
 اولدقندن هر هانکیسی توسیع ممالک و تزید نفوذ غیرتده
 بولنسه دیکرلرک اتفاقیه قارشو نائل مقصد اولمه جغی بدیجی
 بولنمشدی . امور مذهبییه دخی موازنه موجود اولوب بر
 محاربه دینه تحدی حالنده آلماننک پروتستان حکومتی ایله
 فلنک جمهوری و انکلتره و اسقاندینا ویا دولتری و برده قاتولیک
 اولدیغی حالده منافعی دیکرلریله اتفاقی ایجاب ایدن فرانسه نك
 هر حالده پایا طرفدارانه قارشو وستفالیه عهدیه تأسس ایدن
 حریت وجدان قاعده سنی مدافعه ایده بیله جکری درکار ایدی .
 فقط اون درنجی لوئی ذمام اداره یی اننه آلور آلمز جهانگیرلک
 سودالرینه دوشمکه موازنه واقعه یی اخلاص ایلدیکندن تشبثاتی
 علیه بر پروتستان و قاتولیک جمله دولتری بیننده بر اتفاق حاصل
 اولمش و مدت مدیده دوام ایدن محاربات نهایت فرانسه ادعای نك
 بر طرف ایدلمسیه ختام بولمشدر .

اون درنجی لوئی اسپانیا قرالی درنجی فیلیک وفاتی
 اوزرینه حرمنک میراثی آلمق بهانه سیله انکلتره و اسپانیا به
 اعلان حرب و فلاندر قطعہ سنی استیلا ایش و فقط بو تجاوز
 فلنک اوستریا و اسوچ دولتری بیننده بر اتفاق مثلث عقیدنی
 اتاج ایتمکه یالکز فتوحاتندن بر قسمی بالمحافظه اکس لاشاپل
 (آخن) وریسویق معاهدات صلحیه سنی امضا ایله موقتاً

مدعیانندن فراغت اینکه مجبور اولشدی .
 فقط حکمدار مشارالیه کلیاً ترك مقصد ایتدیکنندن و اولکی
 محاربه مناسبیه فلانکیلره اولان خصومتی تسکین ایده مدیکنندن
 بر مدت صکره هولانده اوزرینه هجومله ضبطنه تشبث ایتش
 و اولامرده نائل موفقیت بیه اولمشسه ده پرنس کیلیوم دورانترک
 قطعاً مذکورده رأس امور پکمی مظفریاتنه سدچکدیکی
 کبی مؤخرأ مومی الیه انکلتزه قرالغنه انتخابی اوزرینه
 فرانسه علیهنده انکلتزه فلانک پروسیا اوستریا ساووا و اسپانیا
 دن مرکب بر بیوک اتفاق تشکل ایلشدی . مع مافیه فرانسه
 یالکز اسوچ دولتیله متفق اولدیغی حالده بو قدر دشمنه قارشو
 محاربه ده دوام ایدرک فرانش قوتنه ولورن قطع لرینی دخی
 ضبط ایتش و اکثر فتوحاتی بالمحافظه نیموغ شهرنده شانلی بر
 صلح عقدینه موفق اولشدر . بو نقطه اون دردنجی لوئی
 و دولتک منتهای اقبالی اولوب بوندن صکره دور انقراض
 و انحطاط باشلارکه بونک اسبابیده داخلده پروتستانلر حقنده
 بعض مساعداتی حاوی اولان نانت فرمانک فسخی و بونک موجب
 اولدیغی اختلالات داخلیه و خارجده اسپانیا وراثتی محاربه
 عظیمه سیدر .

موازنده دولیه فکرینک نتیجه سی اولان حق توسطک نه
 درجه ده توسع ایلدیکی بو مسئله بدایتلرنده کوریه بیلور .
 اسپانیا حکمداری ایکنجی شارلک اولادی اولمامسی مناسبیه

وقاتی حالنده اوچ ذانک یعنی اوستریا آرشیدوقی شارلک و یاخود
 باویرا پرنسی ایله اون دردنجی لوئیک حنفیدی دوق دانژونک
 دعوای وراثته حققری واردی حالبوکه اسپانیا و مستملکاتک
 کرک اوستریا و کرک فرانسه ایله برلشمسی بشنجی شارلک حکومتی
 احیا واکا نمائل بر دولت عظیمه تأسیسی دیمک اولغله اورویا
 موازنه سنی اخلاص ایده جکی کبی یالکز باویرا پرنسینه ویرلسنه
 بو ایکی حکومتک راضی اولیه جققری بدیهی اولغله اورویا
 قطعده سی یا جابه نلک استقلاله ضرری طوقنه بیه جک بیوک
 بر دولت تأسیسی ویا بر محاربه عمومیه ظهوری تهلمکه سنده
 بولتمقده ایدی بو تهلمکه نک دفعی ایچون دهها بیچاره شارلک
 حین حیاتنده ذی منفعت اولان دولت طرفندن منحل قاله جق
 مالکک ورثه بیننده صورت تقسیمی مشعر ایکی معاهده یا پلش
 و اسپانیا قرالی ایسه دولتک تمامیت ملکیه سنی محافظه ایتک
 ایستدیکنندن بر وصیتنامه ایله باویرا دوقه سنی کندیسنه
 وارث تعیین ایتشدی فقط مؤخرأ وارث مذکورک وقاتیله
 وصیتنامه نک دوق دانژو لهنه تحویلی و بو کیفیتک معاهدات
 سابقه احکامنه مغایر اوله رق اون دردنجی لوئی طرفندن
 قبولی اوزرینه و شارلک وقاتنی متعاقب اون ایکی سنه مدت
 دوام ایدن اسپانیا وراثتی محاربه عظیمه سی ظهور ایلشدر .

بو محاربه یه ختام ویرن اوترخت معاهداتی اوترخت
 شهرنده اجتماع ایدن برقونفره طرفندن و ۱۷۱۳ (۱۰۷۸ هـ ش)

سندہ سنہ تنظیم اولنوب فرانسه و اسپانیا دولتری ایلہ انکلترہ فلنک ساووا پور تکیز و پروسیا حکوماتی بیننده آری آری عقد اولنان اون معاهده دن مرکبدر اوستریا دولتی ایسه بر مدت دها حربده دوامله نہایت او دخی فرانسه ایلہ آریجہ بر معاهده عقد ایدرک دوق دائرونک اسپانیا قرالغنی تصدیق ایلشدی . معاهدات مذکورہ نکل باشلی احکامی بروجہ آتی تعداد اولنور :

فرانسه و انکلترہ : (۱) ہانورہ خاندانی حق سلطنتنک تصدیق (۲) فرانسه و اسپانیا تختہ لربنک مؤبدأ تقریقی (۳) دونکرک لیمانک تخریبی (۴) شمالی آمریقاده ارض جدیدوسن قریستوف اطہ لریلہ آقادی قطعہ سنک انکلترہ یہ ترکی (۵) فرانسزلرک اسپانیادہ امتیازات تجاریہ یہ نائل اولہ ماملری (۶) مصادرات بحریہ خصوصہ سنہ باندیرہ نکل اشیای تجاریہ بی تعرضدن مصون و ستر ایدہ جکی قاعدہ سنک قبولی —

فرانسه و فلنک : فرانسه ایلہ فلنک جاہیر متحدہ سی بینندہ بر حد فاصل اولق اوزرہ بلچیقانک اوستریا یہ ترکیلہ بو خصوص بر معاہدہ مخصوصہ یہ ربط اولنجیہ قدر بو قطعہ نکل جاہیر مذکورہ طرفندن ادارہ سی —

فرانسه و ساووا : (۱) قرالاق عنوانیلہ برابر سجلیانک ساووا دوقہ سنہ ترکی (۲) آنزو خاندانک انقطاعندہ اسپانیا اوزرینہ اولان حقوقنک ساووا خاندانی عہدہ سنہ تأمین —

فرانسه و پروسیا : (۱) پروسیا قرالی عنوانک رسماً قبولی (۲)

حکومت مذکورہ نکل نوشتاتل پرنسلیکی اوزرینہ اولان حقوقنک تصدیق (۳) فرانسه طرفندن اورانز پرنسلیکی اوزرینہ اولان حقوق وراثتک پروسیا یہ ترکی (۴) اسپانیا قرالی نامنہ اولہ رق کلدر ایالتندہ پروسیا طرفندن عساکر مستحفظہ اقامہ سی — اسپانیا و انکلترہ : (۱) ژبرالتار (جبل طارق) شہریلہ مینورقہ اطہ سنک انکلترہ یہ ترکی (۲) بر تجارت معاہدہ سی عقدینک قرارشمسی (۳) سجلیا اطہ سنک ساووا دوقہ سنہ ترکی —

ینہ سنہ مذکورہ نہایتندہ فرانسه ایلہ آلمانیایمپراطورلغنی (اوستریا) بینندہ منعقد راشتاد معاہدہ سی : (۱) بلچیقہ یا خود اسپانیا فلنکنک اوستریا یہ ترکی (۲) ایتالیادہ میلان و ناپولی و مؤخرأ سجلیا ایلہ مبادلہ اولنان ساردنیانک اوستریا یہ ترکی . احکام مزبورہ دن ظاہر اولہ جغنی و جہلہ اوترخت معاہداتی اوروپانک حالندہ کلی تغیرات حصولہ کتوروب اثری بر عصر قدر پایدار اولمش و بلکییدہ بقایاسی زمانزہ قدر

کمشدن [۱] اون سکزنجی عصرده منعقد کافہ معاهداتندہ اوترخت معاہدہ سنک مفسوخ اولیان احکامی تأیید و تصدیق اولندیغنی کوریلوریا لکزایلاک دفعہ اولہ رق عصرمز ابتدالزندہ عقد اولنان لونه ویل (۱۸۰۴) عہد نامہ سنہ اوترخت نامی مذکورہ کلدر .

وستفالیہ و اوترخت معاہدہ نری بینندہ کذران ایدن مدت

[۱] حتی ارض جدید جوارندہ فرانسزلرک صید ماہی حقنہ دائرہ حکمی سنہ جاریہ قدر تحت قرارہ آئندیغندن اخیراً فرانسه و انکلترہ بینندہ حکم مذکورہ تصدیقاً بر مقاولہ مخصوصہ عقد اولنمشدر .

ظرفنده شرقده ظهوره کلان وقوعات سیاسیه ننگ ال مشهوری
 (۱۰۸۳) ده اوستریا و متفقری ایله دولتمزیننده عقد اولنان قارلویج
 معاهده سیدر. معاهده مذکوره عثمانلیلرک اوروپاده مبدأ رجعتلری
 اولقله معروف ایسه ده حقیقت حالده بو کیفیت پک چوق مقدم
 عقد اولنان سیتواتوروق معاهده سیله باشلامشیدی سیتواتوروق
 مصالحه سی سلطان احمدخان اول زمانده امضا اولنه رق بونکله
 مجارستانک برقمی اوستریایه ترک ایدلمش و آلمانیا ایمپراطورلرینک
 بزه سنوی ویردکاری ویرکو لغو اولنه رق یالکز اوچ سنه ده
 برمقداری معین اولماق و ایمپراطورک ارزوسنه تابع اولق
 اوزره ارسال هدایا اولنه جغی و هر حالده ایکی حکمدار بربرلرینی
 تمامیه مساوی عد ایدرک اول وجهله معامله ده بولنه جقلری
 قرارلشدرلشدر دولت علیه اوزمانه قدر مغلوباً اوروپالیلرله
 عقد صلح ایتدیکی حالده یالکز بو معاهده ایله ترک اراضی
 مجبوریتنده بولنش و اوزمانه قدر حائز اولدیغی موقع مستثنایی
 ترکله دیکرلری کبی بر دولت صفتنی اکتساب ایشدر. قارلویج
 معاهده سی احکامجه ایسه مجارستان و ترانسیلوانیا (تیس و ماروس
 نهرلری بیننده کائن اراضی صغیره مستثنا اوله رق) حدود
 طبیعی سیله اوستریایه و دالماسیا ایله موزه قطعلری و ندیک
 دو جلغنه، قامینیه ق پودولیا او قرانیا ولایتلری لهستانه و آزوف
 قلعه سی روسیه یه ترک اولندیغنه و خرسیتیان دولتر طرفندن
 باب عالی یه ویریلان کافه تکالیف لغو ایدلدیکنه بنا بونکله

ستواتوروق معاهده سنک باشلادیغی کیفیت یعنی دولت علیه ننگ
 مجاورلرینه برکونه حق تفوقی اولماسی خصوصی اکمال اولمشدر
 قارلویج معاهده سی عثمانلیلرک اوروپاده اولان ترقیاتی طور -
 دیردیغی جهتله تاریخچه وقایع عظیمه دن معدود در .

بودورده کسب شهرت ایدن ارباب حقوقدن بری اسوچلی
 پوفندورف درکه (۱۶۳۲-۱۶۸۰) غروچئوسله هم مسلك و فکراً
 انک شا کردی حکمنده اولوب حقوق طبیعییه و ملله دائر لاتین
 لسانی اوزره بر اثر جسیم تألیف ایش و مؤخرآینه کندی کتابنی
 خلاصه ایشدر . بو اثر هر نه قدر غروچئوسک حقوق حریه
 و صلحیه سی درجه سنه واره مزسده یه برنجی درجه مؤلفاندن
 معدود اولوب زمانه نسبتله علم حقوقجه بیوک بر نشانه ترقیدر
 پوفندورفک حقوق طبیعییه ایله حقوق دولت اساسی حقنده کی
 افکارینی مدخل حقوق بین الدول نام اثر مزده اجمال ایشدرک .
 مومی ایله حقوق موضوعه دولت و جودینی قبول ایشسده
 ملتر بیننده جاری و اتفاق عمومی ایله معین بعض قواعد بولندیغنی
 تصدیق ایش و فقط اثنای حربده بو خصوصده اتحاد افکار
 قالمیاجغی جهتله محاربلرک انلرله مکلف طوتیله میه جغنی و بر طرفک
 قواعد مذکوریه بی اخلاصه حق اولوب یالکز طرف دیکردنده
 مقابله بالمثل اولنه بیله جکنی بیان ایشدر .

لایب نیج - Leibnitz - (۱۶۴۶-۱۷۱۴) علم و معلوماتک
 وسعتی سایه سننده اقسام حکمتک چله سندن بحث ایتدیکی کبی

حقوق طبیعیہ و دولی دخی سرمایہ مقال ایلشسده بوکا دائر
منقح برائی اولسامغله افکاری پراکنده اولهرق محررات و
آثارنده اراالملق اقتضا ایدر یالکز نشر ایتدیکی معاهدات مجبو-
عه سنک مقدمه سی حقوق دولدن باحث اولوب بونده علم
مذکورک اساسی حقوق طبیعیہ اولدیغی و فقط موافقت دول
اوزرینه مؤسس قواعد دخی موجود اولوب بونک ایسه هر
زمان و هر ملت ایچون مساوی اولیهرق بالعکس متحول
بولدیغی افاده اولمشدر .

انکلتزه مشاهیر حکما سنندن هوبس Hobbes (۱۵۸۸ - ۱۶۷۹)
دخی حقوق دولدن بحث ایله منشأ حقوق خصوصنده افراد و دول
مساوی اولوب ملتر و افرادک اذمنه قدیمده حال طبیعی اوزره
یشادقلرینی و بو حال ایسه برحرب دائمیدن عبارت اولدیغی
ادعا ایلش و بو فکر فلنکلکی اسپینوزا Spinoza (۱۶۳۲ - ۱۶۷۷)
نام فیلسوفک دخی مظهر قبولی اولمشدر . اسپینوزانک
مطالعاتنه نظراً حال طبیعی بشر حرب اولوب چونکه هر کسک
هر شیئی استعماله حتی اولمغله برشیک تصرفندن طولایی
ایکی شخص اراسنده بر اختلاف چیققدده - ایکیسیده عینی
درجده حقلی اولمغله - منازعه یه انجق غوغا ایله ختام
ویریه بیلور ، دولترده ازمئه قبل تاریخیه ده کی افراد کی حال
طبیعیده بولندقلرینه مبنی یالکز کندی نفع و ضرر لرینی اساس
حرکت اتخاذ ایتلیدر لر بوجهتله معاهداتک مجبوری اولسی یالکز

انک موجب عقدی اولان تهلکه و یا منفعتک بقاسیله قائم اولمق
اقتضا ایدر . - بو صورت ملاحظه نک یا ککش اولدیغی اثبات
احتیاجندن وارسته در . هر کس اشیای موجوده اوزرینه عین
حقوقه مالک اولسندن بر فردک دیکرینی برشیک استفاده سنندن
منعه و حتی حق تصرف و تملکی آباق التنه آلمغه حتی اولدیغی
استنتاج اولنه مز هر فردک حقوقی حقوق دیکرله مقیددر . حال
طبیعی ایسه هر کسک حقوقی قوای ذاتیه سیله وقایه ایتسی
اولوب یوقسه بهمه حال جمله نک حقلی حقسنز حربده بولنسی
دکادر . معاهداتک حکمی حقنده کی مطالعه ایسه هم حقوق
و هم اخلاقه مغایر اولوب قبولنده کی مضرت محتاج ایضاح
دکادر .

استراسبورغ شهری معلمزندن ژان ژواکم ذنت غروفک
حقوق دولک منبع و حقیقت و تعهداتنه دائر ۱۶۶۰ ده نشر
ایتدیکی کتابده پوفندورفک فکریته مخالف اولهرق حقوق
موضوعه دولک وجودی التزام اولمشدر .

انکلتزه علماسنندن و اوقسفورد مکتب عالیسی حقوق
معلمکنده جنتلسدیسک خلفی بولنان ذوخ (Zouch) (۱۵۹۰ -
۱۶۶۰) (۱۶۵۰ سنه سننده حقوق دوله دائر مختصر بر اثر نشر
ایتشددر که علم مذکوره (Jus Intergentes) (حقوق بین الملل
ویا بین الاقوام) اسمنی ویرن مومی الیهدر .

ینه انکلتزه ارباب حقوقندن جون سلدن (John Selden)

(۱۵۶۴ - ۱۶۵۴) حقوق طبیعیہ ودولہ دائر تالیف ایلدیکی اثرده قواعد طبیعیہ دولیه ایله قواعد اختیاریه یعنی حقوق طبیعیہ وموضوعه دولی بربرندن تفریق ایلش وغروچئوسک سربست دکر (Mar cliberum) عنوانلی رساله سنه جو اباً تالیف ایلدیکی بحر مسدود (Marec lausum) نام رساله ده انکلتزه حکومتک ابحار متجاوزه اوزرینه حق حاکمیتی بولندیغنی اثباته غیرت ایتشدر .
اسامیسی بالاده مذکور اولان ذواتدنبشقه بعض مؤلفین دخی زمانلرنده کسب شهرت ایتشدر که بولنلرده بروجده آتی تعداد اولنالردر .

(۱) حقوق بحریه ده دائر بر اثر مشهور صحابی اولان اسوچلی معلم ژان لوق چه نیوس (Jean Luccenius) (۲) انکلیر لئون جنکینس (Leongenkins) (۳) کیهل دارالفنونی معلملرندنو غروچئوسه مخالف بر مسلتک احداث ایدن ساموئل راشل (SamuelRrehel) (۴) قوانین طبیعیہ نام اثرنده هوبسه قارشو مقالات بشریه خارجنده اخلاق طبیعی بولندیغنی اثبات ایلیمان انکلیر کومبرلاند (Cumberland) (۵) سفرايه دائر برساله تالیف ایدن فلنکلکی ویقفورت (Vicfort) (۶) هانزه شهرلی حقوق بحریه سی اوزرینه برساله مؤلفی اولان کوریک که (Kuricke) (۷) حقوق عمومیه وقوانین مدنیه ده دائر تالیفات بولنان فرانسر دوما (Dumas) .

بوعصره قدر اوروپاده محاربات ومناسبات بحریه جه شهیندر خانه بحری قواعدیه نمالتک مختلفه ده آره صره نشر ایدیلان تعلیمات ونظاماته اتباع اولنمقده وقرون وسطی بختنده بیان ایتدیکمز وجهله شهیندر خانه بحری احکامجه محاربات بحریه ده یالکز دشمنک سفائن و اشیا سی ضبط اولنه بیلکله دشمن کیسنده بولنان بیطرف اشیا نک و یا خصمایه عائد مواد نقل ایدن دوست ملت سفائنک مصادره سی جائز اولما مقده ایدی . فقط اون دردنجی لوئی زماننده فرانسه نک امور بحریه جه وقوعبولان ترقیاتی اوزرینه اصول وقوانین قدیمه وجدیده مأخذ اتخاذ اولنهرق نشر ایدیلان بحریه امر نامه سنده بوکا مخالف برخط حرکت تعیین ایلدی یعنی بیطرف سفینه ده بولنان دشمن اشیا سنک و بیطرف اشیا بی حامل دشمن سفائنک قواعد سابقه ده تطبیقاً ضبطی قرارشدر لدقندن صکره اول فرانسه ده بالتظیم اجرادن ساقط اولان برقاچ نظامه استناداً دشمن اشیا سی طاشیان بیطرف سفائنک ودشمن کیسنده بولنان بیطرف اشیا نک دخی مصادره ایدیله جکی اعلان اولندی . قاعده جدیده یالکز اسپانیا دولتی جانبندن قبول اولنوب دول سائره ینه اصول قدیمه ده اتباعاً یالکز دشمنه منسوب سفائن و اشیا بی مصادره ده دوام ایلدی لر سه ده نهایت بوده متروک اولهرق سربست سفینه سربست اشیا اصولی یعنی کینک سربستلکی حوله بی دخی تعرضدن مصون قیله جغنی صورت عمومیه ده اولهرق مظهر قبول اولدی .

بر مدت دهها دوام ایستاده اوست. اوست که این عصر نه‌ایندیده کلیاً
اجرادن ساقط اولمشدر .

۲

پارس و هوبرتسبورغ معاهده لرینه قدر

اوترخت معاهده سیه تأسس ایدن صلح بکرمی یدی سنه
مدت باقی قالمشدری . اوست دردنجی لوئیک محارباتیه بتون
اوروپا یوریه زق راحت آرزو سنه دوشدیک کی فرانسه ده
دخی دوق دورلثان وقار دینسال فلوری وانکترده روبرت
والپول - اداره داخلیه لری اوقدر شایان ستایش اولمامغله
برابر - خارجاً وقایه صلحه غیرت ایتدکرینه و معاهده مذکوره
ایله تأسس ایدن موازنه ده حد ذاتنده پک عاقلانه ترتیب اولمش
اولدیغنه مبنی بر ربع عصری متجاوز اوروپا قطعده سی حرب
وغدغه سندن خالی اولمشدی . فقط انکلیرلرک سلطنت بحریه جه
تفرده اولان آرزولری اسپانیا ایله بیلننده ۱۷۳۹ تاریخنده
بر محاربه تحذنی و بوکا ۱۸۴۴ ده فرانسه نك دخی دخولنی
ایجاب ائلمکه و ۱۸۴۰ سنه سنده دول معظمه بیلنده اوستریا
ورائتی مجادله مشهوره سی ظهور ایتلمکه ینه صلح عمومی محتمل
اولدی . اوستریا و آلمانیا حکمداری التنجی شارل ممالک موروثه سی
قزی ماری ترز عهده سنده تأمین ایچون بر وصیتنامه تنظیم ایله

اهالی مجالس عمومیه سنه تصدیق ایتدیرمش و بیوک فدا کار لقلر
اختیار یله فرانسه و پروسیا حکومتک موافقت رسمیه سنی استحصال
ایشدی . فقط مشارالیه ایمپراطورک وفاتنی متعاقب ساردنیا
ساقسونیا اسپانیا باویر اوپروسیا دولترلندن کی تکمیل ایمپراطورلق
و کیمی بونک بر قسمی اوزرینه حقوق سلطنت و وراثت ادعاسنه
قالقشوب فرانسه دخی هیچ برسبب ظاهری اولدیغنی حالده
بونرله اشتراک ایلدیکنه و ماری ترزده فتور کتور میوب سلاحله
وقایه حقوقه تشبث ایتدیکنه مبنی سکز سنه دوام ایدن
بو محاربه باشلامشدر . پروسیا قرالی بیوک فرهدریق ابتدای
حربده اساس مقصدی اولان سیزلیایی ضبط ایدرک ۱۷۴۵
سنه سنده قطعه مذکور هک کندیسنه ترکی اساسی اوزره اوستریا
ایله بره سلاوده عقد مصالحه ایلدی . دیگر متفکر ایسه اوچ
سنه دهها حربده دوامله نهایت اولان فرانسه وانکتره طرفلندن
ترک فتوحات اولتمق ثانیاً سیزلیا و غرچ دووقه لقلری پروسیا
عهدیه سنده تأمین قلمق و ثالثاً ماری ترز لهنده کی وصیتنامه ایله
هانوورا خاندانک آلمانیاده کی حقوقی تصدیق ایدمک اساسلریله
اکس لاشاپلده امضای معاهده ایلدیله .

اکس لاشاپل معاهده سنک حکمی پک آز وقت جاری
اوله ییلدی ۱۷۵۶ سنه سنده انکلتره و پورتکیر ایله فرانسه بیلنده
آمریقا مستلمتکاتی حدودی منازعه سندن طولانی بر محاربه ظهور
ایدوب بوکا فرانسه نك متفق اولان اسپانیاده داخل اولدیغندن و

نشر له توغل ایشدر . مومی الیه ۴۳، ۱۷۴۲ سنه لری آره سنده
 حقوق طبیعیه ودول مباحثی جامع غایت جسم بر اثر تألیف
 ایدوب بونی ۱۷۴۹ سنه سنده خلاصه ایدرک حقوق ملل نامیه
 طبع ایتدیرمش و بو اثر لرنده سائر حکیمانک اثرینه بالافتقا قواعد
 دولیه بی اخلاق افراد ایلله مزح ایتدیوب آریجه و صورت
 مستقله ده اوله رق تدوین ایشدر . وولف مدخل حقوق بین الدوله
 بیان ایتدی کمز اوزره حقوق طبیعیه دولدن بشقه برده حقوق اختیاریه
 شعبه سی آروب بونی دولترک طبیعت مصلحت ايجابية اوله رق
 رعایته مجبور اولدقلری و بو وجهله موافقت ملحوظه لری اوزرینه
 مستند قواعد مجموعی اولق اوزره تعریف و کندوسی هیئت
 سیاسییه مجموعنی یکو جود فرض ایلدیکندن قسم مذکوری
 بو هیئت عمومیه نک حقوق مدنیه سی عدایله حقوق عهدیه بی
 موافقت صریحه و حقوق عرفیه بی موافقت ضمنیه دول اوزرینه
 تأسیس ایتدیرر . حقوق اختیاریه حقیقه کرک وولف و کرک
 بو خصوصه انک فکرینی التزام ایدن و اتلک مطالعاتی مصیب
 اولدیغی محل مخصوصنده اثبات ایدیشدر . بو مسئله ده
 غروچاوس دخی وولف ایلله هم فکر اولیوب حقوق اختیاریه بی
 بسبتون موضوع اولق و منشائی عادات و تعاملات بولنق اوزره
 تعریف ایدر . حالبوکه وولفک قولنججه بونک قواعدی طبیعتدن
 متولد اولوب حکمیده عموم ملتک حقیقه جاریدر .

واتل (۱۷۱۴-۱۷۶۷) پروسیا داخلنده نووشاتل

پرنس سلیکنده بالتولد لایب نیچ وولفک مسملکری اوزره علم
 حکمت و اخلاقی تحصیل و حتی بو مسملکک اراده جزئییه متعلق
 احکامنی مدافعه ایچون برده اثر نشر ایش وبعده ساقوینایه
 کیدرک دیپلوماسی طریقنه سلوک ایشدر . «حقوق ملل
 یاخود قانون طبیعتک حرکات حکمداران وملله تطبیقی» نام اثری
 حالا مشهور و مقبول و اثردهما اولق اوزره معروفدر . و اتل
 تألیفاتنده وولفک افکرینی اساس انحاز ایشدهده کیف مالتنق
 جمله سنی قبول ایتدیوب بعضاً انلردن کلی صورته مباحثت ییله
 ایشدر . مومی الیهک حقوق دولک تعریف و تقسیم و اساسی
 حقیقه کی مطالعاتی مدخلده تفصیل اولدیغی جهته بوراده
 تکرار لرندن صرف نظر اولنور .

میدلبورغ اهالی سندن یلندر شوق Byndershoek (۱۶۸۳-)

(۱۷۴۳) بحق بودرک ال بیوک مؤلف لرننددر و حقوق دولک
 تحصیلنه الویریشلو منقح بر اثری یوقسهده مسائل مهمه سندن
 اکثری سنی آیری آیری تدقیق ایش و مشلا ۱۸۰۲ ده حقوق
 بحریه و ۱۷۲۲ ده سفارت حقوقه دائر برر اثر نشر و مسائل
 حقوق عمومیه کتابنک فصل اولنده حقوق حریه بی موضوع
 بحث ایشدر . مسائل حقوق خصوصیه نامنده کی ناتمام کتاب
 ایسه خصوصیه رومما حقوقی مسائلنک حل و تفسیر ییله مملودر .
 مومی الیه برنجی اثرنده انکلتره دولتنک حاکمیت بحریه حقیقه کی
 مدعیاتنی جرحله سربستی بحاری التزام ایش و ایکنجیده

اوله رق عثمانلیلرک دخی سائرله مساوی عد اولنسی بو
مصالحه نك اعلانیله وقوعبولمشدر . بو جهتله مصالحه مذ کوره بی
تعقیب ایدن ازمنه - وقوعات سیاسیہ سنک بروجه آتی بالاجمال
بیانی مناسب کورلدی :

روسیه دولتی ایله دولتمز بیننده مناسبات سیاسیہ سلطان
بازید ثانی زماننده موسقوه غراندوقه لری طرفندن در بار
معدلتقرار عثمانییه سفرا ارسالله باشلامشسه ده دولت مزبوره
ممالک و حدودینک بعدیتی و اداره سنک عدم انتظامیله قوتنک
آزلغی و تجاوزلری وقوعبولسه بیله بونی دفعه تاتار خانلرینک
قوتی بلغاً مابلغ کفایت ایتسی مناسبتیله روسلره اهمیت ویرلماش
وحتی آزوف قلعه سنک ترکی بیله اولقدر سوء تأثیری موجب
اولمامشدی فقط حکومت مذ کوره نك بیولک پترو اداره سنده کسب
ایلدیکی قوت و اقتدار ونوعاً متفهمز اولان اسوچ قرالی تیمور
باش اون ایکنجی شارلک مغلوبیتیه بندره النجاسی اوزرینه
روسیه یه اعلان حربہ لزوم کورینوب پترونک او زمانه قدر
جایه مزده بولنان قزاقلره وله حکومتنه تعرض ایتسی بووقعه نك
تسریعی موجب اولدی و محاربه واقعه ده روسیه نك مغلوبیتیه
ایمپراطورک پروتده تسلیم نفسه مجبور اوله جق درجه ده
صفشدیرلسی اوزرینه آزوفک اعاده سی ، تا غاروغ لیماننک تخریبی
وحدود اوزرنده موسقوولر طرفندن انشا ایدیلان قلاعک هدمیله
دولت مزبوره نك قزاقلر ولهلیر امورینه هیچ بر وجهله مداخله

ایتمامسی شرائطیله فالتش عهدی امضا و شرائط واقعه مؤخرآ
منعقد استانبول وادرنه معاهده لرله دخی تصدیق و بعض
تعویلاتله تأکید اولندی (۱۷۱۳) . ادرنه مصالحه سنک اجرا
ایتدیکی تبدلاتدن اوله رق چارلرک هر سنه ویردکاری قرق پیک
لیرا ویرکو لغو اولنهرق بوکا مقابل آزوف اراضیسی توسیع
ایلدیشدی .

ینه سلطان احد ثالث زماننده قره طاغلورلرک بر عصیان
بهانه سیله وندیکه آچیلان و اوستریانک دخی اولاتوسط وبعده
سلاح بدست مداخله سیله بیویان محاربه دولتمزک اوستریا
طرفندن مغلوبیتی و وندیکلورده غلبه سیله و پاساروویج (۱۷۱۷)
مصالحه سنک قرارلشمسیله ختام بولوب جمهوریت محاربه دن
موره قطعده سی استرداد اولنهرق طمشوار و بلغراد قلعه لری
وسائر بر طاقم محار بلادی اوستریالویه ترک ایدلدی و بو ائاده
بیولک پترو ایله دخی تجدید معاهده اولنوب بونده له حکومتنک
هیئت حاضرده سی یعنی اصول انتخاب ایله ممالکک وسعت وتمامیتی
دولتینک تحت ضماننده اولمغله بر تبدل وقوعی حالنده طرفین
معاهدینک مشترکاً ویا آیروجه مداخله یه ولزوم کوردکاری
تدابیری اتخاذ جقلری اوله جغی و برده قدس شریفه ایفای حج
ایچون کیده جک روسلردن بر کونه ویرکو النیوب ملت مذ کوره
رهباننک دخی هر نوع تعرضدن مصون اوله جقلری ذکر
اولندی . بو ایکی مواددن اولکیسی لهستان تقسیمنه وایکنجیسی

روسیه نك كرك ارض مقدس و كرك اورتودوقس كلیسائی
حقننده کی مدعیات و اهیة اخیره سنه برر مقدمه عد اولنه
بیلور .

روسیه ایمراطوری بیوک پترو دولتمزله اولان مناسباتنی
بو وجهله تنظیم ایلدکن صکره نظر دقتنی جنوبه عطف
و ایرانک داخلی قاریشقلقنندن استفاده ایله بحر حزر اوزرنده کی
ممالک استیلاسنه تشبث ایش و بو حرکت بزم - ایرانی
تحت جایه مزه الهرق اجانب تعرضندن وقایه ایتکلکیزی
ایجاب ایلدیکی حالدده هر نصلسه صورت دیکرله استفاده
آرزوسنه دوشلدیکنه و کورجستانک قسم اعظمی اوزرینه
هجوم اولندیسنه مبنی - بالاخره ایران دولتیله محارب
اولمقلغمیزی انتاج ایشدی . محاربه خیلی مدت دوام ایدرک
نهایت سلطان جنتمکان محمود اولک اوائل سلطنتنده شاه طهماسب
ایلله فائدهلی بر صلح عقد اولنش ایسه ده مؤخرأ جالس تحت
حکومت اولان مشهور نادر شاهک موفقیتی بالجمله فتوحاتیزی
اعاده ایتکلکیزی موجب اولدی و بو صورتله حرب واقع بهوده
یره بر چوق مال و جان تلفنی و دائماً اتفاق اوزره یشامقلغمز
لازمکلان بر دولته خصومت قدیمه مزک تجدینی و باخصوص
روسیه نك توسع نفوذیله فتوحاته اولان آرزورینک تزایدینی
انتاج ایدرک حقننده بر فائدهنی مفید اولدی . بز بعد المصالحه
ینه ایران علیهنده تدارکانه مشغول ایکن روسیه چاریچه سی

قآرینه ایلله اوستریا ایمراطوری و یانه ده تدافعی و تجاوزی بر اتفاق
عقد (۱۷۲۵) و هیچ بر محاربه ده آیری آیری مصالحه ایتیه جملگی
حقننده عهد و میثاق ایدرک معاهدات سابقه خلافه اوله رقی
استقلالی تحت ضمانت زده بولنان لهستان امورینه مداخله
باشلامشله و هر نقدر فرانسه اولامرده لهستانی وقایه اوستریا
اعلان حرب ایشسه ده سلطان محمود ایلله اون یشنجی اوئی
حکومتلری بیننده اتفاق ایکی طرفنده آرزو اولندیغی حالدده
بعض اسبابک حیلولتیله حصول بوله مدیغنه و دیکر طرفدن بونک
وقوعندن احترازأ اوستریا نافع شرائطله عقد صلحه رضاداده
اولدیغنه مبنی فرانسه و یانه معاهده سنی عقده حربدن چکلیمشدی
بو صورتله دولت علیه نك قدیمی متفقلرندن اسوچ کایا پریشان
ولهستان روسیه نفوذینه داخل اولدقدن و فرانسه ایلله متفقلری
دخی هنوز صلح ایدرک یکی بر محاربه یه دخوللری احتمالی
قالدقدن صکره صره و یانه اتفاقنک مقصد خفیسنی اجرا یه کلدیکندن
چاریچه بر بهانه بوله رقی حکومت عثمانیه یه اعلان حرب و اوستریا
دولتی اولامتوسط صفتیله مذاکره یه کیریشوب اکیال تدارکات
ایلدکدن صکره قدیمدبری متخدی اولان اصول اوزره بودفعه ده
اخانت و سوء نیت کوسترهرک روسلرله اتفاقنی اعلان ایلدی .
ابتدای حربده موفقیت روسلر طرفنده قالدیسه ده مؤخرأ كرك
بونلر و كرك اولاح صرب و بوسنیه یه تجاوز ایش اولان
ایمراطور اردولری بر قاق بیوک مغلوبیتسه دوچار اولدقلرینه

و خصوصاً صیغه اوستریا دولتی زیاده صفتشوب طلب صلح ایلدیکنه
و فرانسه نك توسطی و بوراده کی سفیر کبیری موسیو دووویل نووک
(Villeneuve) و ساطیله بلغراد شهرنده دول محاربه ایله آیری
آیری ایکی معاهده (۱۷۳۹) عقد اولندی . بلغراد معاهده سی
کرك دولتمز و كرك بونی تحت کفالتنه آلان فرانسه ایچون
بر موقعت سیاسیة عد اولنه ییلور و قارلوویچ مصالحه سنك سوء
تأثیرینی ممکن مرتبه محو ایلدیکی کی فرانسه دولتمك شرقه
اولان نفوذینك منتهای اعتلا سیدر فقط نه چاره که صکر دلی
امور دولت ینه قاریشق کتمکله قاینارجه و یاش معاهده لری بونك
تأثیرینی ازاله ایلشدر . اوستریا ایله منعقد معاهده حکمنجه
ایمپراطور بلغراد قلعه سیله صربستانک ید ضبطنده بولنان محالی
و اوستریا ید تابع اولان اولاح ممالکی اقسامیله قباچی قلعه سنی و اورسو و
اطه سنی ترک و اعاده ایلدیکنه و روسیه ایله اولان عهد ایجابنجه
دخی آزوف قلعه سی هدمله اراضی سی ایکی حکومت بیننده حد
فاصل تعیین و روس تجارانی عثمانلی کیملری استخدام ایلک شرطیله
قره دکزده سربستی تجارت اعلان اولندیغنه مبنی ممالک
عثمانیه غایت واسع و حدود طبیعی سه سینه داخل قالب بعدما
از هر جهت تماماً و قایه حقوق اولمقله برابر روسیه ایله خوش
چکنلدیکی و دائماً احتیاط اوزره حرکت و فرانسه ایله و قایه مودت
اولنه رق اوستریا دن احتراز اولندیغی و داخلی حقوق سلطنتک
تمامی محافظه سه سینه اعتنا قلدیغی حالده دولتمزك آز وقت ظرفنده

اوروپاده قدیمأ حاز اولدیغی موقعه کچه جکی بی اشتباه ایدی .
بلغراد معاهداتندن و بونلری متعاقب اسوچ دولتمیله عقد
اولنان تدافعی و تجاوزی اتقاقدن لایقی وجهله استفاده اولنه مامسی
بر طاقم اسبابك تأثیری نتیجه سیدر که بونلرک الك باش لیملری
بروجه زیر تعداد اولنور : (۱) فرانسه ایله اولان قایدتولا
سیونلر تجدد و بر طاقم امتیازات و معافیات دهضم اولنه رق
جمله سنك ایکی دولت طرفندن محض بر تجارت معاهده سی شکنه
و ضعیله اول حاز اولدق لری احسان و عنایت صفتنك غائب ایتدیرلمسی
و بوضورتله موقعت واقع دن بالاستفاده دولتمزك موقعه قدیمی
اکنسابه غیرت لازم مددن ایکن بالعکس حقوق سلطنت
داخلیه مزك تقلیلنه چالشمسی (۲) اوستریا وراثتی محاربه سه سینه
هیچ مداخله اولنماسی و مجارستانک یکیدن ضبطیله شوکت
قدیمه نك اعاده سی قابل اولدیغی حالده امنیت تامه حالنده قالنه رق
نهایت روسیه نك دخی طوغریدن طوغری به اوروپا امورینه
مداخله ایله دول معظمه عدادینه دخولنه نتیجه ویردیرلمسی .
زیرا امور مجربه دندرکه بر حکومتله مناسبات کثیره ده بولنان ایکی
دولت بربریله محارب اولور سه حکومت مزبور نك ایکی سندن برینی
التزام ایلمسی لازم و بیطرفی تام اوزره قالور سه بو حرکتی طرفینک
دخی عدم خشنودیتی ایجاب ایتسی و نهایت کندیسنك ده دولت
غالبه جانبدن دوچار تعرض اولسی لابددر . اوستریا وراثتی
محاربه سه سینه مداخله ایتدیرک دولتمز اوروپا هیئت سیاسی سه سینه

ومذاکرات دولیه سنه داخل اولق فرصتی غائب ایلدیکی کبی اوستریا و روسیه نك خصوصت قدیمه لری ینه باقی قالمش و فضلہ اوله رق فرانسه نك حسیات مودتکارانه سنه دخی خلل ککشدر حتی دولت مذکورہ نك ۱۷۵۴ سنه سنده اوستریا ایلہ براتفاق عقد ایلدیکی و بونده ورسایل قایینه توسنک وردزبانی اولان دولت علیه نك تمامیت ملکیه سی مسئله سندن بحث بیلہ ایلدیکی معلومدر ۰ (۳) اولاح و بغدادان یرلی و ویوودلرینک اخلانده بولندقلری و روسیه ایلہ برلشکلری ثبوت بولدقدن صکره بورالری سائر ممالک شاهانه مثلہ و ایالت پاشاربلہ اداره ایتدیرلیوب مملکتین حکومتنک متصل داخلده ظلمنریلہ اہالی بی عثمانلیلردن تغیر ایدن و خارجده انتریفه لریلہ دولته بیبک غائلہ آچان فنارلی روم بکارینه تفویضی (۴) روسیه نك لهستان اوزرینہ آمال حریشانه سی معلوم اولدیغی و لہدن صکره نوبت تعرض بزم طرفلرہ کلہ جکی درکار بولندیغی حالده وقتیلہ اکمال تدارکات اولنہ رق روسیه نك اجرای آرزو سنہ ممانعت و بعدہ دولت مزبورہ ایلہ تجدید روابط مخادنتہ غیرت اولنہ جق یرده مدت مدیده راحت او طورلدقدن صکره مفقودیت اقتدار ایلہ اعلان حرب اولنمی و نہایت کوچک قینارجه معاہدہ سنک (۱۷۷۴) عقیدنہ سببیت ویرلمسی ۰

قینارجه معاہدہ سنی انتاج ایدن محاربه نك صورت ظهور و جریان و نتایجی معلوم اولغلہ تفصیلہ حاجت یوقدر بالکز

انکلترہ نك حتمزده کوستردیکی آثار محبت ! او نودیلہ جق شیلردن دکدر شویله کہ فرانسه دولتی بزم ایلہ بالاتفاق حربہ داخل اولق نیتندہ بولندیغی و بو حالده مظفریتک بزم طرفده قامسی احتمالی و هر حالده اولقدر مغلوب اولمیه جهمز درکار اولدیغی حالده انکلترہ فرانسه مداخلہ ایتدیکی و حتی بزه معاونت ایچون بحر سفیده بالکز بردونما کوندردیکی صورتده بو حرکتی موجب حرب عد ایلدہ چکنی رسماً بیالہ دولت مذکورہ بی حربہ قارشدن منع و بزی وادی هزیمتہ سوق ایلش و دشمنک تکالیفی قبول مجبوریتندہ برافشدر ۰ قینارجه معاہدہ صلحیہ سنک باشلی احکامی بروجہ آتی تعداد اولنور : (۱) ۰

تاتار خانلرینک روسیه نك تحت ضمانتده اوله رق استقلاللری (۲) قریمک استقلالنی تأمین ایچون قیلبورنویکی قلعه و کرج ایلہ آروفک روسیه یه ترکی !! (۳) کوچک و بیوک قبار طای قطعہ لرینک روسیه یه ترکی (۴) قرہ دکزده موسقوف حرب کیلری ایچون سیر سفائیک سربستلیکی (۵) لهستانک هر نقدر ذکر یوق ایسه ده بو مملکت اوزرینہ حق حایه مزنی تعیین ایدن معاہداتک لغوی (۶) روسیه نك ید ضبطنہ چکن اولاح و بغدادنک امتیازاتنہ خلل کتیرلماک و بونلرہ برتعرض وقوعنده روسیه دولتی طرفندن ایضاحات طلب اولنہ بیلک اوزرہ حکومت عثمانیه یه اعادہ سی ۰ بو شرط مملکتک اعادہ سی حسیبلہ طبیعی و ایضاحات مسئله سی دخی دوستانہ برمداولہ افکاردن عبارت

اولی لازم کله جکی بدیهی اولدیغی حالده روسیه بوبندی
 سوء تفسیر ایدرک بالاخره وپارس معاهده سنه قدر مملکتین اوزره
 نو عمأ برحق جایه اجرالیشدر (۷) ممالک عثمانیه ده دین عیسوینک
 هر نوع تعرضدن مصون قاله جغی رسماً تعهد اولنمسی . دولت
 مذکورہ بوماده بی دخی غایت واسع صورتده تفسیر المملکه مدت
 مدیده عموم خرسیان عثمانلیلر اوزرینه حاملک ادعا سنده
 بولنمش و بو ادعا نهایت قریم محاربه سنک تحدثنی موجب اولمشدر .
 ایکنجی قاترینه نک مقصد اصلیمی تاتارلرک استقلال و حضور
 و راحتلری دکل بالعکس کندی تابعیتنه کیرملری کیفیتنی اولغله
 انعقاد مصالحه بی متعاقب خانلرک انتخابنه مداخله و داخل مملکتده
 فرقلر احداث ایله محاربات داخلیه ظهورینی موجب اولدقدنصکره
 اعاده آسایش بهانه سیه قریمه اردولر کوندلر مش و بردها
 چقماش ایله شبه جزیره نک استقلالی قاینارجه مصالحه سیه
 مصرح اولدیغندن روسیه نک حرکتی بزجه سبب حرب ایسه ده
 مغلوبیتک محقق بولنمسی و فرانسه نک اخطاراتی باب عالی بی صلحه
 میل ایتدیر مش و چاریچہ ایله ایکنجی ژوزف بیننده و کرسون
 شهرنده ملکیزک تقسیمی ایچون وقوعبولان مذاکره نظر
 بیقیدی ایله باقق مجبوریننده بولندیر مشدی . فقط روسلرک تجاوزات
 غیر محققده دواملری و باخصوص - فرانسه بی یازہ معاونت
 و یاروسیه به طرفدارلق ایدرک برنجی صورتده قاترینه ایله عقد
 ایتدیکی معاهده تجاریه منافعدن محروم برابق و حال ثانیده دخی

ممالک شرقیه اوزرینه نفوذینی کلیاً ضایع ایتدیر مک آرزو سننده بولنان
 انکلتزنک تشویقانی اوزرینه لهستان واسوچ دخی داخل اتفاق
 اولدقلری حالده روسیه به اعلان حرب اولنمش و اوستریا دخی
 روسیه ایله بالاتحاد محاربه واقعه به مشارکت ایشدر فقط اثنای
 حربده روسلر موقوفیات عدیده نائل اولدقلرندن انکلتزه
 و پروسیا دخی طوغریدن طوغری به اتفاقه قاریشوب نهایت
 اورسووا اطه سیله او ننا نهریه محدود اراضی صغیره نک ترکی
 شرطیه اوستریا دولتیه زشتویده مصالحه ایدلش و فرانسه
 انقلابی بالجمله دولتیک انظار دقتنی غربه عطف ایلدیکنه واسوچ
 دولتیده باشلی باشنه عقد صلح ایتدیکنه مینی انکلتزه و پروسیا
 و اوستریا نک توسطلریله روسیه حکومته دخی یاش معاهده سی
 تنظیم و امضا قلمشدر . قریم الحاق نک تصدیقی ، قوبانک قسم
 اعظمیه او چاقوف قلعه سنک و بسار ایوانک ترکی و دینستر نهرینک
 بعد ما حدود انحاذیه چاریچہ حکومتنه اون ایکی ملیون غروش
 تضمینات حربیه اعطاسی بو مقاوله دولیه نک جابه احکام
 مندرجه سنندندر . لهستانه کلنجہ : متفقدن هربری باشنی
 قورتارمغه چالشوب آزچوق ترک اراضی ایله محافظه استقلال
 ایلدکلری کی پروسیانک دوستلغنه قایلان بو بیچاره مملکت دخی
 گرفتار اوله جغی ورطه کردا بدن کندینی تخلیص ایده میوب ترک
 حیات ایلدن بشقه چاره بوله مامشدر .

فصل رابع

فرانسه انقلابدن زمانزه قدر

۱

فرانسه انقلابی وویانه قوتغره سی

فصل سابقک مطالعه سندن تبین ایده جکی اوزره و استفالیه معاهده سیله تشکل ایدن هیئت سیاسییه ایکی عصره قریب مدت دوام ایتیش و بو وقتده اوروپا موازنه سی صورت لایقده محافظه اولنه رق یالکز لهستان تقسیم و امور داخلیه دوله مداخله حقنک مغایر حقوق بر صورتده تفسیر یله دور مذکورک صوکارینه طوغری حقوق دوله مخالف بر طاقم احوال وقوعه کلمکه باشلامشدی فرانسه اختلال کبیرینک و قوعی اوزرینه ایسه اوروپا جمعیات سیاسییه سی هرج و مرج اوله رق بر ربع عصر ظرفنده مناسبات دولیه حق و عدالتدن زیاده سیله انحراف ایتیش و قطعه مذکوره نیک یکیدن تنسیق و تنظیمی ایسه پارس وویانه معاهده لریله ممکن اوله بلسدر . بو ائشاده انک زیاده موضع مباحثه یه قونیلان مسئله امور داخلیه دوله مداخله حق ایدی . فرانسه یه انک اول اعلان حرب ایدن پروسیا و اوستریا دولتلری اختلال مناسبتیله نشر اولنان افکار فاسده نیک عالم مدنیتجه و قوعی ملحوظ و محتمل اولان تأثیرات مضره سنی و بناء علیه بونک اساس سندن رفعی آرزوسنی وسیله تجاوز ایشکاری کبی فرانسزلرده مهاجرات اخیره لرنده

ممال متجاورنک ظلم التنده ازلمکده بولندقلربنی و مقصدلری دخی بونلر نزدنده موافق حریت اداره لر تشکیل اولدیغنی ادعا ایشلردر . حقیقت حاله نظراً ایکی طرفکده مدعیاتی واهی اولوب برملنک اداره داخلیه و صورت و شکل حکومتنه مداخله هیچ بروقتده جائز اولمیه جغی و یالکز انک بولنه جغی حالدن مجاور لرجه طوغریدن طوغری به و غایت بیوک بر مخاطره تولد ایدر و بوبابده نصایح و اخطارات دوستانه نیک تأثیری کورلمز ایسه بو حالده مداخله یه جواز و یر یله یله جکی وارسته قید بیاندر . فرانسه ایله دول متفقه یلیننده مدت مدیده دوام ایدن و نهایت - فرانسزلرک محیر عقول اوله جق درجه ده قزاندقلری مظفریات و نائل اولدقلری شهرت عسکریه ایله برابر - متفقلرک غلبه سیله ختام بولان بو محاربه عظیمه ایله حقیقتده متارکه حکمنده اولان قامیو فورمیو پرسبورغ ولونه ویل عهدی کبی مقاولات صلحیه نیک مختصر آتاریخی ذکر یله کتابمزک پروغرامندن خارج اولغله یالکز بوائشاده بین الدول تحدث ایدن مسائل حقوقیه دن و خصوصیه امور بحریه یه متعلق احکام و منازعات جدیده دن بحث ایله اکتفا ایده جکر . مسائل متحدثه دن انک مهمی محاربلرله بیطرفلر تجارتنک بحراً سربستلیکی خصوصی ایدی . انکتره ایله متفقلری فرانسه بی کندی آرزولری و جهاه عقد صلحه اجبار ایچون انک قوی چاره داخل مملکتده قحظ ظهور ایتدیرمک یعنی خارجدن هر نوع مأکولات و ذخائرک دخولانی منع ایتنک اوله جغنی تصورله عموم

فرانسه لیمانلرینی حال محاصره ده اعلان ایتدکاری کبی انگلیز سفائن حربیه سنه بو محاصره دن خبری اولدیغی حالده فرانسه لیمانلرینه کیرمکه چالشان بیطرف سفائنک حوله سیله برابر ضبطی ایله یالکز اسوچ ودانیمارقه کیلری حقننده براز مساعده کارانه حرکت اولتمسنی و ساحله یناشیق آرزو سننده بولندیغی حالده آچیق دکزده طوتیلانلرک بر انگلیز لیماننه کتیریلهرک حوله لرینک طرف دولندن اشترا ایدلمسی امر اولمش و ۱۷۹۶ سنه سننده بوتدیر شدیدک فرانسه مستملکاتنه دخی تعمیمی قرار لشدیر لدیغی مثللو قورصان سفائنی تجمیر ایدنلره مستعمرات مذکوره محصولاتی حامل کیلری ضبط ایده بیلک اوزره اعطای مساعده قلمشدی . بوتدابیر اسوچ ودانیمارقه و آمریکا دولتلرینک موجب شکایتلری اولهرق دانیمارقه اعظم رجالندن مشهور قونت دو برون شورفک همتیله بیطرف تجارتک وقایه سی وسوند بوغازنده بو مقصدی لاجل التأمین بر مشترک دونما تشکیلی ایچون ایکی دولت شمالیه بیننده بر معاهده اتفاقیه عقد اولمش و آمریکا دخی انکلتزه ایله بر معاهده مخصوصه امضا ایدرک ممکن مرتبه سفائن تجاریه سنی محافظه یه و بو خصوصه حقوق بین الدول قواعد عمومیه سنی اجرا ایتدیرمکه غیرت ایشدی . فرانسه دولتی ایسه دشمنلرینک تشبثات غیر محقه لرینه مقابله بر بیاننامه اصدار ایله حرب و قورصان کیلری قوماندانلرینه کرک دشمن اموالی و کرک دشمن لیمانلرینه مخصوص بیطرف اشیاسی ایله مملو

بیطرف سفائننی ضبط (!) و مصادره ایچون رخصت و یردی و الحاصل هر ایکی طرفک اتخاذ ایلدکاری تدابیردن انک زیاده بیطرفلر متضرر اولمقده ایدی . حتی فرانسلر مؤخرأ یعنی ناپولئون بونا پارطک زمان شو کتنده محاصره بحریه اصولنی اعلان و بالجمله اوروپا ملتلرینک انکلتزه ایله علی الاطلاق هر نوع تجارتده بولتملرینی منع ایله حقوق انسانیته ک معزز لرندن اولسی لازم کلان سربستی تجارتیه تعرضلرینی درجه نهاییه ایصال ایلدیلر .

بالاده کورلدیکی اوزره انگلیزلر بیطرف سفائن ایچنده بولنان دشمن اموال تجاریه سنی دخی ضبط ایدوب حالبو که فرانسه و آمریکا بیننده اولجه عقد اولنان تجارت و سیر سفائن معاهده سننده ایسه سربست سفینه سربست حوله قاعده سی مصرح اولدیغندن فرانسه حکومتی باندیردسنک امتیازات و منافعنی وقایه ایتمسی ایچون آمریکا نزدنده مطالباتده بولمش ایدی . او وقت جواهر متحده امور خارجییه نظارتنده بولنان موسیو جفرسون نام ذات ایسه بو مطالباته دولته انکلتزه ایله بویولده بر معاهده سی اولدیغندن انگلیزلرک اجراسی ارزو اولنان قاعده یه متابعت مجبوریتنده بولمدقلری و موجب شکایت اولان حرکتلری کندی قوانین داخلیه لرینه مطابق اولمغله آمریکا حکومتک هیچ بوجهله اعتراضه حتی اوله میه جغنی و خصوصیه دول سناره سفائنیه نقل اولنان آمریکا اشیاسی آمریکا سفائنیه

منقول فرانسه اموالته مقدار و قیمتجه فائق اولمغله فرانسه نك
انلری بالمصادر دهها زیاده استفاده ایده جکی و ادیسنده اعطای
جواب ایله بو بایده کی مذاکرات بر اتحاد افکار حصوله کتیره مدیکنه
و ۱۷۹۴ معاهده سیاه آمریقا ایلر ده انکاتره اصولی قبول ایتمکد
مبنی ۱۷۹۶ سنه سنده قوانین یون مجلس ملیسی با امر نامه
آمریقا باندرسی التنده طوتیلان بیطرف و یادشمن اشیاسنک قابل
مصادرده اولدیغنی تعیین ایدرک و اختلاف واقع بویله بر صورت
مضرده فصل اوله رق مسئله یه ختام ویرلدی .

بو اثناده ینه عین مسئله یه دائر اوله رق پرورسیا و آمریقا
حکومانی بیننده بر اختلاف تحدت ایلمشیدی : ایکی دولت بیننده
۱۷۸۵ سنه سنده عقدا اولنان معاهده ده بیطرف سفائن حوله لرینک
سربستلیکی قبول اولندیغنی حالده دول محاربه بونک علیه بنده
حرکت ایتمکدن و بوندنده بالخاصه تجارتنک قسم اعظمی ذخیره
اخراجاتندن عبارت اولان آمریقا دولتی متضرر اولدیغندن و
او اثناده آمریقا ایله فرانسه بیننده بر محاربه ظهوری پک محتمل
اولوب بو تقدیرجه آمریقا ایلمر ملل سائر سفائن تجاریه سنه عدم
تعرضه عهداً مجبور قلنه جق لرندن جاهر متحد طرفندن معاهده
سالف الذکرک بو بایده کی احکامنک تغییری و برده مهمات حربیه دن
معدود اوله جق اشیانک آرزولی و جهمله توضیحی ایچون پرورسیا
زبدینه موسیو آدامس نام ذات ترخیص اولمش و پرورسیا ده اصول
قدیمه نك ابقاسنی التزام ایلمکله اختلاف واقع بر مدت بمتمد

اولمشیدی . نهایت ۱۷۹۹ ده تجدید اولنان معاهده ده قاعده
مذکوریه بالتأیید یا لکز دول محاربه طرفندن عدم اجراسندن طولانی
بیان تأسف اولنهرق و بو مسئله نك صلحک صورت قطعیه ده
تأسیسندن عسکره اجراسی تأمین اولن بیله جک صورتنه
قرار لشدی رلسی تعهد ایدیلرک اختلافه ختام ویرلمش و مهمات
حربییه عد اولنهرق مواد حقنده دخی دولتین متعاهدین بیننده
ائتلاف افکار حاصل اولمشدر .

محاربه نك ابتدا سندبر و اسوچ و دانپار قد دولتری انکاتره نك
مدعیاتنی قبول ایتمه لرک سفائن تجاریه لرینی حرب کیلری واسطه سیله
محافظه ایتمکده و انکلیز کیلرینک تفتیش و تحری سفن حقنک اجراسنه
مساعده ایتمکده اولدقنری کبی انکلیز لر ایسه بیطرف تجار سفائی ولو
حرب کیلر یله برابر بولنسلر بیله حق تفتیشدن مصون اوله میله .
جق لرینی و بو کمانعت ایدن لرک مصادرده اولنهر جق لرینی ادما ایلمکده
ایدیلر و بو صورت جای اختلاف اوله جق بر ایکی حالت ظهوری
اوزرینه دانپار قه و انکاتره بیننده بر مسئله دولیه حکمنی آلهرق
بر مدت موجب مباحثه اولمش و نهایت انکلیز لر او حوالی یه
برده قوتلی دونما سوق ایتمکدن دانپار قه دولتی ایشک
جهت حقوقیه سی فصل اولنجیه قدر تجار کیلرینی سفن حربیه
ایله وقایه ایلمکدن نکوله مجبور اولمشدی . روسیه ایمپراطوری
پولک انکاتره اتفاقدن آیرلسی اوزرینه دولت مذکوریه ایله
پرورسیا دانپار قه و اسوچ حکومتلری بیننده «۱۸۰۰» ده عقدا اولنان

معاهده ده ۱۷۸۰ سنه سنده اتحاد اولنان مسلح بیطرفلق اصولنک تجدیدی قرار کیر اولهرق تدابیر لازمه یه تشبث اولنسی اوزرینه مسئله یکیدن علولنهرک انکلتره لیمانلرنده بولنان دول متفقه سفائنی تحت حفظه آلمسیله دول مذکورہ بیننده حال حرب حاصل اولدی فقط بر انکلیر دونماسی طرفدن در عقب قوپنهاغ شهرینک طوپه طوتیلهرق سوند دونماسنک دخی ضبط اولنسی اوزرینه دائیبارقه بر متار که امضاسنه مجبور اولدیغی کبی سنه آتیه ده دخی فرانسه یه طرفدار بولنان پولک اتلافیله رینه برنجی آلکساندرک جلوسی اوزرینه روسیه وانکلتره بیننده مذاکره صلحیه به باشلانوب ۱۸۰۱ ده بر معاهده عقد اولنهرق بوکا قوپنهاغ وستوقهولم قابینتورلیده اشترک ایلدیلمر معاهده مذکورده مهمات حربیه مستثنا اولهرق بیطرف ملنلرک تجارتی سربست اولدیغی و یالکز حال محاصره ده اولان یعنی محاربک سفائنیله اطراف صورت کافیده قوشادملقه دخولی تهلکه لی بولنان لیمانلر اسنتنا اولندیغی، ساده حرب کیلرینک سفن تجاریه یی تفتیش حقی اولوب بو حقت قورصان کیلرینه شامل اولدیغی و اگر تجار کیلری بیطرف دولتک حرب کیسیله برابر سه محارب دولت حرب سفینه سی قوماندانی دیکر دولت کیسی قیودانیله بر لشهرک ایکی طرفک اوراق معاینه و تابعیتلری تفتیش اولندقدنصکره تجار کیلری اوراق تفتیش اولنهرجغی و شبه اولنورسه محاربک بالذات کی بی تجری یه حقی اولوب فقط بیطرف

دولت ضابطان بحریه سندن بری دخی برابر بولنهرجغی و بر سفینه توقیف اولندقدنصکره مصادره سی جائز اولدیغنه حکم اولنور سه اصحابنه تضمینات مناسبه اعطا قلنهرجغی خصوصاتی قرار کیر اولهرق و بو وجهله مسلح بیطرفلق قواعدیله انکلتره نک التزام ایلدیکی اصول تفتیش بحری بر بویه توفیق و مزج اولنهرق دول اربعه شمالیه بیننده نیجه زماندنبرو ممتداولان مبیانت افکار بر طرف ایلدی.

فرانسه اختلالی اوروپاچه تأثیرات عظیمه یی موجب اولمش و وستفالیه، اوترخت، هوبرتسبورغ و سائر معاهداتله تأسیس و تأیید ایلدیلان هیئت سیاسیته هرج و مرج اولمنی انتاج ایش ایلی هر نقدر اولری فرانسرل حربیه مدافعه استقلال مقصدیله بدأ و فتوحات آرزوسننده بولندقلرینی اعلان ایشلر ایسده وقوعبولان موقیقلر و خصوصیه موقع اقتداره بونایارط کی جهانگیر لک داعیه سننده بولنان بر داهینک صعودی اوزرینه کلیاً تبدیل مسلیکه عادتاً عموم اوروپانک ضبطنه قیام ایشلر و بو محاربانک نتیجه سی اولهرق قطعه مذکورهنک موازنه سی کلیاً اخلال اولنوب بلچبقایله آلمانیانک رن نهرینه قدر اولان قسمی فرانسه ضبطنه کچمش، فلمنک ناپولی واسپانیا حکوماندن هربری بونایارط خاندانی افراد و منسوبانن برر ذاته تودبع اولمش، آلمانیاده کی حکومت صغیره دن رن متحده سی بالتشکیل فرانسه نک تحت جایه سنه وضع اولمش، ایٹالیانک قسم اعظمی

فرانسز لر ائنده قالمش، اوستریا ایله پروسیا زیاده سیه کسب ضعف
 ائلمش، و الحاصل روسیه ایله انکلتره دن بشقه بر دولت قویه
 قائمه رق اوروپانک قسم اعظمی ظاهراً و یا حقیقتاً فرانسه ایملر.
 طور لغی حکومت و نفوذی آئنده بولنش ایلی . بونا پارط
 حکومتک بو حالدده قلمسی ایسه اوروپاچه بر بیوک تهلاکه اولمغله
 دول موجوده یا فرانسه بی حدود قدیمه سنه ارجاع و یا فدای
 استقلال شق لرندن برینی ترجیح مجبوریتنده قالدق لرندن طبیعی برنجی
 جهتی ترجیح ایله نتیجه سی مشکوک و فقط قطعی بر محاربه
 عشیه یه کیرمشلر ایلی بو مقصد حاصل اولوبده اوروپاچه قابل
 دوام بر حال سیاسی تأسس ایتدیجه انعقاد مسالمت قابل اوله ما.
 مغله بواسطه منعت اولان معاهدات صلحیه محاربه لک اکمال
 قوت ایتلریم چون زمان مساعدده دن عبارت اولوب بو وجهله
 فرانسه ایله اوستریا بیننده کی قامپو فورمیو (۱۷۹۷) لونه ویل
 (۱۸۰۱) پرسبورغ (۱۸۰۵) وویانه (۱۸۰۹) معاهد لریله یینه
 فرانسه نکل انکلتره ایله آمینده (۱۸۰۲) و روسیه ایله تیلست
 (۱۸۰۷) ده امضا ایتدیکی عهد عادتاً برر متازکه حکم بنده قالمش
 ایلی فقط بو مقصد بونا پارطک روسیه سفر بنده کی انزاحی و واترلوده
 مغلوبیت و اسارتی اوزرینه حاصل اولمغله ۱۸۱۴ و ۱۸۱۵
 سنه لرنده پارسه عقد اولنان ایکی معاهده ایله ویانه معاهداتی
 اوروپایی یکیدن تنسیق و بر صلح قطعی عقد و تأسیس ایتشدر.
 فرانسه انقلابی بالجمله اوروپایی قارشیدیریغی کبی شرق

حقمنده دخی نتایج مهمه بی موجب اولمش و دولتمزله فرانسنزلر
 بیننده کی مناسبات بور بونلرک اعاده حکومتلرینه قدر گذران ایدن
 ربع عصر ظرفنده کلی صورته تحول و تبدل ایتشدر: مملکت
 مزبورده قرالغک الغاسیله جمهوریتک احداثی متعاقب اجتماع
 ایدن قونوانسیون ناسیونال (مقوله ملیه) مجلس عمومی دولت
 عثمانیه حقمنده بر آرهلوق اونالتجی لونی و کلاسی بیننده ترویج
 اولمغله باشلانیلان افکار واهیه یه تبعیتله آز و قنده محو و منقرض
 اوله جنغی ظن اولنان بو دولت ممالککندن کندیلرینه پیشینا بر
 حصه چیقارمق تصور بنده بولنش و اوقت ایتالیا اردوسی قوماندانی
 بولنان جنرال بونا پارطدخی ذاتاً کندوسنک مصر فتحنده اعزامی
 رجا ائیلکده اولدیغندن مطلوبی اسعاف اولنه رق بو ولایت
 مهمه نکل ضابطی قرار لشنریلوب اجرای اقتضاسنه تشبث
 ایدمش ایلی . هر نقدر فرانسزلر مصره تجاوز لرندن مقصد
 دولتمزه قارشو مطاوعنده قصور ایدن مملو کلرک تادیبی و خطه
 مذکورده نفوذ عثمانینک تأییدیه فرانسه منافع تجاریه سنک تأمین
 قضیه سی اولدیغنی اعلاندن حیا ایتما مشلر ایسه نه بویلانلر ایله باب
 عالی قائم دیغندن تجاوز واقع انکلتره ایله اتفاقری و حصول
 محاربه بی موجب و نهایت بونا پارطک سوریه ده کی عدم موفقیتی
 و فرانسه یه عودتی اوزرینه ۱۸۰۲ سنه سنده مصرک اعاده سی
 و فرانسزلرک ضبط ایتدگری جزایر سبعه نکل تحت جایه مزده
 اوله رق بر جمهوریت مستقله شکنه افرانغی و شرائط سارهی حاوی

بر معاهدهء صلحیه انعقادینه بادی اولدی . مصر سفرند نصکره دولتین بیننده کی مناسبات بر حسن صورته منقلب اولوب جزایر سبعة نك استقلالی روسلری دلكير ايلك وانكلير لرك قسقا بلغی ایسه درجه نهاییه وارمق حسیله بونا پارط دولت عثمانیه ایله خوش چکنمنك منافعی تقدیر و سلطان سلیم ثالث دخی كرك ادارهء ملكیه و كرك امور عسکریه جه اجراسنی تصور ایلدیکی اصلاحات جسمیه تأمین موقیعتی ایچون فرانسزلرك حسن نیات و آرزوی مخادتلرندن استفاده غیرت ایلدکلرندن ایکی حکومت آره سننده عادتاً بر نوع اتفاق بیه حاصل اولدی و بوش امور روسلر ایله انكلير لرك عدم خوشنودیتنی موجب اولغله ایکیسی بردن اعلان حربله اولكيلر مملکتینی استیلا ایتدکاری کې دیگر لری دخی استانبوله قدر بردونما سوق و مصر ك ضبطی ایچون دخی بر اردو اعزام ایلدیلر سه ده دو نمانك فرانسز ایلچیسینی جنرال سباستیانیك تشویقیله کوستریلان مقاومت سدیده اوزرینه رجعته و اسکندریه ده محاصره اولنان اردواری دخی مصر والیسی محمد علی پاشانك اقداماتیه تسلیم نفسه مجبور ایلدی و بناء علیه انكلتره ایله آزوقت ظرفنده عقد صلح ایدیلوب فقط مملکتین بر مدت روملر یندنه قالدی .

در سعادتده و در دنجی سلطان مصطفى نك جلوسی اوزرینه مجالس دولتده افکار عتیقه نك غلبه سی بونا پارطك بزدن یوز چورمسنی و روسیه دولتیه تیلیت معاهده سنی امضا ایلسنی

موجب اولشدی معاهدهء مذکوره موجنبجه اولاح و بغدادنك روسیه اداره سننده بولنه جنغی تصدیق اولندیغی کې حین حاجتده یوسنه و آرنای و دلک فرانسه یه صربستان اوستریایه و طونه جه تریله ما کدونیا طرفلری روسیه یه پوشمك و استانبول ایله روم ایلی ایالتی استئنا اولتمق اوزره اوروپاده کی ممالکمزك تقسیم قرار لشدیرلدیغی معلومدر . مؤخرأ بو تقسیم متصورك حیرت حصوله ایصالی ایچون ارفورت شهرنده ایکی حکمدار بیننده وقوعه بولان ملاقاتده روسلر استانبولی دخی آرزو ایتدکلرندن ائتلاف افکار حاصل اوله میوب بو اختلافه بر طاقم اسباب برودت ده منضم اولدیغندن ایکی متفکر بیننده محاربه ظهوری احتماللری پك زیاده نتمش و بناء علیه روسیه چاری برنجی آلکساندر حین حاجتده یالکز ناپولئونله قالمق ایچون مملکتینك اعاده سی صربستانك بعض امتیازاتله دولت علیه اداره سننه وضعی و بسار اییا ایله علاج نواحیسی و طونه نك شمالنك روسلر طرفندن محافظه سی و سائر بعض احکام ایله ۱۸۱۲ سنه سننده و بکرش شهرنده جنتمکان سلطان محمود ثانی ایله بر معاهده عقد ایلشدر فرانسزلرك روسیه ایله اولان سفرلرینك نتیجه سی معروف اولغله بوبابده تطویل مقاله حاجت کوریه مز یالکز شو قدر دنیه بیلورکه بونا پارطك تیلیت معاهده سننده دولت علیه بی ترك ایله ایتدیکی خطای عظیمك حکومتك انقراضنه پك چوق دخلی اولمش و موسقووه دن رجعت ایتدیکی زمان عثمانلیلرله عدم اتفاق سببیه رهگذرنده

متعدد دشمن قولدرینه راست کلمکه عسکرینک جمعیت وانتظامنی محافظه یه مقتدر اوله مامشدر. اگر تیلستیت معاهده سنده دولت عثمانیه ایچون خیرلی شرائط درج اولنهرق دولتین آرسنده کی مخادنت قدیمه وقایه وروسیه یه مشترکاً اعلان حرب ایدلسه ایدی احتمالکه آله اسارتلری وپارس معاهده لری هیج کورلمز وبلکه ده و اترلو وسعت التلر میدان ظهوره کلزدی.

۱۸۱۵ سنه سی پارس معاهده سی ایله او وقت بر ایکی دولت بیننده خصوصی اوله رق عقد اولننن مقاولاتک خلاصه احکامی بروجه زیر بیان اولنور: (۱) فرانسه نک بعض جزئی تغییراتله ۱۷۸۹ دن اولکی حدودینه ارجاعی (۲) مالطه اطه سنک انکله یه تابعیتی (۳) جزایر سبعه نک انکله یه حایه سنده اوله رق استقلال (۴) فرانسه طرفندن تاباغوسن لوئی و موریس اطه لرینک - بد ضبطنه یکن سائر فرانسر مملکاتنک اعاده سی مقابلنده - انکله یه ترکی (۵) س دومیغ اطه سنک بر قسنک فرانسه جانبندن اسپانیاه ترکی (۶) امید برونوی وسائر بعض یرلرک هولانده جانبندن انکله یه ترکیه بوکا مقابل دولت مذکوره انه یکن فلنک مستملکاتنک اعاده سی (۷) فرانسه طرفندن دول متفقّه محاربه یه یدیوز ملیون فرانق تضمینات حرپه اعطاسی.

ینه بو مقاولاته خنی اوله رق درت ماده درج اولنوب بولردن برنجیسنده فرانسه نک ترک ایتدیکی ممالکی دول متفقّه

ایستدکلی و جهانه توزیع ایده جکاری، ایکنجیسنده جنوه شهری و اراضیسنک ساردنیا حکومته الحاق اولندجعی، اوچنجیسنده اسویجره لیلرک ترجیح ایده جکاری اصول اداره بی فرانسه نک دخی سائر لرله متحداً حایه ایده جکی و دردنجیسنده رن نهرینک شمال طرفنده بولنان و فرانسه جانبندن ترک اولنان اراضینک فلنک و پروسیاه وسائر بعض حکوماته و یریه جکی بیان ایدلمشدر پارس معاهده سیله مقدمات صلیحه بر صورت عمومیده قرارلشدر یریه رق تفصیلاتک رؤیتی بر قونغریه، حواله اولنش و بوده ویانه شهرنده اجتماع و مذاکراته دوام ایله نهایت نخت قراره آلتان مقاولات و معاهدات ایله اوروباده یکی بر اصول موازنه احداث و هیئات موجوده تبدلات کلیه اجرا ایدلمشدر. ویانه قونغریه سی قرارلرینک اهمیت فوق العاده سنه بناء هر مسئله حقدنه کی احکامنک بروجه آتی مجملاً ذکر می مناسب کورلدی:

لهستان - (۱) لهلی ساکن اولان برلرده اخلاق و عادات ملییه یه موافق بر اداره تشکیل ایتک و اهالینک حریت شخصیه، مدنیه و مذهبییه لرینی اخلال ایتامک شرائطیه اوستریا و پروسیا و روسیه بیننده اولجه وقوعبولان تقسیمک تصدیق (۲) عنوانی قرالغه تحویل اولنق و آیریجه و اخلاق ملییه یه موافق اداره ملکیه و عسکریه یه و مجالس عمومیه ملییه ایله آیری تاج حکمداری یه مالک اولنق اوزره وارسووی غراندوقه - لغنک روسیه ایمپراطورینه ترکی (معاهده مذکوره نک بو حکمی

موجباً لہستان قرالغی ہر جہتہ مستقل اولوب یا لکز قانون اساسی ایلہ روسیہ یہ مربوط یعنی روسیہ ایمپراطوری لہستان قرالی صفتنی دخی حاز اولغله برنجی علیکساندر بو حقوق انعقاد عہدی متعاقب نشر ایتدیکی بیاننامہ و قانون اساسیہ دخی تأیید ایلشدی فقط مؤخر برنجی نیقولانک تجاوزاتی نتیجہ سی اولہرق و قو عبولان اختلال اوزرینہ ۱۸۳۰ ادہ نشر اولنان بیاننامہ ایلہ مجلس ملیسی لغو و رسم توج موسقوہ یہ نقل و قرالغک ادارهء ملک یہ و عسکریہ مخصوصہ سی فسخ اولمش و اوروپانک قید سزلغیلہ حق مداخلہ سندن استفادہ ایتماسی سایہ سندن نہ حکومتک نامی بیلہ قالماشدر) . (۳) ادارهء داخلیہ سندن مداخلہ اولنماق و ایچندہ عساکر اجنبیہ اقامہ ایدلماک و اوستریا و روسیہ و پروسیا دولترینک حیایہ مشترکہ لری تختندہ اولہرق بو دولتر تبعہ سندن اولان ارباب جرائم و فراریلری حفظ و وقایہ ایتماک شرائطیلہ قراقووی شهری اراضیسینک اعلان استقلالی (شہر مذکور بر قاچ کرہ دول حامیہ طرفندن اشغال عسکری تختنہ الندقندن سکرہ ۱۸۴۶ و قوعاتی اوزرینہ اوستریا ممالکینہ الحاق اولنمشدر) .

اوستریا . — ۱ قامپوفورمیو لونه ویل پرسبورغ فونتبلو و ویانہ معاهدہ لریلہ ترک اولنان ممالکک ینہ اوستریا یہ اعادہ سی ۲ بلچیقہ قطعہ سیلہ شو و ابده کی ممالکینک دولت مزبورہ طرفندن ترکی ۳ لومباردیہ و ونڈیک ایالاتک کذا اوستریا یہ اعادہ سی .

المانیا . — ۱ پروسیانک ۱۸۰۶ سنہ سی حدودندہ ابقاسیلہ ساقس حکومتک دولت مذکورہ و قدیم پرنسولری بیندہ تقسیم . ۲ بالجملہ آلمانیا حکومتندن و مالک اولدقلری المان ولایتلر مناسبیتیلہ اوستریا پروسیا دانیمارکہ و فلنک دولترندن مرکب بر المانیا متفقہ سی تشکیلیلہ ہر حکومتک استقلالی محافظہ اولنغله برابر مصالح عمومیہ نک دول مذکورہ مرخصلرندن مرکب بر دینہ حوالہ سی و قدیم ایمپراطورلغک لغوی .

ایتالیا . — ۱ حکومت موجودہ نک قدیم حکمدار لرینہ ویا انلرک عائلہ لرینہ اعادہ سی ۲ جنوہ جھوریٹنک ساردنیا قرالغندہ الحاقی .

اسویج . — نورویچ قرالغنک اسویج حکومتیلہ اتحاد ایتدیلمسی و بوکا مقابل اسویج طرفندن پومرانیانک دانیمارکہ یہ ترکی .

فلنک . — فرانسه ایلہ المانیا ارہ سندنہ شمالاً بر حائل اولمق اوزرہ بلچیقہ قطعہ سیلہ لوکسمبورغ غراندوقہ لغنک فلنک قرالغندہ الحاقی .

اسویچرہ . — یکرمی ایکی مستقل جھوریتدن مرکب اولہرق مصالح عمومیہ سی انلرک و کیلرندن مرکب بر دیت ایلہ رئیس جھور طرفندن اداره اولنمق و صورت دائمہده بیطرف قالمق اوزرہ اسویچرہ نک تصدیق و تأیید استقلالی . اراضی و اصول ادارهء حکومتیہ اجرا اولنان تغیراتندن

بشقه و یانه قونقره سی قواعد علیہ اوزرینه دخی بعض قرار لر
 ویرمشدر که بونلر ده اهمیتجه دیکر لر ندن اشاغی قاله مز لر از جمله
 سفر انک تشریفاتجه حق تقدملر ندن طولانی ظهور ایدن اختلافات
 فصل اولنهرق بونلر اوچ صنفه تقسیم و صنف اوله بیوک ایلیچیلر
 و پاپانک کوندر دیککی سفیرلر صنف ثانی به اورطه و کوچک ایلیچیلر له
 عموماً بر اجنبی حکمداری نزدینه مبعوث اولانلر و صنف ثالثه
 دخی مصلحت کگذارلر یعنی امور خارجییه ناظرلری نزدینه معتمد
 اولانلر ادخال ایدلمش و اسیر تجمارتنک مغایر انسانیت اولدیغی
 صورت رسمیه ده اعلان اولنهرق بونک کلیاً لغوی ایچون لازم
 کلان تدابیرنک اتخاذ و اجراسی بین الدول و قوعبوله جق مذاکرات
 مخصوصه نتیجه سنه تعلیق اولنمشدر . بو قرارلرک الک مهمی بر
 قاچ دولت ملکندن جریان ایدن انهار اوزرنده سیر سفائنک
 سر بستلیکی خصوصی اولوب بو سر بستی اساساً قبول ایدلمش و
 مروریه رسملرینک تنزیلیله بونلرک بر قاعده عدالته توفیقاً استیفاسی،
 انهار اوزرنده کی مراکز تحصیلیه نک تقلیل مقداری، و الحاصل
 سیر سفائنی دوچار مشکلات ایده جک موانعک رفعی ایچون
 قواعد معینه وضع اولنهرق اولارن واسقونهرلرینه تطبیق
 اولنمش و مؤخر ا بو اصول و بستول، موسر، اودر، پو و پارس
 معاهده سیله دخی طونه نهرلرینه تعمیم اولنهرق سر بستی انهار
 قاعده حقوقیه سی اور و پاده همان عموماً تاسس اولنمشدر .
 بو دورده نشر ایدن مؤلفینک الک بیوکی مارتنس اولوب

مومی الیهک ایلاک اثری ۱۷۸۸ ده نشر ایدلدیکنی اولکی بحثده
 بیان ایلشدک . قانت (۱۷۲۴ — ۱۸۰۴) آثارنده حقوق دولک
 قواعد عمومیه سی دخی موضوع بحث ایتمشه ده مسلاک حکمیسی
 ایجابی اولنهرق بو قواعدی خیالی بر صورتده تصویر ایتمش
 و بحث مخصوصنده اجمال ایدلدیکمز اوزره صلح دائمی تاسیسی
 ایچون برده رساله تألیف ایلشدر . ینه المانیای حکما سنندن هکل
 ایسه قانتک تصورینه اعتراض ایله صلح دائمی تاسسینک هیچ بر
 وقت قابل اوله میه جغنی اثباته حصر نفس ایتشدر .

فرانقفورنده متولد (۱۷۹۹) ساوینی دخی المان مشاهیرندن
 اولوب بالخاصه روما حقوقیله اشتغال ایلش و قواعد دولیه یی
 بیانده امثال تاریخییه زیاده اهمیت و بره رک حتی بونلری قواعد
 مذکورهنک منشأ و منابعنه بیله تقدیم ایتشدر . الساسلی قوخنک
 (۱۷۳۷ — ۱۸۱۳) تاریخ معاهدات صلحیه به دائر تألیفی بحق
 کسب شهرت ایدن آثار دندر .

انکلتره پارلمنتوسی اعضاسنندن سیر جیمس ماکینتوش
 مملکت مزبوره اعظام علماسنندن اولوب تدریس ایلدیکی حقوق
 طبیعیه و دوله دائر جسیم بر اثر تألیفنه تثبیت ایتمشه ده عمری
 وفا ایلماش و یالکز بو درسله مقدمه اوله رقی مشهور بر نطق
 ایتشدر .

ذوات مجوئندن بشقه موضوع بحثمز اولان دورده پک
 چوق مؤلفین کیشسه ده هیچ بر یسنک اثری حقوق دول تاریخیجه

وقعه عد اولنه جق قدر مهم دکادر مع مافیه حقوق عمومیة بحریه نام کتابک مؤلفی ژو فروا، قونسلسر ه دایر بر رساله تألیف ایدن آمریقالی واردن و یونان و روما زمانندن غرو چئوسه قدر حقوق دولک تاریخنی یازان روبرت بلومر وارد اولدقجه مشهور درلر .

۲

ویانه قونفره سنندن پارس معاهده سنه قدر

فرانسه اختلالی نشر ابتدیکی افکار جدیده ایله بالجمله اوروپا حکوماتنک اساس اداره لرینی دوچار انقلاب اولمق تهلمکه سننده بولندیردیغندن بو تهلمکه نیک لایقیله برلشمدن منبعنده محوی ایچون دول سائره بیننده براتفاق حاصل اولمش و ناپولئونک مؤخرأ کوستردیکی آرزوی فتوحات ملل سائرهنک افکار حربجویانه سنه تقویت ویرمکه محاربه ربع عصره قریب برمدت دوام ایله نهایت فرانسه نیک مغلوبیت کامله سی وویانه معاهده لرینک عقیده ختام بولمشدر .

هرقدر ویانه قونفره سی اوروپانک اسکی اساسله توفیقاً تنسیق تصورنده بولنمشده طبیعی بو قدر محاربه نیک احداث ایلدیکی احوال جدیدهنک الجبای آتی بوکا مانع اوله رق یکی بر موازنه سیاسیة حصوله کلمشدی بو اوزون محاربه لرله بالجمله

دولتله ضعف طاری اولمش و وقوع بولان ضررلرک تعمیری ایچون صلحه احتیاج اولمق ملابسده سیله و باخصوص حدود دولجه حصوله کلان تحولات هر طرفک مدعیاتنی تسکین ایلکله صلحک بقاسی امیدلری زیاده اولوب فی الواقع قریم سفرینه قدر اوروپا دولتلری ارسنده اهمیت ویریله جک حربده ظهور ایتمشدر فقط اوزمانک کیونک تهلمکه سی افکار اختلالکارانه نیک اداره مطلقه تختنده اولان ملتر میاننده انتشاری اولوب بو وجهله برملتنک اختلال و عصیان ایله اصول اداره سنی تبدیل الیسی دولتله بیننده احداث ایدیلان اصول موازنه بی وویانه معاهداتنک فکر اساسینی اخلال و دول سائره جده مهالک عدیده بی انتاج ایلیه جکندن دول متعاهده نیک حصول مقصد ایچون ک زیاده بوجهته عطف نظر ایللری لازم ایدی فی الواقع بوخصوص تابدایت مسئله ده درپیش نظر ایلکله پروسیا و اوستریا و روسیه حکمدارلری پارسده بولندقلری (۱۸۱۴) اثناده بالذات اتفاق مقدس نامیله مشهور اتفاق عقد ایلشدر . اتفاق مقدسک اساس مقصدی بیان ایلدی کیمزه موافق ایسه ده طرزی پک مطلق و مجرد اولوب بونکله حکمداران متعاهدین هر درلو اجرا آنده اس حرکت اوله رق مذهب عیسوی احکامنه یعنی عدالت و مرجحت و محافظه صلح و اسایش قواعد دینی سنه رعایت ایده جکارینی اعلان ایللریله امضا اولنسان مقاوله نامه بر براتفاق معاهده سی اولمقدن زیاده مشترکاً اعلان افکاری حاوی

بر بیاننامه شکننده در غربی شوزا سیدر که اعتدال مجسم عد
اولنان مذهب عیسوی بی اس حرکت اتحاد ایدن حکومت
اوروپاده اک زیاده حقمنزلقله مشتهر اولان ودها از وقت اول
لهستانک تقسیمیدن چکمنیان دولترا ایدی .

بو مقاوله نك حصول مطلبه عدم کفایتی ظاهر اولمغله دول
مزبورہ ایرتسی سنه و یانده براتفاق دائمی عقد ایدرک بونکاه
بربرلینک متصرف اولدقنری ممالکی وویانه معاهده سیاه احداث
اولنان احوال جدیدہ بی و توارثی حکمدارلق اصولی مشترکا
تخت تأیید و ضمانتہ آلمشر و بربرده حکمدارک آرزوی ذاتیسی
نتیجہ سیاه اولمغله اصول اداره تبدیل اولندیغی ویا براختلال
ظهور ایلدیکی حالده بالمداخله حال سابقک اعاده سنی تعهد
ایلشدر .

بو معاهده یه پیدر پی بالجمله اوروپا حکمدارلری موافقت
ایلدکاری کبی اکس لاشاپیل (۱۸۱۸) قونغرہ سنده فرانسه
دخی داخل اتفاق اولمش و یالکز معاهده مذکورہ نك بالذات
حکمداران طرفندن عقد اولنسی وانکلترہ قوانینی حکمنجہ هر
معاهده ده بروزیر مسئولک امضاسی شرط بولنسی سببیلہ انکلترہ
اتفاق مقدسی رسماً قبول ایدہ میوب فقط قواعدینہ ضمناً بیان
موافقت ایتشد .

مؤخرأینہ بالنفس حکمدارانک اجتماعیلہ تشکل ایدن اروپا و
لاباخ وودرون قونغرہ لرنده اصول مداخله برقاعده حقوقیه

حکمنه قونلمشدر ناپولیده ظهور ایدن اختلال اوزرینه دول ثلثه
طرفندن مداخله اولندرق حکومت مطلقه اعاده ایدلمش
واسپانیاده بویله برتبدل وقوعنی متعاقب وودرون قونغرہ سی
اجتماع ایدرک اوروپا طرفندن مداخله یه فرانسه توکیل قلوب
حکومت مزبورہ معرفتیله اسپانیاده یکی تنظیم اولنان قانون
اسامی لغو اولندرق قرال یدنجی فردیناندک حکومت مستبدہ
سنه تقویت ویرلمشدر .

فقط مداخله اساسنک بودر جده ده سوء استعمالیلہ عادتا بر حکومت
داخلنده واقع اولوب سائر دولتله ضرری طوقنمیه جق هر
نوع تبدله تعمیم اولنسی انکلترہ دولتی طرفندن بحق جای اعتراض
اولمش وانکلترہ دول معظمہ نك کندیلرنجه بر ضرری اولمیه جق
خصوصاتہ مداخله یه حقنری اولمیه جغنی و اسپانیا ایشنده
اسپانیالیلرک نه فرانسه یه تجاوز و نه ده فرانسه نك اصول ادا
رہ سنی تبدیل ایچون برتشبثده بولندقنری حالده فرانسه لریک بو
وجهله مسلماً مداخله نری مغایر حقوق بولندیغنی ادعا ایلشدی .
انجق انکلترہ ده مؤخرأ (۱۸۲۶) پورتیکیزده قرالچہ دوناماریا
ایله دون میکل بیننده متحدت دعوا ی وراثت اوزرینه بو عدم
مداخله یولتیقہ سنی ترکیله معاهدات قدیمه ایله معین وظائف عهدیه
سنی و منافع تجاریه و سیاسیہ سنی وسیله ایدرک پورتیکیزه بر قوه
عسکریه کوندرمش و اوراده کی حکومت مشروعہ بی ارباب
اختلاله قارشى وقایه ایتشد فقط دون میکل یه ادعا سنده دوام

ایدوب بالاخره اسپانیاده فردیناندک و قاتندن صکره قرالچیه اولان ماری نك حكومتی تصدیق ایتمیان دون قارلوس ایله برلکده حرکات اختلالیه ده دوام ایلدیکنه و بونلرک تأدیبی ضمنده ایکی حکومته و صایت ایتمکده بولنان اسپانیا قرالچیه سنک والده سی ایله دو ناماریانک پدری (بره زیلیا ایمپراطوری) بینلرنده ائتلاف افکار حاصل اولدیغنه مبنی بو خصوصه فرانسه وانکلتره ده مداخله ایدرک دول اربعه بیننده بر اتفاق حاصل اولمش (۱۸۳۴) و اسپانیا و پورتیکیر تختلرینک مارالذکر قرالچیلر یدلرنده ابقامی مذکور دولتر جانبندن تحت ضمان و تکفله آلمشدر .

بو وجهله انکلتره دولتی دخی اولجه التزام ایلدیکی عدم مداخله پولتیقه سنده دوام ایده میوب مسلکنی ترکه مجبور اولمشدی فی الواقع ویانه قونفره سنی تعقیب ایدن بو دورده مداخله اصولی او درجه ده کسب اهمیت ایتمشدر که آئیده بیان اولنه جق مواددن اکلایشله جنی اوزره وقوعات سیاسیهدن هیچ بری دول معظمه نك مداخله سنی موجب اولمقدن خالی قالمامشدر .

فرانسه ده بوربونلرک اعاده حکومتی بسبتون اجنبی سلاحنک موقعیتی سایه سنده حصول بولدیغی ایچون ذاتاً فرانسه اهلینسجه اغرکلدیکی حالده وقوعات ماضیه ده ذیمدخل برچوق کسانه حکومت جدیده طرفندن صورت شدیدده جزا ایلمسی کبی افکار عمومییه مغایر حرکات، خصوصیه اداره

مشروطیه مالک اولان فرانسه طرفندن اسپانیاده اصول اداره مطلقه نك اعاده سی ایچون حرباً غیرت ایلمسی، ونهایت اونجی شارلک قوانین اساسیه ایله تأمین ایدیلان حقوق عمومییه می محل افعالی مملکت مزبورده برانقلاب ظهوری ایله اداره حکومتک بوربونلردن اورلئان خاندانه انتقالی موجب اولمشدی .

فرانسه ده وقوع بولان بو حرکت اختلالیه ممالک سائریه دخی سرایتله لهستانده و المانیانک اکثر محالی ایله ایتالیاده بعض مرتبه شورش و فترتی انتاج ایلمشسه ده تأثیراتندن اک مهمی بلچیقاً عصیانی اولمشدر .

بلچیقاً اهلیدی فرانسر لسانی ایله متکلم، لاتین جنسینه وقتولیک مذهبیه منسوب اولدیغی حالده ویانه قونفره سی مجرد فرانسه تجاوزینه برسد حکمک مقصدیه اهلای مذکوریه فی فلانمان و المان لسانلر بله متکلم، المان جنسینه و پروتستان مذهبیه منسوب بولنان فلنکلورله برلشدرمش و بونلرک بیننده حسن امتزاج حاصل اوله مامسی ایسه طبیعی بر کیفیت بولمشدی فی الواقع فرانسه نك تموز اختلالی اوراده ده ظهور عصیانی تعجیل ایش و بلچیقاً لیلر بر اداره موقته تشکیل ایدرک اعلان استقلال ایلمشدر .

بونک اوزرینه لوندرده فرانسه، انکلتره، اوستریا، روسیه و پروسیا مرخصلرندن مرکب بر قونفرانس اجتماع ایدوب اول امرده حرکات خصمانه تعطیل ایتدیریلرک بعده (۱۸۳۱) ده تنظیم اولنان عهدنامه ایله بلچیقانک استقلال تصدیق و حکومت

جدیده نك مؤبداً حال پيتر فیده بولسه جنی اعلان ایدلش و معاهدات موجوده نك كما كان معتبر اولسی، دیون عمومیه نك تقسیمی، مستملکاتله لو کسمبورغ غران دو قه لغنك فلنك قرالی بدنده ابقاسی وسائر بعض شرائط دخی وضع ایدلشدر .

بعض اعتراضاتدن صکره معاهده مذکورہ احکامی بلجیقا قرالی لئوپولد دوساقس غوتنبورغ طرفندن قبول اولنمشسده فلنك حکومتی بو تفریقہ ینہ عدم موافقتده بولندیغندن اجبار و تریبی ایچون فرانسه وانگلتره طرفندن اوزرینه قوای بریه و بحریه سوق ایدلش ونهایت بر چوق مذاکراتدن صکره ۱۸۳۹ دء دیگر بر معاهده امضا ایدیلوب بونکله ۱۸۳۱ عهدنامه سنه توفیقاً بلجیقانك استتلالی فلنك حکومتی طرفندن دخی تصدیق و قبول ایدلشدر . مسئله مذکورہ نك شو صورتله فصلی و یانه قونغرہ سنده تأیید اولنان اصول مداخله نك ندر جده کسب قوت ایلدیکنی کوسترر .

و هرون قونغرہ سی اثنالرنده مداخله دولی دعوت ایده بیله جك بر وقه دها ظهور ایش یعنی اسپانیانك جنوبی آمریکا ده کی مستعمراتی عصیان ایدرک اعلان استتلال ایلشردی .

اتفاق مقدسک اساسی حکمداران ملتره قارشو وقایه اولغله او صرده اسپانیایه معاونتله ملل عاصیه بی دائره اطاعتده ادخال ایچون مذاکراته باشلانمش ایسه ده انگلتره ایله آمریکا جاهیر متحده سی اعتراضه مبادرتله دول ثابته طرفندن اسپانیا لهنده

صدور ایده جك حرکت معاوتسکارانه بی عادتاً موجب حرب عد ایده جکرینی رسماً بیان و دول جدیده بی تصدیق ایلدیکنندن بو تصور قوده قاقوب فعله چیقماماش و یواش یواش سائر اوروپا دولتلی دخی جنوبی آمریکا جاهیرینی رسماً طایمشلردر اوروپانك بو صورتله آمریکا امورینه ده مداخله یه قاتشمسی قطعاً جدیده دولتیرینی اتحاد تشویق ایتمکله جنوبی آمریکا جاهیری مرخصلرندن مرکب بر قونغرہ پاناماشهرنده طویلانش و ۱۸۴۸ سنه سنده لیماده دخی دیگر بر قونغرہ اجتماع ایدوب سیرسفان تجارت و قونسولوسلر حقنده معاهدات مشترکه تنظیم اولنمشسده نتیجه قرار تصدیق اولنماغله مذاکرات واقعدن بر ثمره حاصل اولماشدر .

بو بحثك مشتمل اولدیغی زمانده آمریقا ده کی وقومات سیاسییه نك الك مهملی تکساس جمهوریتنك آرزوی امت ایله شمالی آمریکا جاهیر متحده سنه التحاقی بوندن طولایی جاهیر متحده ایله مکسیقا جمهوریی بیننده ظهور ایدوب غوادلوپه هیدالغو (۱۸۴۸) معاهده سیله ختام بولان و کالیفورنیا ایله یکی مکسیقا ولایاتنك جمهوریت مغلوبه طرفندن جاهیر متحده یه ترکیفی انتاج ایدن محاربه و جنوبی آمریقا ده دخی فرانسه ایله انگلتره نك آرژانتین حکومتی امورینه حرباً مداخله لر یله نهایت جزال روسانك دیقتاتور لکنک تصدیق و قایعیدر .

دور مذکورده بین الدول الکی زیاده مذاکراتی موجب اولان

مسئله اسرای زنجیه تجارتی خصوصی اولغله تجارت مذکورهنك صورت ظهور و الغاسی حقننده بروجه آتی بعض تفصیلات اعطاسی مناسب کورلدی :

آمریقا قطعه سنك اوروپالیلر طرفندن کشفنی متعاقب قطعه مذکوریه حاکم اولان اسپانیولار اوراده کی معادننده ایشلتک وسائر امور ذرعیهده قوللانق اوزره آمریقا اهالی اصلیه سنی استخدام ایلکده و اهالی مزبوره بویله اعمال شاقه یه الشقین اولدقلرندن پیدرپی محو و تلف اولمده و مقدار لری دخی ازالمده ایدی اراضی جدیده نفوسنك بو وجهله ازالمسی و بوکا سبیده اعمال شاقه ده استخدام لری کیفیتی اولسی بعض انسانیتکارانك رفع صدای شکایت ایلرینه و بونئرک افاداتی اسپانیا حکومتی طرفندنده اهمیتله تلیقی ایلدلمسینه باعث اولغله آمریقاسی اهلینک تناقص نفوسنی بادی اسبابی تحقیق ایلک اوزره مشاهیر ره باندن لاس قازاس سوق و اعزام ایلدلمش و مومی الیهک توصیه سی اوزرینه یرلیلرک استخدامی منع ایدیلرک یرلرینه افریقای غربی سواحلندن کله زنجی اسرانك قوللانسی تخت قراره المشدر .

زنجیلر آمریقانك هواسیله پک کوزل امتزاج ایلدکلرینه وقوت و صلابت بدنیله ی حسیله ذراعجه چوق ایشه یرادقلرینه مبنی مستملکاتنده ساکن اوروپالی مهاجرلر طبیعی بونئرک استخدامنه میل و رغبت کوستردکلرندن اسرای زنجیه

تجارتی پک چوق کسب توسع ایشددر . تجارت مذکورهنك اهمیتی برارهلق او قدر آرتمشدیکه اوترخت معاهده سنك بر ماده سننده انکلتره تبعه سنك اوتوز سنه مدت هر سنه اسپانیا مستملکاتنه ۴۸۰۰ اسیر ادخال و فروخت ایتک حقنه نائل اوله .

جتلری درج ایدیلرک انکلتره یه بر اسپر جیلک امتیازی و یرلمش وانکلیرلر حاصلاتی زیاده اولان امتیاز مذکور ی بالسهوله غائب ایتک ایستمدکلرندن اکس لاشاپل معاهده سننده بو حقنك مدت اجراسی درت سنه ده اتمدید اولندیغی بیان اولمشدر .

غریبدرکه او زمان انک زیاده اسارت طرفداری بولنسان دولت انکلتره اولوب حتی آمریقا ده کائن و اون سک زنجی عصرک اوائلنده انکلتره مستعمراتندن معدود اولان مساجوزت و پنسلوانیه اداره لری او وقت اسارتی کلیاً الغایه تصدی ایلدکلری حالده انکلتره حکومتی بوکا مانع اولمشدر .

فقط فرانسه انقلابنك ظهورندن صکره پیدرپی افکار انسانیت کارانه نك انتشاری و باخصوص علم ثروت مللک زمانزه ده کی طرز جدیدینی بالا کتساب اصول قدیمه دن تباعد ایلسی اوزرینه عالم مدنیجه بر ذل اولان بو تجارت غیر مشروعه علیهنده نشریات عدیده رونما اولغله باشلامش و باخصوص بو نشریات انک زیاده انکلیر افکار عمومیه سی اوزرینه اجرای تأثیر ایلش اولغله عصرمن ابتدا سننده انکلتره پارلمنتوسی انکلتره و مستملکاتنده اسارت اصولنی الغا ایدیحی بر قانونی

قبول ایله موقع اجرایه قوش و دانیارقه و فلنک کبی صاحب
مستملکات اولان بر ایکی دولتده بو اثره بالاقترضاً انلرک
ممالککنده عادت وحشیة اسارت ختامپذیر اولمشدر .

زمان مذکورده بالجمله اوروپا دولتریله محارب اولان
وهر حال و حرکتیه باخصوص انکلترهیه معارض بولنان
فرانسه ایمپراطوری پوناپارطایسه فرانسه مستملکاتنده اسارتی
بر درلو الغا ایتماکله یوحال انکلتره نکل الغای اسارت خصوصنده
دها فعالانه بر وظیفه درعهده ایلمسی موجب اولمش وانکلیر
سفائن حربیه سی تصادف ایلدکلری سفائن اجنبیه دروننده
فرانسه تبعه سنه عاقد اسرای زنجیه بولنوب بولندیغنی اکلامق
ایچون بحرأ اجرای تفتیشه باشلامشدر .

پارس قونغرہ سی اثناسنده انکلتره مرخصی بولنان لورد
قاستلریغ اسیر تجارتنک الغاسنی بر مسئله دولیه شکنه وضعله
احکام عهده صرہ سنه کچیرمک اوزره تشبثده بولنمشده
اون سکرنجی لوئی اداره سی بو تدبیر فرانسه جه مضر اوله جغی
بیانیله مخالفت ایلمسی اوزرینه تشبث واقع ثمره پذیر اولمامشدر .
فقط الیه اطه سی عودتدن صکره ناپولیون اوروپا افکار عمومی
سنه قارشو بر جیلله اولمق اوزره فرانسه متصرفاتنده
اسارتی بافرمان الغا ایلمسی اوزرینه واترلوی متعاقب مقام
حکومه کچن بوربونلر دخی خصم سیاسیلرینک اشبو فرمانی
احکامنی ناچار تأیید و تصدیق ایلمشدر مع مافیہ بو فرمانک

الغای اسارت خصوصنده فرانسه و مستملکاتنجہ بر بیوک
فائده سی کورلماشدر .

ویانه قونغرہ سنده انکلتره مرخصی لورد قاستلریغک
همماتی سایه سنده اسرای زنجیه تجارتنک الغاسی خصوصی
تکرار موقع تذکره قونیلررق تنظیم اولنان معاهداته بوکا
مخصوص بر پروتوقول علاوه ایلمش و مذکور پروتوقوله
اسارت مغایر انسانیت و اخوت بشریه بر قاعده ذمیہ اولغله
الغاسنه سعی و غیرت عموم دولترجه مصمم و مقرر اولدیغی ومع
مافیہ دفعه الغاسی بعض ممالک امور مالیه سنجه تشوش کلی بی
موجب اوله جغی درکار بولندیغندن هر دولتک الغای اسارت
ایچون وقت مناسب و مساعدی بکلیمکده مختار اوله جغی تذکار
ایلمشدر بو مساعدنن بالاستفاده فرانسلر بر مدت فعلاً امر
فرمانی اجرا ایلمشدر و حال حربک انقطاعیله تفتیش سفائن حتی
دخی منقطع اولغله انکلیرلر بو خصوصده برشی یا پیغه موفق
اوله ماشدر .

اسپانیا دخی محافظه اصول اسارتده تعند ایلمکله نهایت
انکلتره دولتی اسپانیا ایله ۱۸۱۷ سنه سنده بر معاهده مخصوصه
عقد ایلمش و بونکله بو دولتک انکلتره دن تضمینات مقامنده
درتیوز بیک لیرا اخذ ایدرک بوکا مقابل خط استوانک جهت
شمالیه سنده کی مستملکاتنده اسرا تجارتنی قطعیا منع ولغو ایلمسی
قرارلشدر .

ویانه معاهده سنک اسارته دائر پروتوقولی پک صورت
عمومیه ده محرر بولنسی و هر دولت اساساً اجرا آتنده سربست
قالوب تفتیش سفائن حقنک دخی انقطاعیله اسیر تجارتنی التزام
ایدن دولتینسه کما فی السابق تجارت مذکوریهی ادامه اینظریله
انگلتره دولتی دول سائره ایله متفقاً بر تفتیش مشترک سفائن
قاعدسی وضعی ایچون چوق چالشمش و بو خصوصده بین الدول
مذاکرات مدت مدیده اوزایه رق نهایت ۱۸۴۱ سنه سی کانون
اولنک یکرمنجی کونی لوندرده اوستریا روسیه فرانسه
انگلتره و پروسیا حکوماتی بیننده بر معاهده مخصوصه نیک امضا
اولنسیله بر از تسویه بولنه کیرمشدر .

معاهده مذکورنک برنجی ماده سنده حکومات متعاهده
کریک تخت تابعیتلرنده بولنان سفائن و کریک تبعه لری سرمایه سیله
اسرا تجارتنی اجراسنی قطعياً منع ایده جکرینی و بویله بر تجارت
قورصانلق عد اولنوب اجراسنه قالمشه جق سفائنک منسوب
اولدیغی دولت جایه سنندن مستفید اوله میه جغنی اعلان و بیان
انلش لردر . بوندن بشقه مآذونیت مخصوصه بی حائز سفن
حربیدنک دول متعاهده دن بری باندیره سنی حامل اولوب بحق
جالب شبهه اوله جق هر تجار سفینه سنی تفتیش و تحری به حتی
اوله جغنی و بو حق تفتیشک ساده بحر سفید داخلنده جاری
اولمامسی بیان ایدیله رک حق مذکورک جاری اوله جغنی اقسام
بحریه نیک حدودی تصریح و صورت تفتیش و تحری به دائر بر

طاقم تفرعات توضیح قلمشدر معاهده مذکوریهی فرانسه
مرخصی امضا اینلشسه ده حکومتی تصریح اینلدیکنندن ساده
دول اربعه سائره ارسنده مجبوری الاجرا قالمشدر .

لوندره معاهده سنندن ک زیاده انگلتره نیک استفاده ایلدیکی
در کار اولوب چونکه دول ممضیه سائره نیک بحر محیطده کلی
سفن حربیه لری اولدیغندن انگلیز دوتیمالی عمومی صورتده بر
دکز ضابطه لکی وظیفه سی ایفا اینلش بولنیوردی جاهیر متحده
دخی سبب مذکوره مبنی مدت مدیده انگلتره نیک مطالباتنه مخالفت
اینلش رسنده عاقبت الامر ۱۸۴۲ سنه سی اغستوسنده واشنگتون
شهرنده بین الدولتین بر معاهده امضا ایدیلوب بری انگلیز و بری
آمریقالی اولوق اوزره ایکی دوتیمانک آفریقای غربی سواحلنده
صورت دائمده کشت و کذار ایدرک اورالردن اسرا
چیقارلاماسنه دقت ایده جکرینی و بوندن بشقه اساساً آفریقاده اسیر
صامتلامسی ایچون اخراجاتنگاه اسرا اولان محللر حکوماتی
نزدنده صورت مشترکده تبلیغات مؤثره اجرا اولنسنی تخت
قراره آلمش لردر .

۱۸۴۵ تاریخنده دخی معاهده مجوشه نمونه سنه توفیقاً و فرانسه
ایله انگلتره ارسنده بر معاهده عقد ایدیله رک بوندن خود بخود
تحری و تفتیش سفائنک جوازینسه دائر معاهدات قدیمه احکامنک
فی مابعد جاری و معتبر اولیه جغنی، متعاهد دولتلردن هر برینک
افریقا صولرنده یکریمی التیشرف سفینه دن مرکب برر دوتیمالی

بولنوب مذکور دو تملار قوماندانلری دولتین تبعه سی کیلرینک
اسرا تجارتیه وساطت ایلاملری اسبابی بالاستشاره تدابیر لازمه بی
اتخاذ ایدم جگاری، همه حال استعمال قوته احتیاج کورلدیکی
صورته دیگر طرفک موافقتی منضم اولینجه هیچ بر طرفدن
بوکی تدابیر شدیدیه مراجعت اولنه میه جغی فقط کیف مال التفق
بر باندیره چکلهمی سفینه نک تابعیت صحیحه سنه علامت اوله میوب
هر حرب سفینه سیده قورصانلغندن شبهه ایتدیکی کیلری ضبط
ومصادره حقنه مالک بولندیغندن بو خصوصه قوماندانلره
تعلیمات مخصوصه کوندریله جکی، حشمتلو قرانسه قرالی وانکلتره
قرالیمه سی حضرانک بالجمله ممالک ومستعمراتلرنده اسرا تجارتی
الی الابد منع ونهی ایلیمه جگاری ومعااهده نک اون سنه مدته عقد
اولندیغی ومع مافیه بش سنه مرورنده متعاهدینک دوام اجرا
ویا تعدیل والغاسی خقنده تکلیفاتده بولنمغه حقلمی اوله جغی
وخصوصات سائره درج ایدلمشدر .

انکلتره نک تفوق بحریسنی اک زیاده چکه میان فرانسه
و آمریکا دولتلری بو وجهله معاهدات مخصوصه عقیده بحفاظه
حقوق حکمرانی ایلشدر و او وقتدن بری اسرای زنجیه تجارتک
الغاسی مسئله سی بر حل قطعی جهتنه طوغری پک چوق مسافه
قطع ایتشدر واقعا بره زیلیا وسائر بعض حکومت انکلتره ایله
حق تفتیش سفائنندن طولایی مشکلات احدائندن خالی قالماشلر سده
جمله سی پیدرپی داخل دائره معاهدات اولمشدر حتی اخیراً

بحر احمرده تفتیش مشترک سفائن حقنی تنظیم ایچون حکومت
سنیه دخی انکلتره ایله عقد معااهده ایلشدر .
بومدت ظرفنده کسب شهرت ایدن علمای حقوق دولدن آمریقالی
ووتونک (۱۷۸۵-۱۸۴۸) تالیف ایلدیکی «اوروپا و آمریقاده حقوق
بین الدولک ترقیاتی تاریخی» بحق بویولده کی آثارک انکلتره
عد اولندیغی کی مباحث حقوق بین الدول نام اثری دخی
تصنیفات مدونه صره سنه یکممشدر و ویتونک اتاری اوورنس
ودانا نام ذوات طرفلرندن شرح ایدلمشدر .

ینه آمریقا محکمه عالییه سی اعضاسندن جیمس کنتک (۱۸۲۶)
آمریقا قوانینی شرحی نام اثری ایله مومی الیهک هم مسلکی
جوزف ستورینک (قوانین اجنبیه و مدنیته نک اختلافاتی) نام
تالیفی شایان استفاده آتاردن اولوب بونلرک پک چوق مباحثی
پارس دعوی و کیلارندن فه ایکسک حقوق خصوصیه بین الدول
نام اثرنده خلاصه ایدلمشدر .

آلمانیا حکماسندن هیکل حکمت حقوقه (۱۸۲۴) دائر
کتابنده منشأ حقوق اولمق اوزره سوابق تاریخییه عطف
اهمیتله قانتک صلح دائمی حقنده کی تصوراته اشتراک ایلامشدر
ینه آلمانیا رجالندن و مشاهیردن قلوبرک (۱۷۶۲-۱۸۳۷)
اوروپا حقوق انمی نامنده بولسان و بری حقوق قطعیه دوله
دیگری حقوق مشروطه دوله راجع اولمق اوزره ایکی قسمه
منقسم اولان اثری حسن ترتیب و تحریرینه مبنی حالا ابادی
ارباب فنده دائر بر کتاب معتبردر .

بارون شارل دو مارتنس دخی حقوق اہم مسائل مشہورہ سی نام
تصنیف پر دقایقہ دیپلوماسی مامور لری و شہبندری و ظائفہ
دائر اثر معروفی بودوردہ تألیف ایلشدر .
مارتنس ایله و اتلک اثارینہ حاشیہ نویسلک ایلش اولان
پورتکیرلی پینیر و فررار ا تلخیص حقوق عمومہ سیلہ معروف قدر .
قونت دو غاردنک دیپلوماسی فنی ایله و استفالیہ عہدندن
صکرہ تنظیم اولنان مصالحہ نامہ لہہ دائر آثار جسمیہ سی
مصنفات مقبولہ دندر جنوبی آمریقالی آندره بلو، ژوزف ماری
دہ پاندو، دو قنور اماچو آلقورتا واسپانیالی آنتونیو ریکام
و پدرو ولویز سانشر نام مؤلف لہہ اولدچہ مشہور درلر .
برلین دارالفنونی معلمندن ہفتلرک اوروپا حقوق جدیدہ
دولی اسمندہ کی تألیفی دخی مارتنس و قلوبریک اثار دزجہ سندہ
مرغوب و مقبولدر . محاربه بحرہ زمانندہ بیطرف ملتلرک حقوق
ووظائفہ دائر موسیو ہوتفویک اثر مشہوری دخی ۱۸۳۸ دە
نشر اولمشدر .
ویانہ قونغرہ سی ایله پارس معاہدہ سی بینندہ شرحہ پک
مہم وقوعات ظہورہ کلوب حقوق دولہ تحولات کلیہ بی
انتاج ایلش و بو بحث ایسہ ذاتاً اوزامش بولندیغندن انلرک
مبحث آئیدہ ذکر اولنملری مناسب کورلمشدر .

۳

ویانہ قونغرہ سندن پارس معاہدہ سنہ قدر (ما بعد)
ویانہ قونغرہ سنی متعاقب امور داخلہ دولہ مداخلہ نک
قاعدہ حکمنہ قونلدیغنی و بومداخلہ دە دائماً اقوام عاصیہ
وباغیہ بی دائرہ اطاعت و انقیادہ ادخال ایلک جہتنہ مصروف
بولندیغنی بحث سابقہ بیان ایلشدک ینہ بو اصول مداخلہ
آثار ندبری آئیدہ موضوع بحث ایدیلہ جکسہ دە بورادہ مقصد
مداخلہ عصیان ایدن قومی حکومت مشروعہ متبوعہ سندن
کلیاً تبعید و تفریق جہتنہ معطوف اولدیغنی دخی کوریلہ جکدر کہ
بو تبدل مسلکدہ اوروپانک پک چوق خصوصاً اندہ ارائہ دن خالی
قالدیغنی خرسٹیانلق تعصبندن بشقہ برشینہ محمول اولہ مز .
روسیہ بی استنادکاه انخاد ایلش بولنان برطاقم خفی فساد
قومیتہ لری و باخصوص بولنرک ریسی بولنان مشہور ایدسیلانکی
چوق مدتدبری حصولہ چالش دقلری مقصد مالک عثمانیہ دە
ساکن بالجملہ روم اہالینک حکومت سنیہ دن بالتفریق نائل
استقلال ایدلسی اولوب بوکا مقدمہ اولمق اوزرہ ۱۸۲۱ سنہ
میلادیہ سندہ اولاح ایله مورہ و جزائر بحر سفیدہ بولنان روملر
رفع لوای اختلال ایلشر ایدی بو اختلالک ظہوری اہالی عاصیہ
اوزرینہ قوای عثمانیہ سوقنی و اولاح قطعہ سنک وقایہ آسایش
ضمنند عسا کر عثمانیہ طرفندن تحت اشغالہ آلمسنی ایجاب

ایلیکله بو حال روسیه ایله دولت علیه آره سنده بادیء اختلاف اولدیغی کبی دیگر طرفدن اوروپا دولتلریده ناپولی واسپانیاده یاپدقلى ككې ارباب قیامك تأدیبی خصوصنی حکومت مشروعیه برابق و بلکه ده بزه معاوتده بیله بولنیق لازم کلیرکن بالعکس روملی التزامه باشلامشروحتی انکلتزه دولتی جنله دن اول یونانی بر قوم محارب اولق اوزره طانیهرق محاربه بربیه و بحریه حقوقدن حق استفاده سنی قبول ایلشدی حالبوکه قواعد علیه نظرأ قانون خارجنده بر هیئت اولغله بو حقوقدن مستفید اوله مزی . اوروپا لیلر بونکله ده قناعت ایتیموب دوق دووه لانفتونک سفارت مخصوصه ایله انکلتزه جانبدن پترسبورغه اعزامی اوزرینه روسیه وانکلتزه حکوماتی ۱۸۲۶ سنه سی نیسانده عقد ایلدکاری برپروتوقوله محاربه حاضره بیه بر نهایت ویرمک اوزره عرض توسطله یونانستانک حکومت سنیه بیه خراجگذار بر هیئت سیاسییه اوله رق تشکیلنی قبول ایلشار و پروتوقوله صکره فرانسه ده اشتراک ایتشدی دول مذکوره مؤخرأ بو خصوصه دائر بر معاهده عقد ایدرک بونکله در سعادتده کی سفیرلی واسطه سیله باب عالی نزدنده عرض وساطت ایده جکارینی بولنه جق صورت تسویه مقدمه کی پروتوقول حکمنه موافق اوله جغی و اداره جدیده نک حدود و وسعتی ایلروده تعیین قلنه جغی خصوصاتنه قرار ویرلمش و عهدنامه بیه برده ماده خفیه علاوه اولنه رق بونده دول ثلثه تک

همان یونان ممالکنه قونسلو سولر و مأمورین ممالله اعزام ایدرک مناسبات تجاریه احداث و تأسیسه غیرت ایده جکاری درج اولمشدر . بوضورت تسویه پک زیاده ایشلرینه کلان روملر در حال توسط واقعی قبول ایلشلسده حکومت سنیه قبول ایتماکله محاربه بیه دوام ایش و دول متوسطه ایسه او وقت بسبتون دائره حق و معدلتدن انحراف ایدرک ناوارین لیمانده بولسان عثمانلی دونماسنی طوپه طوتوب احراق ایلدکن و بوضورتله ارباب اختلالی لایق اولدقلى حده تأدیدن قورتاردق ذنصره موره شبه جزیره سیده بر فرانسه اردوسی طرفندن بالاشغال یونانستانک استقلالی تصدیق اولمشدر .

اوستریا و پروسیا دولتلری بو حرکت التزامکارانه بیه اشتراک ایتدکارندن طولانی سزاوار تبریک اولوب دول ثلثه نک معامله لری ایسه ازهر جهت مغایر حقوق دولدر و مداخله قاعده سنک تأسف اولنه جق درجده برسؤ استعمالی دیمکدر . پک چوق اوروپالی مؤلفر یونانک استقلالنی بلجیقناتک استقلاله مقیدس طوتاجق صورتده اداره کلام ایدرلر سده بویکی وقعه تاریخیه آره سنده پک کلی فرقلر بولندیغی جای انکار اوله مز :

اولا بلجیقنات قطعده سی فلنکه ویانه قونغره سی طرفندن الحاق اولمش و بونده اهلینک تمینات و آمالی نظر دفته آلمدیغی مثاللو فلنکه کده اساساً بلجیقنات لیلر اوزرینه برکونه حق حکومتی مفقود بولمشدی حالبوکه موره قطعده سی حکومت عثمانیه طرفندن فتح

ایدیلهرك اساساً حقوق بين الدوله معتبر اولان بوحق فتحده در تيوز سنه لك بر مدت تصرف و اداره ايله تايد ايشدى .
ثانياً بلچيقا قطعہ سی جسامتجه فلنکه معادل و اهالیسنک عددنجه اکا فائق اولوب بلچيقا لیلرده هم جنس و هم مذهب بولندقلرندن و ایچلرنده هیچ بر فلنکلی بولندیغی کبی صورت دیکرله فلنکه معناً کسب مربوطیت ایده جک قدر زمانده مرور ایلدیکندن و یانه قونفره سنک تشکیل ایلدیکی هیئت اجتماعی بی یوزمق خصوصنده کی املاری شایان اسعاف اوله بیلوردی حالبوکه یونانستان ممالک عثمانیه نک بر جزؤ اصغری بولندیغندن اقسام سائر سنه پک چوق روابط و منافع ايله مربوط بولندیغی کبی سکنه سی میاننده ده پک چوق مسلمان موجود ایدیکه بو اهالی اسلامیه روملر طرفندن قتل و تنکیل و یاطرد و تبعید اولندقلری حالده اوروپانک انظار مرحتی هر فصلسه بوکا منعطف اوله ماماشدی .

ثالثاً دول معظمه نک بلچيقا امورینه مداخله سی بلچيقا لیلرک ذاتاً بر اداره تشکیل و حکمدار لرینی بیله انتخاب و تعیین ایلری اوزرینه وقوع بولمشدیکه لایقیده تأمل اولنورسه فلنک حکومتی تکرار بلچيقایی ضبط و استیلادن بیله عاجز ایدی حالبوکه ناوارین محاربه سی و دول ثلثه نک توسطی هنوز یونان ارباب اختلالی بردولت تشکیل ایده میوب بر لرینه معارض بر چوق رؤسا آره سنده منقسم اولدیغی و عصیانک کاملاً تأدیب اولتیق اوزره بولندیغی بر زمانده وقوع بولمخله حقیقتاً غرائب اجرا آندن اولمشدر .

روم فترتک ظهور ندن ناشی اولاحک عساکر عثمانیه طرفندن اشغالندن طولانی روسیه ايله تحدرت ایدن اختلافه آقکرمانده امضا اولنان بر مقاوله نامه ايله موقتاً ختام ویریلوب بو مقاوله ايله اولاحک حال سابق بالابقا هوسپودار لرینک روسیه و حکومت سنیه نک موافقت مشترکه لريله عزل و نصب اولنه جقلری و صربستانک مختاریت اداره داخلیه سی مظهر رعایت اوله رق بو خصوصده کی بکرتت عهدی احکامی تماماً اجرا ایدیله جکی و صربستان قلعه لرنده بولنان اهل اسلامدن ماعدا داخل مملکتده اهالی اسلامیه اسکانه مساعده اولتیه جعی تقرر ایلشسه ده بو مقاوله نک اجرا سنجه متحدث بعض مواعدن طولانی ینه دولتین بیننده اعلان حرب ضرورت کورلمش و روسیه نک نائل غلبه اولدیغی بو محاربه یه (۱۸۲۹) ده عقد اولنان ادرنه عهد نامه سیله ختام ویرلمشدرکه بو معاهده نک احکام مهمه سی بوجه آتی نقل ایدیلور :

(۱) روسیه عسکرینک اشغال ایلش بولندیغی بغداد اولاح بلغارستان و سائر روم ایلی ممالکنک تخلیه سی (۲) پروت نهرینک روسیه نک حدود جنوبیه سی اوله رق قبولی ايله طونه نهرنده روسیه و عثمانلی سفائنک سر بستجه سیر و حرکتلری و روس حرب کیلیرینک پروت نهریله طونه نک نقطه التحاقلرندن ایلرویه کتمکه جقلری اوله مامسی و روسیه ده قالان اطهار اوزرنده هیچ بر استحکام انشا اولنه میه جعی مثللو

قارانتنه لر ایچون لزومی اولان سفائندن بشقه اوحوالیده روس
سفن حربیه می بولنه مامسی (۳) کورجستان جهتندن دولتین
حدودینک صورت مکملده تحدیدیه بر مقدار اراضینک روسیه
ترکی و بوکا مقابل قارص ارضروم اردهان بایزیدکی تخت
اشغالده بولنان ممالکک روسیه طرفندق تخلیه سی (۴) اولاح
وبغدانک امتیازات قدیمه لرینی محافظه ایدرک مختاریت اداره لرینه
دخل و تعرض اولنامسی وهوسپودارلرک قید حیات شرطیه
نصب و تعینلری وطونه نهرینک ساحل یسارنده مسلمانلرک اسکانه
حقلری اولنامسی (۵) صربستانه دائر آفکرمان مقاوله سی
احکامنک باب عالی جانبندن سرعت اجراسی (۶) روسیه
تبعه سنک معاهدات سابقه ایله معین حقوق تجاریه دن کماکان
مستفید اولملری وقره دکزده سربستی تجارته خلل کتیرلمیه رک
کرک روسیه وکرک سائر دوست دولتلر سفائینک چناق قلعه
وقره دکز بوغازلرندن سربستجه مرور حقنه نائلیتلری (۷)
روسیه نک قره دکزده کی سربستی سیر سفائیننه دولت علیه
جانبندن اصلا دخل و تعرض اولنامسی (۸) حکومت سنیه نک
مسئله یونانیه دائر دول ثلثه معاهده سنه موافقتی (۹) صورت
مخصوصه ده تعدیل و الغا ایدلیان معاهدات سابقه احکامنک
مرعیتی .
یونان قیامنک اندفاعیه ادرنه معاهده سنی متعاقب حکومت
سنیه نک باشنه بریونک غائله ده اچتمش یعنی والی مصر بولنان

محمد علی پاشا اعلان عصیان ایله سوریه واطنه بی بالاستیلا
کوتاهیه اوزرینه طوغری یوریمکده بولمشدی بوتهلکه نا-
کهظهور اوزرینه باب عالی طرفندن اوروپا دولتینک توسطنه
مراجعت اولمش سنده دول مذکوره مداخله بی قبول ایتدکارندن
وروسیه دولتی ایسه درحال در سعادت جوارینه بر دونما
وعساکر کافیه ارسال ایله مدافعه دولته شتاب ایلدیکندن
حقوق سلطنت سنیه نک مدافعه سی ایچون سلطان محمود ثانی
طاب ثراه حضرتلری روسیه دولتی ایله خنکار اسکله سنده بر-
تدافعی معاهده (۱۸۳۳) عقد ایلش لر درکه بونک احکامی (۱)
مقصد اتفاق دولتین متعاهدین ممالکینک متقابلاً هر در لوخللدن
وقایه سی اولغله بو مقصدک حصولی ایچون لازمکلان معاونت
طرفیندن اجرا اولنه جغی (۲) ادرنه معاهده سیله یونانه دائر
مقاوله احکامنک کماکان معتبر بولمسی (۳) ذات شاهانه معاونت
طلب ایلدکاری حالده روسیه ایمپراطورینک لزومی مقدار عساکر
ارسال ایدرک قومانده لرینی دخی دولت علیه بر اقا جغی (۴)
دولتین متعاهدیندن هانکیسی دیکرندن معاونت طلبنده بولنور
ایسه عساکرک امر اداره و اعاشه سی دخی اکا عائد اوله جغی
(۵) معاهدنک هر نقدر الی لابد دوام ایتسی ارزو اولور سنده
بعض وقایع تعدیلنی ایجاب ایله جکندن شمیلک سکر سنه
مدتله جریاننی خصوصاتی اولوب معاهده یه منضم بر ماده خفیه
دهده دول اجنبیه سفائن حربیه سندن هیچ برینک چناق قلعه

و بحر سیاه بوغازلرندن مرورینه طرف باب عالیدن مساعده اولنماسی درج ایدلمشدر .
 خنکار اسکله سی معاهده سنک امضا اولندیغی صروده محمد علی پاشا ایله دخی کوتاهییه مقاوله سی عقد اولنهرق و مشارالیهه مصر و سوریه ولایتلری اداره سی ایله اطنه نك اداره مالیه سی توجیه ایدیلهرك عصیان موقتاً توقیف اولندیغندن روسیه نك معاونت عسکریه سنه احتیاج قالمشمسده ینه بو ایکی شرق دولتک عقد رابطه مودت و اتفاق ایتلری اوروپاچه پك زیاده جالب تلاش اولمش و افکار عمومیه بی مصر مسئله سننده لهزمه چویرمش ایدی او وقت مصره طرفدار اولان فرانسه دولتی ایسه خنکار اسکله سی معاهده سنندن عدم ممنونیتنی رسماً پترسبورغ و در سعادت قاپینتورینه بیلدیرمشدر .
 فقط بر متارکه حکمنده بولنان کوتاهییه مقاوله سی بر قاج سنه صکره بوزبلهرق دولت عثمانیه ایله مصر پاشاسی بیننده آتش حرب تکرار علوریز اولوب او صروده دخی سلطان جنتمکان محمود خان حضرتلری ارتحال ایلکله حکومت سنیه تسویه مسئله ایچون اوروپا دولتترینک توسطنه مراجعت ایلش و تکرار ایشه قارشمیه جق اولورلرسه روسیه نك فعلاً مداخله سنه میدان آچمش اوله جق لرنندن دول معظمه سائرده همان مذاکراته ابتدار ایدهرک بر طاقم مسائل موضوع بحث اولمشدر . اول امرده انکلتزه دولتی محمد علی پاشایه مصرک

اداره سی بر اقوب ممالک سائره سی دولت علیه یه ترك و اعاده طرفنده اولدیغی حالده فرانسه سوریه نك اداره سی دخی کاملاً مشارالیهه بر اقلیق رأینده مصر ایدی و بونك دول خسه مرخصلرنندن مرکب بر قونفرانسده تخت قراره آلمسنی طلب ایلدیکی حالده اوستریا دولتی اکس لاشاپل قونفره سنک بر پروتوقولی موجنبجه خارجدن بر دولته متعلق امور مذاکره اولندیغی صروده او دولتک مرخصی حاضر بولنق لزومی ایراد و روسیه ده ویاننده طویلانه جق بر قونفرانسده اشتراك ایتیه جکنی بیان ایللریله حکومت سنیه نك دخی مرخصی بولنق شرطیله لوندرده بر قونفرانس جمعی قرارلشدیرلدی و اوستریانک تکلیفی اوزرینه بالجمله ممالک دولت علیه نك خانده ان جلیل عثمانی تخت اداره سننده اولنهرق وقایده تمامیت ملکیه سی اساس مذاکرات اتخاذ اولنهرق خصوص مذکورده مؤخرأ عقد اولنان مقاوله نامه نك بر پروتوقولنه درج ایدلدی حتی انکلتزه دولتی حکومت سنیه نك تمامیت ملکیه سی بالجمله اوروپا دولتترینک ضمان و تکلیفی التمه المقلغی تکلیف ایلدیسه ده اوستریا بویله بر تکلیفک عادتادولت علیه اوزرینه بر جایه تأسیس ایدرک استقلالنه خلل کتیرمک اوله جغنی بیان و روسیه ده بو افاده یه اشتراك ایلدکلرنندن تکلیف واقع قبول اولندی ساده روسیه نك حین حاجتده مصر پاشاسنی تأدیب ایچون اناطولی یه براردو و بوغاز ایچنه دوغما کوندره سی و بو صورتده انکلیر دوغماسنک دخی

چنانق قلعہ بی محافظہ ایلسی و ہر حالده بو مداخلہ عسکر یہ نك
حکومت سنیه نك طلب مخصوصی اوزرینہ اجرایی تذکر اولندی .
لوندره قونفرانس نك نتیجه مذاکراتی اولقی اوزره ۱۸۴۰
سنه سی تموزینك اون بشنده بر مقاوله دولیه امضا اولنہرق بونده
خصوصات آتیه یه قرار ویرلدی :

(۱) محمدعلی پاشا و اولاد ذکورینہ مصر و ایلیکی توجیبی
وبوندن بشقہ عکا پاشایی نامیلہ جنوبی سوریه و عکا قلعہ سی
ادارہ سنك دخی مشارالیهہ احالہ سی (۲) اگر محمدعلی پاشا
اون کون ظرفندہ بو صورت تسویہ بی قبول ایلزسہ عکا
پاشالغنگ کنڈیسندن استردادیلہ دیگر اون کون ظرفندہ روی
موافقت کوستردیکی صورتده ساده ولایت مصرک اعطاسی
(۳) پاشانك ویره جکی سنوی ویرکو احتمال اول ویا ثانی یه
کوره تحویل ایلسی (۴) پاشانك بو اون ویا یکر می کون ظرفندہ
عثمانلی دوتماسنی طاویلہ دولته تسلیم واعادہ ایلسی (۵) دولت
علیه نك بالجمله معاهدات و مقاولاتی مصر و عکا پاشالقرندہ جاری
و معتبر اولسی و فقط محمدعلی پاشانك تخت اداره سنده بولنہ جق
ولایاتده نظام امور ضوع تکالیف ورسومی ذات شاهانہ نك مأموری
صفقیلہ اخذ و قبض ایلسی (۶) مصر قوای بریه و بحریہ سنك
دولت علیه عسکرندن معدود اولسی (۷) یکر می کون ظرفندہ
محمدعلی پاشا بو صورت تسویہ بی قبول ایلزسہ معاهدہ حکمسنر
قالوب ذات شاهانہ سربستی حرکتی محافظہ ایلسی .

محمد علی پاشا اول امرده حکم معاهدہ بی قبول ایله عرض
تابعیت ایلدیکنندن اجرای احکام عہدینہ یه تشبث اولنہرق
مصر اردولری سوریه و عربستان و کریددن چیقارلدی مشار
ایله ایسہ و خامت عاقبتی اوزمان ادراک ایدرک دربار معدلتقرار
سنیه یه دوشوب اطاعت کاملہ کوستر مکله بالاده مندرج شروط
اوزره با فرمان عالی ساده مصر پاشالغی کنڈیسنه توجیہ اولندی .
مصرک امتیازاتی او وقتدنبیری شرفصاادر اولان فرامین
همایون ایله خیلی تزید ایدلمشسده بالکز شروط مشروحه ، بر
معاهدہ دولیه دن منبعث اولسی جهتیله ، حقوق دول احکامندن
اولوب الغاسی متعاهدینك رضالینہ معلقدر صکرہ کی فرامین
همایون احکامی ایسہ عادتاً برر نظام شکائندہ بولنمقلہ دولتک
بسبتون حقوق عمومیہ داخلیه سنہ متفرع واددرکه ، طرف
سلطنت سنیه دن حسن استعمال اولنہ جقلری تصوریلہ احسان
بیورلمش اولمقلہ مضرتلری تبین ایلدیکی حالده ینہ الغاری
حقوق منحصرہ حکمداری ذمرہ سنندندر اشخاص حقوق
بین الدول نامیلہ در دست نشر بولنمان اثرده بو خصوصه دائر
ایضاحات لازمه ویریلہ جکدر .

لوندره مقاوله نامہ سی مذاکره و تنظیم اولنڈیغی صرهده
حین حاجتده انکلتره و روسیہ دوتمالرینك وقوعبولہ جق طلب
اوزرینہ بوغازلری مرور ایده ییلہ جکلری درمیان ایدلمشسده
بو خصوصک بوغازلردن اجنبی سفن حربیہ سی مرور ایتماسنه

دائر اولان قاعده قدیمه سلطنت سنییه خلیل کتیرمیه جکی
دخی سویلنلمشدی . بوقاعده بی برقائدها تأید ایچون لوندرده
مجمع دول معظمه مرخصری تکرار عقد اجتماع و فرانسه بی
دخی مرخص اعزامنه دعوتله ینه ۱۸۴۱ سنه سی تموزینک
اوتوز برنجی کونی بوغازلر مقاوله سی نامیله مشهور مقاوله بی
امضا ایشلردر . مذکور مقاوله نیک برنجی ماده سننده ذات
شاهانه نیک ، صلح زماننده بوغازلردن اجنبی سفن حربیه سی مرور
ایتماسی حقنده کی قاعده قدیمه دولت عثمانیه بی ، محافظه و وقایه ایلنک
املنده بولندقری و دول معظمه خسه نیک دخی اشبو آرزوی
پادشاهی به رعایتی تعهد ایلدکاری مندرج اولوب ایکنجی ماده ده
ذات شاهانه بوقراری اعلان ایلدکله برابر در سعادتده کی دوست
دولتله سفارتلری نزدنده بولنان کوچک سفائنک مرورینه
مساعده و یرمک حقنی محافظه ایلدکاری و اوچنجی ماده ده دخی
حکومت سنییه نیک اشبو حکم مقاوله بی سائر دوست حکومانه تبلیغ
ایدرک انلرک دخی موافقتلرینی رجا ایده جکی یازمشدر .

بوصورتله هر دولتک سواحلندن اوچ میل آچغه قدر حق
حکومتی حائز بولنسی اساسی بوغازلره بالتطبیق حکومت
سنیه نیک بوبابده کی اصول قدیمه سی اوروپا حقوق دولیه سی
احکامی میاننه کیرمشدر .

مصر غائله سنک تسویه سنی متعاقب برقاج سنه مدت نسبتاً
بلا وقعه یکم ششده فرانسه ده ۱۸۴۸ سنه سی اختلالنک

ظهوریه اورلنان خانداننک مقام حکمداریدن طردی و جمهوریتک
اعلانی اوزرینه ینه اوروپا احوالی مختل اولمشدر اختلال
مذکورک ظهوری اوزرینه هریرده اهالی اصول اداره قدیمه
علیهنه قیام ایدرک آلمانیا حکومانی ایله اوستریا دولتی طرفلندن
مشروایت اصولی قبول اولمش و آلمانیا و ایتالیا ده اتحاد ملی
آرزولری نمایان اولمشدر آلمانیا نیک هریرنده بر اختلال چیقدیغی
کبی روما اهالی سی دخی پایا علیهنه قیام ایدرک اداره جمهوریه
اعلان ایشلردر که مؤخرأ پایا طقوزنجی پی نیک حکومتی
فرانسه نیک مداخله عسکریه سیله اعاده اولوب رومانک محافظه
سنیده فرانسه درعهده ایشلشدن لهستانده ظهور ایدن اختلال
ویانه قونفره سننده مقررله امتیازاتی بقیه سنک دخی ضیاع کلپسینی
موجب اولوب اولاح داخلنده کی قاریش قتلقر اوزرینه قطعه
مذکوره اوستریا و روسیه و حکومت سنییه طرفلندن آسایش
اعا-ه اولنجه یه قدر موقتاً اشغال اولمش و مجارستانک عصیان
دخی روسیه نیک اوستریا به معاونتی سایه سننده شدیداً تأدیب
ایلمشدر .

فرانسه ده ۱۸۴۸ اختلالنک احداث ایلدیکی جمهوریت

چوق دوام ایتیوب ۱۸۵۰ ده رئیس جمهور اولان پرنس لوئی
ناپولئون ۱۸۵۲ ده کندیسینی آرای عمومی اهالی ایله امپراطور
انتخاب ایتدیرمش و بوصورتله اوروپا احوالنک هرج و مرج
اولوب چله نیک راحتیه احتیاجی اولمشندن روسیه امپراطوری

نیقولا جسارتلنوب دولتعلیه حقنده کی منوی ضمیرینی لاجل الاجرا قدس شریفده کی امتیازات رهبانیسه به دائر اهمیتسز بر مسئله بی بهانه ایدرک حکومت سنیه به اعلان حرب و مملکتینی استیلا و سینوبده کی عثمانلی دونمائی احراق ایله حرب به باشلا. مشهده بر از وقت صکره فرانسه و انگلتره و ساردنیا حکومتی دخی دولت علیه بی التزاماً داخل حرب اوله رق ایکی سنه دوام ایدن محاربه روسیه نك مغلوبیتی ایله ختمام بولدیفندن ۱۸۵۶ سنه سنده پارسده مجتمع و فرانسه انگلتره روسیه اوستریا پروسیا و دولت علیه مرخصلرندن مرکب بر قونفره طرفندن ۳۰ مارته تنظیم اولنان معاهده ایله جنک وجداله خاتم ویرلمشدر حقوق عهدیه مزك اك بيوك منابعدن اولان معاهده مذکورہ احکام مهمه سی بوجه زیر خلاصه نقل و تزئیر اولنور .

(۱) اثنای محاربه ده طرفین عسکری طرفندن اشغال اولنان اراضینک مقابلاً تخلیه سی . روس عسکری نك ید ضبطنده بولنان قارص قلعه سی و محال سائر نك دولت علیه به اعاده سی . فرانسر انگلیز عثمانلی و ساردنیا عسکری نك ید ضبطنده بولنان سیواستوپول ، یکی قلعه ، قاش ، کرچ ، قلیرونی ، اویاتوریا و سائر بلادک روسیه به اعاده سی . دشمن لهنده داخل محاربه اولان تبعه نك متقابلاً عفو یله بو عفو عزمینک دشمن خدمت و مأموریتنده استخدام اولنانلره دخی شمولی .

(۲) سلطنت سنیه نك بعدما اوروپا حقوق عمومیدسی

منافعندن حصه دار منفعت اولق اوزره اوروپا هیئت دولیه سی میانہ دخولی و سلطنت سنیه به عائد هر بر تعرض و تجا اوزك بعدما منافع عمومیه جه حائز اهمیت عد اولنمسی .

(۳) دول متعاهده بیننده براختلاف تحدی حالنده سلاح قوتیله فصل دعوا یه قالمشتمسزین اولجه دول سائر نك توسط دوستانه لرینه مراجعت اولنمسی .

(۴) ذات حضرت پادشاهینک بلا تفریق جنس و مذهب عموم تبعه شاهانه نك ترفیه و تزئید سعادت کالری ایچون اصدار بیوردقیری فرمان همایون رسماً تبلیغ اولنمغله دول معظمه نك بو تبلیغه بر قیمت عالیه عطف ایلدکاری و معافیله بو خصوصک هیچ بروقت دولت عثمانیه امور داخلیه سنه مداخله ایچون سبب و بهانه اتخاذ اولنه میه جنی .

(۵) بوغازلر حقنده کی معاهده قدیمه نك کما کان اجرایی (پارس قونفره سی طرفندن عقد اولنوب معاهده به ربط اولنان و اوننجی ماده حکمنجه عینیله متن معاهده ده مندرج ایمش کبی حکم و قوتی حائز بولنان بر مقاوله مخصوصه موجبجه اصول قدیمه بالایقاساده سفارت خدماتنه مخصوص سفائن حربیه خقیفه نك مظهر اوله جنی مساعده مروردن هر دولتک طونه قومیدسیونی خدمتنده بولندیره جنی کوچک طوپ چکر و اپورلردخی مستفید اوله جقلردر) .

(۶) قره دکزک حال بیطرفی به وضعیله دروننده تجارتنک

سربستی و بالجملة قلاع و ترسانه لرك قلعي و بعدما انشا اولناملری و سفن حربیه بولنیهرق یالکز سواحل محافظه سی ایچون هر دولتک الی مترو طولنده و نهایت سکز یوز طونیلاتو جیمنده سکز واپوری ایله جمعی ۲۰۰ طونیلاتو بیچمامک اوزره واپور ویا یلکن کیسی اوله رق دردر سفینه سی بر اقلسی (اشبو سفائنک مقداری ینه معاهده یه مربوط بر مقاوله مخصوصه ده مندرج اولوب بحر سیاهک بیطرفلخی ایسه ۱۸۷۱ ده عقد اولنان لوندره معاهده سیله فسح اولمشدر) قره دکزده تجارتک هر درلو موانعدن بری اوله رق ساده موافق بر صورتده تعیین ایدلمش فنار لک صحمیه و لیمان رسومنه تابع بولنسی . روسیه ایله دولت علیه نک طونه قومیسونی رفاقتنه ویره جکاری واپورلک بالاده محرر ترتیدن خارج طو تلمسی .

(۷) انهار اوزرنده سربستی سیرسفائنه دائر ویا نه قونفرده سی مقرر اتک طونه نهرینه دخی تطبیقی ونهر مذکور اوزرنده سیر ایده جک سفائنک هر درلو موانعدن بری اوله رق ساده تزید سیر و سفرلری آرزو سیله تعیین ایدلمش رسومه تابع اوللری . دول متعاهده مرخصلرندن مرکب بر قومیسون طرفندن طونه نهری اغزلرینک تیرنسی ایچون لازم کلان عملیاتک اجرا ایتدیریله لک مصارف واقعه سنک صورت محتمده موضوع رسوم ایله تسویه سی . ضابطه نهره دائر نظاماتی تنظیم ایدرک عملیات لازمه بی یا پدیرمق و نظاماتی اجرا ایتدیرمک و طونه اغزلرینک

سیرسفائنه صالح حالده و قایه سنه غیرت ایلك اوزره اوستریا دولت علیه باویرا و وورتمبرغ حکوماتی مأمورلرندن مرکب بر قومیسون تشکیلی و برنجی قومیسون ایکی سنه یه قدر ایفای وظیفه ایدرک طاغلمسندن صکره اداره نهریه نک بو دول اربعه قومیسوننه احاله و دوری .

(۸) طونه ده سربستی سیرسفائنی ده ازیا ده تامین ایلك اوزره روسیه طرفندن بساراییه نک دولت علیه یه ترکی ایله ولایت مذکور نک بغداد ایالت ممتاز سنه الحاقی و بسارایا لیلرک بغداد لیلره مخصوص بالجملة امتیاز اتدن استفاده ایللری .

(۹) اولاح و بغداد امارتلرینک کماکان تحت تابعیت سلطنت سنیه ده بولنق اوزره اداره داخلیه لرنجه سربستی تام و مختاریتلرینی محافظه ایللری و ممالک مذکور نک اصول اداره . لرینی احتیاجات حاضره لرنه موافق بر وجهه افراغ ایچون بکرشه بر دولت علیه قومیسریله دول معظمه مأمورلرندن مرکب بر قومیسون کوندریله لک انلرک ، بکرشت ویا شده معتبران اهالی دن طوپلانیه جق مجالس امت ایله بالاستشاره ، ارزوی اهالی بی پارسده قونفرانس مرکزینه اشعار ایللری و اوراده دخی موجبجه نظامات لازمه نک بالاتفاق تنظیمی . اشبو امارتلرک کندیلرینه مخصوص قوه عسکریه لری اولسی و خارج ویا داخلده بر تهلکه ظهوری حالنده دولت علیه ویا سائر بر دولتک خودبخود عسکر صوقغه حق اوله میوب اشبو ادخال عسکر خصوصی

امارتینک مختاریت ایدر لرینی تخت ضمان و جایه به المش بولنان دول معظمه ایله بعد المذاکره و الموافقه اجرا اولنه بیلمسی .

(۱۰) صربستان امارتینک کماکان تحت تابعیت سلطنت سنیده اولمق اوزره اداره داخلیه جه محافظه مختاریتی و صربستان قلاعنده قدیمی و جهله عساکر عثمانیه بولنسی .

(۱۱) اناتولی جهتنده روسیه و دولت علیه حدودی حال سابقنده قاهره ابروجه بر مشکلات تحدث ایلامک اوزره حدودک طرفینجه ضرری اولماق شرطیله بر مختلط قومیسون طرفندن منتظماً تحدیدی .

(۱۲) محاربه دن اول دول متعااهده بیننده جاری معاهدات احکام غیر متروکه سنک کماکان مرعیتی .

(۱۳) بالطق دکزنده آلاند اطه لرنده فی مابعد استحکام انشا اولنماسنه دائر روسیه و فرانسه و انگلتره دولتری بیننده آریجه عقد اولنان متاوله نک بو معاهده به منضم عد اولنه رق عینی حکم و قوتی حائز اولسی .

امور شرقیه جه اهمیت عظیمه سی درکار بولنان پارس معاهده سنک خلاصه احکامی بوندن عبارتدر شهر مذکور قونفره سینده کی مرخصلر حقوق بحریه نک بعض مسائل حقیقه قرارلری حاوی برده بیاننامه نشر ایلشدر که بوده حقوق بحریه جه پک بیوک بر اثر ترقی عداولنه بیلور بیاننامه مذکورک وضع ایلدیکی قواعد شونلدر :

(۱) قورصانلق اصولی لغو اولنشدور و فی مابعد ملغادر .

(۲) بیطرف باندره سی ، حرب چاغی مستثنا اوله رق ، دشمن اشیاسنی محافظه ایدر .

(۳) حرب چاغی مستثنا اوله رق دشمن باندره سی تختنده کیدن بیطرف اشیاسنی مصادره اولنه مز .

(۴) محاصرات بحریه مرعی اولمق ایچون فعلی اولملیدر لر یعنی محاصره ایدن دولت دشمن ساحلنی جداً ناقابل تقرب حاله قویاجق قوته مالک بولنمیدر .

اشبو بیاننامه نک احکامی ساده قونفره ده بولنان دول حقیقه مجبوری ایلنده مؤخرأ دول سائره به دخی تبلیغ اولنه رق پک چوقلرینک مظهر تسویبی اولمش و فقط ، سفن حریره لرینک از لغی ملابسه سیله الک بیوک استناد کاهلری سفائن تجاریه لری اولان ، جواهر متحده و بلچیکا حکوماتی قورصانلق (Course) اصولنک لغوینه راضی اولماشلدر .

۴

پارس معاهده سنندن برلین معاهده سننه قدر

پارس معاهده سننی تعقیب ایدن مدت کثرت و اهمیت و قوعا بجه بالجمله ازمنه تاریخیه به فائق اولوب و قوعات مذکوره نتیجه سی اوله رق کره ارضنک پک چوق جهاتنده حال سیاسی تحول

کلی به او غرامش و ویانه و پارس عهدنامه لرینک انک مهم احکامی
مفسوخ و ملغا قلمشدر باخصوص آلمانی و ایتالیایا حکومت
جدیده سنک تشکلی اورویا موازنه عمومیه سی مرکزینی تحویل
و اوستریانک کسب ایلمدیکی حال جدید بودولتک صفت تاریخیه
قدیمه سنی تغییر ایلمدیکی کبی فرانسه و اسپانیا و ممالک عثمانیه
احوالنجیه دخی پک چوق تحولات حیر حصوله کلمشدر ساده
اورویا قطعہ سی دکل آسیا و آمریکا قطعہ لری دخی زمانک پنچه
انقلابندن خلاص بوله میوب فرانسه و انکلتره نک چین ایله محاربه سی
هندک ایمپراطورلق حالنه افرانگی، روسیه نک آسیاجه اولان
ترقیاتی، آمریکا محاربه، داخلیه سی و مکسیقا سفریله لیم قونغره سی
اورالزدهده احوال عمومیه به بر بشقه رنگ و برمشدر .

ایتالیایا قطعہ سی قدیماً بر چوق حکومت صغیره به منقسم
بولندیغی حالده مؤخرآ شمال شرقی جهتلری اوستریانک یدضبطنه
کچمش و هر نقدر ایمپراطور ناپولئون بوناپارط حوالی مذکورہ بی
فتح ایله اولاسزالین جمهوریتنی تشکیل و بعدہ فرانسه به الحاق
ایتمشدهدی و یانه قونغره سی فرانسیز فتوحاتی آثارندن هیچ برینی
براقدیغی صرہده اوستریانک متصرفات قدیمه سیده اعاده اولمشدی
پارس معاهدہ سی زمانده ایتالیایا قطعہ سنک غرب شمالی
طرفی ایکی سچلیا قرالغی نامنی حائر بولنان ساردنیا دولتنی
شمال شرقی جهتی یعنی پووادیسی لومباردیا و ونڈیک قرالغی
نامیله نیم اداره مختاره بی حائر اولمق اوزره اوستریا متصرفاتی

تشکیل ایدوب وسط جهتی دخی پایالق اداره سینله فلورانس
مودن پارم و امثالی برچوق حکومت آره سنده منقسم و جنوبی
ناپولی حکومتی داخلنده بولونیوردی بونلرک جسامت و کثرت
نفوذ جهتیله انک مهمی بوروبون خاندانندن بر شعبه نک سلطنت
ایلمکده بولندیغی ناپولی قرالغی اولوب اوستریا دولتی ایسه
کرک احوال تاریخیه سنندن و کرک مالک اولدیغی ولایات مهمه
و معموره دن طولانی ایتالیاجه پک زیاده حائر نفوذ و اقتدار ایلی
فقط ساردنیا دولتنک او وقتلر رأس ادارهده بولنان مشهور
قونت قلوورک تدابیر مصدیه سی ثمره سی اولمق اوزره قریم
محاربه سنه اشتراکی و خصوصیه به بو اشتراکدن طولانی دول
متفقہ دن هیچ برکونه اعانه نقدیه و سایر معاونت قبول ایتمیره
کنندوسنه بر دولت معظمه سوسی ووروب مؤخرآده پارس
قونغره سنه داخل اولمی حکومت مذکورہ بی افکار عمومیه
نظرندہ بیوتدیکی کبی انکلتره و فرانسه نک دخی ساردنیا حقنده
حسن نظرلرینی استجلاب ایلمش و بو توجهده ساردنیا نک
عموم ایتالیایی داخل حوزه ممالکی ایدرک اوروپا هیئت سیاسیه سی
ارکاننک انک مهملری صرہ سنه کچمسنی مؤدی اولمشدر شوپله که
۱۸۵۹ سنه سنده اوستریایی شمالی ایتالیادن چیقارهرق اورالزه
ساردنیایی صاحب ایتمک اوزره فرانسه ایمپراطوری او چنجی
ناپولئون ایله و یقتورامانوئل بیونده براتفاق عقدایدیلهرک و متفقینک
اطوار و معاملات بارده سی اوستریانک ساردنیایه تجاوزیله دول

ثلثه بیننده اعلان حربی مؤدی اوله رقی ماجنتا و سولفرینوده
اوستریا اردولرینک انہزام کلیسی اوزرینہ عقد اولنان ذورینخ
معاهده سیلہ حربہ ختام ویرلمش و معاهده مذکورہ
موجبچہ لومباردیہ قطعہ سی اوستریا طرفندن ساردینیا
حکومتہ ترک اولمشدر . فرانسه دخی معاونت واقعہ سنہ
مقابل برجیلہ اولق اوزرہ ساردینیا اساساً اھالیسی
فرانسیہ میال بولنان نیس و ساووا و لایتزینی آلمش و بومیلان
اھالی ایسہ آرای عمومیہ مراجعت ایدی لہرک بوولایات سککنہ سنک
فرانسیہ التحاقی آرزو ایلدکری کورلمککہ ثابت اولمشدر ہر نقدن
توسقان و پارم و مودن و حکومت سائرہ نک حال سابق اوزرہ
قالمری ذورینخ معاهده سی احکامنن ایسہدہ اورال اھالیسی
حکمدار لرینی طرد ایدرک ساردینیا اعلان التحاق ایلدکرنن
و بواسولہ ممانعت اوستریانک یداقتدارندہ اولدیغی کبی ساردینانک
حامیسی بولنان فرانسیہ دخی احوال مذکورہ بی فنا نظرلہ
کورمدیکندن آزوقت طرفندہ ساردینیا حکومتی و ندیک مستثنا
اوله رقی عموم ایتالیانک شمال و وسط جہت لرینہ مالک اولمشدر
سادہ بر فرانسیہ مفرزہ عسکریہ سنک تحت محافظہ سنندہ بولنان
روما شہر و حوالیسی ینہ پاپا الندیہ قالہ بیلشدر .
ایتالیانک اتحادینی موجب اولان حسیات ملیہ آلمانیادہ دخی
جاری اولغہ باشلامش و پروسیا دولتی رئیس و کلاسی بولنان
پرنس بسمارق بو اتحاددہ پروسیانک ریاستی احراز ایلسی آرزو سنندہ

بولغملہ المانیا ہیئت متفقہ سی ارکانی میانندہ ال زیادہ نفوذلی
اولان اوستریانک اول امردہ بر کرہ ارادن چیقارلمسی لازمہ دن
بولمشدی فقط پروسیانک اوستریا ایلہ اوغراشہ جق زمانی اولماغملہ
اولجہ دہا کوچک بر دولت اوزرنندہ تجربہ سلاح ایلمک مناسب
کوریلہرک ایسہ مالک اولدیغی شلسویغ و هولشتاین دو قہ لقلرنن
طولایی ہیئت متفقہ اعضا سننن معدود اولان دانیمار قہ دن
باشلانندی . و مذکور دو قہ لقلرک صورت تصرفندن طولایی تحددت
ایدن بر اختلاف بہانہ ایدی لہرک آلمانی متفقہ سی دیت مجلسی طرفندن
آلمانیایہ وکیل مبارزہ تعیین ایدی لان اوستریا و پروسیا دولتری
طرفندن دانیمار قہ یہ اعلان حرب ایدی لوب طبیعی دانیمار قہ نک
مغلوبیتی و شلسویغ هولشتاینک ترکی اوزرینہ حربہ ختام ویرلدی
ایسہدہ ممالک مفتوحہ نک صورت ادارہ سی حقندہ متفقین بر درلو
قرار ویرہ مدکرنن مشکلات متحدہ نہایت ۱۸۶۶ دہ پروسیانک
اوستریایہ اعلان حرب ایلمسی انتاج ایلمدی ایتالیا دخی پروسیانک
متفق صفتیلہ داخل حرب اولوب کرک بر او کرک بحرأ دوچار
مغلوبیت اولدیسہدہ پروسیالیلرک سادو ادہ غلبہ تامہ لری
اوزرینہ پراغده عقد اولنان معاهده صلحیہ بو حرب عظیمہ نہایت
ویردی پراغ معاهده سی حکمنچہ اوستریا دولتی آلمانیایہ ہیئت
متفقہ سننن کاملاً چقمغملہ ہیئت مذکورہ نک ریاستی پروسیا
دولتنہ قالدی و فی الواقع پروسیادہ ۱۸۶۶ تاریخندہ اوستریایہ
طرفدارلق کوسترمش اولان اکثر حکوماتی کاملاً ضبط و الحاق

ایلدیکی کبی سائر آلمانیا حکومانی دخی تدافعی و تجاوزی برطاقم
اتفاق معاهده لریله امور سیاسی لرینی بر درجه یه قدر پروسیا ایله
توحید ایلدیله و بو صورتله ۱۸۷۱ ده اتمام اولنان بنای عظیمک
تملی آتلش اولدی . شلسویغ هولشتاین مسئله سی پراغ معاهده .
سنده دخی مسکوت عنده بر اقیلوب فقط پروسیا دولتی اورالری
ولایات عادیه سی کبی اداره ده دوام ایدرک نهایت بوندن اوچ
درت سنه مقدم آلمانیا و اوستریا ایمپراطور لقری اده سنده قرار کیر
اولان معاهده اتفاقیه ده اوستریانک ولایات مذکوره اوزرنده کی
بالجمله حقوقی پروسیا به ترک ایلدیکی تصریح ایدیله رک بین الدولتین
اختلافات مستقبلیه یی موجب اوله ییله جک اولان بو ایلشک
ختام پذیر اولدی .

ایتالیایا ایله پروسیانک معاهده اتفاقیه لرنده و ندیک ایتالیا یه
الحاق اولمقدجه پروسیانک مصالحه یه راضی اولماسی مندرج
اولوب حالبوکه ایتالیا محاربه ده مغلوب اولسی حسدیله اوستریانک
ترک اراضی به تنزلی قابل اولمدیغندن بر صورت تسویه بولنسی
ایچون و ندیک وجواری اوستریا طرفندن فرانسه یه نقل و فراغ
ایدلش و اوچنجی ناپولئون دخی ولایت مذکور هی ایتالیا یه بلا
بدل ترک ایدرک ذورنج معاهده سیله باشلا دیغنی اثری اتمام ایلشدر
آز مدت صکره جنرال غاریبالدینک مشهور ناپولی سفری نتیجه سی
اولق اوزره طقوز ملیون نفوسی حاوی اولان ناپولی قرالغی
و سجزلیا جزیره سی دخی ایتالیا حکومت جمیدیه سنه الحاق ایدوب

شبه جزیره ده بالکز، شمعی یه قدر محافظه استقلال ایلش بولنان
سان مارینو جمهوریت صغیره سیله پاپا حکومتی خارجه قالمشدر .
پراغ معاهده سنک تأثیر اتندن اولق اوزره اوستریا دولتک
اساس تشکی بر طرز آخره افراغ ایدیله رک دولت مذکوره
اوستریا و مجارستان قسملرینه آیرلش و هر دولتک احوال داخلیه سنده
مستقل و مجالس ملیه مخصوصه یه و برر هیئت و کلا یه مالک اولسی
و فقط اداره حربیه و رسوماتک توحیدیله عموم دولته مخصوص
آریجه بر هیئت و کلا دخی بولنسی و عمومه مخصوص قوانینک
اوستریا و مجارستان مجلس عمومی لری طرفندن و کاله کوندریله جک
اعضوانک اجتماعیه تصدیق و مذاکره اولنسی و رئیس حکومتک
اوستریا ایمپراطوری و مجارستان قرالی عنوانترینی حائز اولسی
صورتلریله اتحاد حقیقی به مائل بر اتحاد شخصی حالی احداث
قلمشدر .

پروسیا دولتی آلمانیا جه توسعنی اکیال ایچون اهمیت عسکریه سی
معروف اولان لوکسمبورغ قلعه سنده عسکر اقامه
سنه حتی اولدیغنی دعوا یه قائمشمشه ده معتراضلرک کثرتند ناشی فصل
مدعا لوندره ده مجتمع بر قونفرانسه حواله ایدیله رک مذکور
قونفرانسه ده لوکسمبورغ قلعه سنک هدمنه و شهرک اداره سی
لوکسمبورغ غراندوقه لغنه حواله اولمشنه قرار و یریله رک
پروسیانک ادعاسی بر طرف ایدلشدر .
مع مافیله پرنس بسمارکک بو خصوصه کی امالندن کلیاً واز

پکم دیکی ولو کسمبورغ غران دو قه لغنی حائز بولنان و ولد ذکوری اولیان فلنک قرالنک و قاتی حالنده مذکور دو قه لغه ، الک زیاده حقوق ارثیه سی و پروسیا به عبودیت تامه سی اولان ، برناسا و پرنسی پکیرمک اوزره تشبثانده بواندیغی معلومدر .

پراغ معاهده سنک عقدی اوزرینه پروسیا دولتنگ نفوذ و اقتداری پک زیاده ترزاید ایدوب المانیاده حاکم منفرد بولنشده مطلوب اولان المان اتحادینی حصوله کتیرمک ایچون ینه بیوک بر مانع قلمش دیکه بوده فرانسه ایدی حتی ۱۸۶۶ و قوعاتی اوزرینه پروسیا به اعلان حرب ایدلمسی فرانسه ده پک چوق ارزو ایدلمکله برابر اوزمان فرانسه اردولری تشکیلاتنگ او درجه ده منتظم اولماسی و باخصوص عسکریک ایکنه لی تفنگ استعمالنه ایشق بولتمامسی اعلان حربک تأخرینه بادی اولمشدی مع مافیله بو تأخر ساده بر قاچ سنه ایچون اولوب ۱۸۷۰ ده ایمپراطور ناپولئون عسکرینگ کثرت و انتظامی حقنده امرادن دیدیغی تأمیناته استناد ایدرک پروسیا به اعلان حرب ایتمکله قرار ویرمش و بوکاده او اثناده ظهور ایدن اسپانیا مسئله سی کوز لجه بر بهانه اولمشدر شویله که اوزمانلر اسپانیا قرالیجه سی بولنان و متوفی اون ایکنجی آلفونسک والده سی اولان ایزابلک اهالی طرفندن رفع حکومتی اوزرینه تشکل ایدن اداره موقته هیئتی پروسیا قرالنک اقرباسندن پرنس لئوپولد دو هو هنروللر نه اسپانیا قرالغنی تکلیف ایشلر و مشار الیهک دخی بو تکلیفی قبول ایدلمدی

شیوعبولسی اوزرینه فرانسه حکومتی بو انتخابه هیچ بر وقت موافقت ایلیمه جکنی بیان ایلله اوزرته یه آتلشدر واقعا اسپانیا هیئت حکومتی تشکیل ایدن ذوات پروسیا و فرانسه آره سنده بر محاربه ظهورینه سبب اولماق ایچون مشارالیه پرنسک تخت حکومته اقعادنندن فارغ اولدقترینی رسماً بیان ایشلر سه ده همه حال بر سبب حرب احداثه چبالیان ناپولئون بو فرصتی غائب ایتمک ایستمدیکندن هو هنروللرن فاملیاسندن هیچ بر فردک فی مابعد اسپانیا حکومتی قبول ایلیمه جکی حقنده رسماً تأمینات ویرلمسی پروسیا حکومتندن طلب ایش و طبیعی بو طلبه رد ایله مقابله اولمسی اوزرینه پروسیا به اعلان حرب ایشلر فقط محاربه ناپولئونک ظنی و جهله موجب موقیت اوله میوب فرانسر اردولری آلمانیا قوای متحده سنه قارشو فنا حالده مغلوب اوله رق بالذات ایمپراطورده ید دشمنده اسیر قالمش و فرانسه ده تکرار اداره جمهوریه تشکیل ایدیلهرک نهایت ۱۸۷۱ سنه سنده عقد اولنان فرانقفورت معاهده سیله حرب ختام ویرلمشدر فرانقفورت معاهده سی حکمنجه فرانسه الساس ولورن و لایترینی ورسایلمده اعلان اولنان ، آلمانیا ایمپراطور اغنی حکومت جدیده سنه ترک ایلدکنبشقه بش ملیار فرانقدخی تضمینات حربیه ویره رک یقایی قورتاره بیلشدر . فرانسه نک مغلوبیتی نتایجندن اولمق اوزره ایکی خصوص دها حیر حصوله کلشدر که بونلرده رومانک ایتالیا به الحاقی و قره دکز بیطر فلغنک الغاسیدر مقدملری ایتالیا

دولتی پاپانک حکومت جسمانیه سنه تعرضده بولنمیه جنغی تعهد ایلدیکی حالده ناپولئونک مقام حکومتدن تیساعدی و محاربه سببیه فرانسر عسکرینک رومادن چقمسی ملاسه سیله فرصتدن استفادهیه قیام ایدرک رومانی ایتالیایه الحاق و پای تحت اتخاذ ایش و هر قدر پاپانک دائماً بر حکمدار عد ایدلمسی باقانون مخصوص موضع ایسه ده ینه بو وقعه پاپالغک عصر لوجه مدت دوام ایدن حکومت جسمانیه سنه نهایت ویرمشدیر دیگر طرفدن روسیه دخی قره دکزک بیطرفلغنی لغو اینک اوزره تشبثاتده بولنوب فرانسه ده حکومتک هنوزضعیف اولمسی وانکلترده رأس کارده بولنان و دولتینک منافع حقیقیه سنی ادرا که مقتدر اوله میان سربستی کاران قاینستوسیه المانیا حکومت جدیده سنک بو طلبه مساعد بولنمیری اوزرینه لوندیده عقد اولنان بر معاهده دولیده قره دکز حقیقده پارس معاهده سنه مربوط مقاوله مخصوصه احکامنک فی مابعد منقسخ بولندیغی بیان ایدلمشدیر لوندیده معاهده سی پارس قونغرهمی طرفندن موضوع موادک پیدرپی فسخنه بر مقدمه اولمشدر .

۱۸۵۵ دن ۱۸۷۰ تاریخنه قدر اوروپاده حکم و نفوذ سیاسی فرانسه وانکلترده بولندیغی حالده فرانسه نکل مغلوبیتی و حکومتک طبیعتی حسبیه امور سیاسییه ده پک بیوک تأثیری اوله میه جق اداره جمهوریه یه تحویلی اوزرینه بو حکم و نفوذ المانیا و انک دائره اتفاقنه داخل اولان روسیه و اوستریا

انتقال ایشدر بو انتقال کیفیتی ایسه مشهور اتفاق مثلثی حصوله کتیرمشدر که پارسده کی اتفاق مقدسک طبع ثانیه اولان بو ائتلاف بستون بشته بر طریق حرکت اتخاذ اینکلکه اوروپاچه تبدلات مهمه حصولنی موجب اولمشدر .

اتفاق مثلثک باعث اولدیغی محاربه اخیره ایله اوروپا احوالجه حصوله کتیردیکی انقلابی بیاندن مقدم روسیه محاربه اخیره سنه قدر اوروپا و قطعات سائرده ظهوره کلان بعض وقایع مهمه بی علی طریق الخلاصه ذکر ایدلم :

بو دورده انک زیاده جالب دقت اولان شیء امور داخلیه دوله مداخله فکرینک ینه رواج بولمسی اولوب بوکا سببده فرانسه ایمپراطورلق حکومتک هر ایشده قاریشهرق برنجی ناپولیون درونده کی سطوت عسکریه نکل اعاده سنه چالشیمی خصوصی اولمش و فقط بو مداخله لدرک صیقلغیده حکومت مذکورهنک بادی انقراضی اولان اسبابک برنجیسی بولنمشدر بو قبیلدن اولمق اوزره سوریه ده درزیر ایله مارونیت قومی اره سنده ظهور ایدن بعض قاریشقلق بهانه ابدیلهرک بیروته بر فرانسز قوه سفریه سی سوق ایدلمش و حالبوکه هر درلوشورشی رفعه حکومت سنییه نکل قدرت و اقتداری درکار بولنمغله قوه مزبورهنک بر کونه مداخله فعلیه ده بولنمسنه حاجت قالیهرق اعاده اسایش اولمشدر اولاح ایله بغداد اهالیسنک ایکی امارتی توحید بولنده وقوع بولان حرکتلری پارس معاهده سنه واضع

امضا حکومتك مداخله لرینی موجب اولوب امارتین برلشدر -
 یله رك مملکتین پرئسلکنه هوهنزولرن خاندانه منسوب پرئس
 شارل بالتعین او جهته ده اعطای سکونت ایدلشدر چین
 حکومتك تجارت اجنیه به غیر مساعد احوال و اطواری
 اوزرینه فرانسه وانگلتره طرفدن حکومت مذکوره علیه
 اعلان حرب ایدیلهرك منتهای شرق لیمانلرینك اوروپا تجاران
 وسفائنه کشادی تأمین قلمش و ژاپونیا حقنده دخی بو صورتله
 حرکت اولمشدر . آمریکا اورینه خارجك مداخله سنی موجب
 حرب بر تجاوز کبی عد ایدن موزوئه مسلکی و جنوبی آمریکا
 حکومتك دفعاتله سانتیاگو و لیماده قونغرهلر عقد ایدرک اتفاق
 و اتحادکارانه معاهدات عقد ایلرلی و والحاصل قطعه جدیده
 خلقنك کندیلرینی ازهرجهت اوروپادن تفریقہ صرف قدرت
 ایتلریله برابر آمریقا دخی بو مداخله دن رهایاب اوله میوب
 مکسیقا جمهوریتك اداره داخلیه سنده کی تشوشات فرانسه
 طرفدن مارشال بازن قومانده سنده جسیم بر اردو ارسالی
 و اوستریا ایمپراطورینك برادری پرئس ماقسملیه نك مکسیقایه
 ایمپراطور نامیله حکومتی مؤدی اولمشسه ده بر مدت صکره
 فرانسز اردوسنك عودتی اوزرینه یسه اختلالات داخلیه
 علوریز اشتعال اولهرق آرده حکومت جدیده سیله برابر
 بیچاره ماقسملیهنده محو اولمش و « برفکر ایچون محاربه ایدن »
 فرانسز ایمپراطورینك بو پو لتیقه سیده حکمسنز قالمشدر .

سانتیاغو و لیمادا قونغرهلرنده ابراز اولسان تمیبات و فاقکارانه
 و اتحاد ایدیلان مقررات مودت پرورانیه ایله برابر آمریقا قطعه
 سی دخی بلیه حربدن عاری قاله میوب اسپانیا و شیلی و پرو
 حکومتانی ارسنده کی مخصوصه ایله بر طرفدن آرژانتین اوروکی
 و برهزیلیا حکومتانی و دیگر طرفدن پارا که ی جمهوری بینلرنده کی
 محاربه مدیده جنوبی آمریقایی مدت طویل آتش جنک و جدال
 ایچنده بر ایشدر شمال ایسه ده باختیار اولیوب اسارت اصولنك
 محافظه و الغامی مناقشاتی تأثیر ایله جواهر متحده نك اقسام شمالیه و
 جنوبیه سی بیننده تحث ایدن اختلاف و بونك الغاسنه رضا کوستر میان
 جنوبلیرك ایلرجه بر هیئت متفقہ تشکیلنه قیام ایلرلی اوزرینه
 طرفین بیننده ظهوره کلان محاربه عظیمه ۱۸۶۰ دن ۱۸۶۵
 تاریخنه قدر دوام ایش و نهایت شمال جواهرینك صورت قطعی
 ده غلبه سی و اسارت اصولنك مؤیداً الغاسیله جواهر متحده
 اساسنك ترصین و تحکیمی ایله ختام بولمشدر .
 بو محاربه ده جنوب طرفی بر هیئت متحده یی تشکیل ایدن
 حکومتك استدکلی زمان او هیئتدن فك رابطه به حقلمی
 اولدیغنی ادعا ایلشدر و شمال لیرایسه بو حق تصدیق ایتماشدر
 فقط محاربه نك شمالک غلبه سیله ختامی کندیلرینه حق و یرمش
 و اساساً ده زیاد موافق نصفت و عدالت اولان فکر ثانی
 سلاح قونیه دخی تأید ایشدر شو حالده امثال واقعه یه نظراً
 اسویچره و یا آلمانیا حکومت متحده سنده بری ترك اتحاد تصورنده

بولنده ساثر رفقای اتحادك بو تصورك اجراسنه مخالفت ايلك
حقنه مال كيتلری خصوصنده ارتق شبهه قالماشدر .

بو اسرا محاربه سی زمانده حقوق دوله اهمیت کلیه بی
حائز ایکی وقعه مشهور اولمشدر که بری قواعد حقوقیه حریبه .
نک بر قانون مخصوص صورتنده بالندوین « آمریکا جـاهیر
متحده سی شمال اردولرینه تعلیمات » نامیله نشر اولمش و دیگر بده
آلاباما مسئله مشهوره سیدر . خصوص اول ذاتاً مدخل حقوق
بین الدول نام اثر مزده موضوع بحث ایلدیش اولدیغندن تکرار
تفصیلی مناسب کورلیوب سـاده الاباما مسئله سی حقنده بعض
تفصیلات اعطاسی تنسیب ایلدیشدر .

معلوم اولدیغی اوزره ایکی دولت بیننده محاربه ظهوری
تقدیرنده بیطرف دوله دخی بعض وظائف ترتب ایدوب وظائف
مذکورهنک الك باشلیجه لرندن بری طرفین محاربیندن هیچ برینه
اشیا و ادوات ولوازم حریبه فروخت ایلدیماسی و یا خود من القدیم
طرفین بیننده بویله بر معامله جاری ایسه بوکا حد معروفی تجاوز
ایتدیرلما سیدر حالبوکه بحث ایلدیگیز محاربه نک ظهورینی
متعاقب جنوبلیلر انکلتره دن الاباما نامنده بر واپور اشتر ایلدرك
قورصان کیسی طرزنده تجهیز ایلدیشلر و بونکله شمال سـفائن
تجاریه سنه پک چوق ضرر و خسار ایقاع ایلدیشدری ختام
محاربه ده آمریکا حکومتی سفینه مذکورهنک جنوب جـاهیرینه
فروختی حقوق بحریه دول قواعدینه مغایر بولندیغنی ادعا ایله

بو واسطه ایله کوریلان خسار دن انکلتره حکومتی مسئول
طوتاریق مطالبه تضمیناته مبادرت وانکلتره ده بو ادعا به مخالفت
ایلمکله طرفینک مناسباتی پک زیاده کسب وخامت ایدرك عادتا
اعلان مخصوصاته رمق قالدی ایسه ده نهایت فصل دعوی جنوده ده
متشکل و برهزیلیا ایمراطوری ایله اسویچره رئیس جمهورینی
محتوی بر حکم محکمه سنه حواله ایلدی و محکمه مذکور
انکلتره نک وظائف بیطرفینی اخلاص ایلش بولندیغنی بالتصدیق
تضمینات مطلوبه نک یعنی التي ملیون لیرا قدر بر مبلغک تسویه
واعطاسنه قرار و بر دیکه مسئله مذکورهنک بو صورتله فصلی
هم بو خصوصده کی قاعده حقوقیه بی تأید وهمده اختلافات
دولیه نک فصلی ایچون کوزل برامثال وضع ایتدیشدر .

او وقتدنبری بو مثاله اقتضا ایلدیمی پک چوق طرفلردن
توصیه اولندهرق حقوق دولک ترقی حکم و نفوذی ایچون پک
چوق جمعیتلر شکل ایلش و با خصوص تشبثات انسانیت کارانه نک
جمله سنده برنجیلک شرفنی حائز بولنان بلچیقادان شهرنده کی
حقوق دول جمعیتلری علم مذکورک توسع دائره نافذیتی ایچون
خدمات عظیمه ابراز ایلمکده بولمیشدر .

عصر مزک قسم اخیرى طرفنده حقوق بین الدوله دائر نشر
اولنان اثارک مقداری ازمنه ماضیه اثارینک جمله سنه فائق اولوب
مع مافیله غروچئوس و اتل و پوفند ورف کی برنجی درجه ده
ارباب حقوق دول یتشمامشدر . بونکله برابر مؤلفین معاصریندن

کسب شهرت انش پک چوق ارباب علم و کمال اولوب بونلردن
بعضیلرینک اسامیسی بروجہ آتی تعداد اولنور :

۱. نکلتزه مجلس عالی بحریسی و دیوان خصوصی حکمداریسی
اعضاسندن سیر و برت فیلیمورک «تشریحات حقوق بین الدول» نام
تألیفی بو علمک بالجمله اقسام و مباحثی شامل بر اثر معتبر اولوب بحق
کسب شهرت انش و دولت مذکورہ مشاوری سیر ترہ پورس
تویسک «اجتماعات سیاسیہ مستقلہ بولنلری حیثیتیلہ حقوق ملل»
نام کتابی دخی بر چوق معلومات مفیدہ بی محتوی بولنمشدر . فرانسه
معلیندن موسیو پرادیہ فودرہ نیک «دیپلوماسی حقوقی زبدہ سی»
اسمندہ کی تألیفیدہ مصنفات مقبولہ دندر .

حقوق بین الدولک هنوز بر شکل ثابت و معینہ کیر مامش
اولسی بر طاقم مؤلفینک جالب نظر دقتلری اولہرق بونلرفن
مذکورہ بر قانون دولی طرزندہ تحریر ایلمکہ تشبث ایتمشلردر
بویولده اک زیادہ اکتساب شهرت ایدنلر آلمانیا مشاہیر ارباب
حقوقندن و ہایدلبرغ دالغنوننی معللرندن اولوب حقوق بین
الدول قانونی نام اترک مؤلفی بولنلان بلونچلی ایلہ شمالی آمریکا
جاہیر متحدہ سی مجلس اعیانی اعضاسندن اولوب «برقانون
بین الدول تصورنی» نام کتابی تألیف ایدن داوید دولہی
فیلددر . حقوق بین الدول قانونندہ هنوز عموماً کسب مجبوریت
انلماش بر طاقم قواعد مندرج اولوب مؤلف بونلرک اسباب
لزومنی مواد قانونیہ خارجندہ ملاحظات و تشریحات مخصوصہ

ایلہ ایضاح انلشدر اثر مذکور همان ہرلسانہ ترجمہ ایدلمش
و حتی بوندن مقدم لسان عثمانی بہ دخی ترجمہ و جزو جزو طبع
ونشرینہ مبادرت قلنمشسدہ ہرنہ سببہ مبنی ایسہ اکمال نشری
قابل اولمامشدر . موسیو دولہی فیلدک اثری ایسہ عادتاً بسبتون
طرز قانونندہ تحریر و دونندہ ایکی مملکت اجنبدہ اہالیسی
بینندہ کی مناسبات خصوصیدہ قدر ہرشی درج و تدبیر ایدلمشدر
حقوق دولک طرز قانونندہ تدوینی طرفدارانک کیوکارندن بری
دخی ایتالیا خارجیہ ناظر سابق و حقوق دول جمعیتی اعضاسندن موسیو
مانچینی اولوب مشارالیدہ علم مذکورک اصل و تفرعاتنہ دائر پک
چوق مصنفات معتبرہ صاحبیدر موسیو مانچینی حقوق بین الدولک
اساسی قومیت و ملیت وحدتی اوزرینہ تأسیس ایدلمسی طرفداریدر
حالبوکہ اشخاص حقوق بین الدول نامیلہ در دست نشر بولنلان
اثر عاجزانہ مزک بحث مخصوصندہ ایضاح ایدیلہ جکی اوزرہ
وحدت ملیہ ہیچ بر زمان حقوق بین الدولہ اساس منفرد اتخاذ
اولنہ میدہ جفنندن مشارالیہک بو فکرندہ ایتالیانک اوقات اخیرہ دہ
بولندینگی احوال مخصوصہ دن متولد بر طاقم حسیات و طنپورور .
انہنک دخل کلیسی بولندینغنی ظن ایدرز ہر حالدہ موسیو مانچینی .
نک مؤلفات حقوقیہ سندنہ کوسہ تردیکی تمایلات حقوقیہ وری
شایان مدح و ستایش اولوب سادہ اجراءات سیاسیہ سندنہ فعلی
قولنہ اویمامش بولنمش سزاوار تأسفدر . ملیتک حقوق دولہ

اساس اتحادی خصوصاً برچوق ایتالیائی مؤلفزده موسیو مانچینی نك مسلكنى التزام ایلشردر .

حقوق بین الدولك بالجمله مباحثنى مشتمل اولان اثار دن ایتمه لیبی فیورهنك «مدنیت جدیده احتیاجاته تطبیقاً حقوق عمومیة جدیده دول» نام اثری ایله آمریقائی مشاهیر علمادن شارل قالوونك «نظری و عملی حقوق بین الدول» اسمنده کی تالیف جسمی علم مذکورہ دائر یازیلان کتب جامعہ نك الك کوزلارندندر .

حقوق خصوصیه دوله دائر اولمق اوزره برچوق مؤلفات جدیده موجود اولوب بونلردن الك معروفلری انکلتره قوانین خصوصیه سیله دول سائرہ قوانیننى مقایسه ایدن وانکلیز بچون و وهست له بئك اثر قلمی اولان تلخیص حقوق خصوصیه دول ویا اختلاف قوانین نام کتباب ایله آمریقائی و وار تونك تلخیص اختلاف قوانین اسمنده کی کتابی و فیورهنك حقوق خصوصیه دول نام تالیفیدر تالیف مذکور مؤلفك حقوق دول کتابك جلد ثالثی تشکیل ایلوب مؤخرأ نشر اولمشدر .

دوقتور کسزك ۱۸۶۵ ده نشر ایلدیکی « بیطرفك بحراً وظائفی » فرانسه اقامه سی اعضاسندن موسیو اوژن قوشینك «حقوق بحریه دولك منابعی و مدنیت ایله روابطی» بحریه ضابطانندن اورتولانك «قواعد دولیه و سیاست بحریه» نام اثرلری حقوق بحریه یه دائر اثارك مشهورلرندندر . موسیو قلق

وواللانك قونسالوسخانهلر ایله دیپلوماسی قواعدینه متعلق کتابلری مؤلفات معروفه دندر .

حقوق بین الدولك بالجمله تفرعاتی حقنده نشر و تحریر اولنان کتب و رسائلك و رسائیل موقوته و جرائد ایله معاهدات مجموعهلری و سائر مصنفاتك تنوع و کثرت مقدارلری مناسبته بونلری برز برز تفصیل و بیان، معلومات عاجزانه مزك عدم کفایتنه نظرأ، نه قابل و نه ده بوندن بر فائده حاصل اولمیه جغندن علم مذکورك زمانزده درجه تدقیق و تعمیق حقنده بر فکر اجمالی و یرمك اوزره بو قدر جق بر خلاصه ایله اکتفا قلمشدر .



براین معاهده سی واکا متفرع مقاولات دولیه

مباحث متقدمه ده کورلیدیکی اوزره «۱۸۵۴» تاریخ میلادیسنده فرانسه انکلتره و ساردنیا حکوماتی دولت عثمانیه ایله اتفاق ایدرک روسیه نك امور شرقیه جه مداخلتته قارشو طور مشلر و متفقینك غلبه لری اوزرینه پارسده عقد اولنان معاهده ایله دولت مذکورهنك مدعیات واقعیه سی کلیاً بر طرف ایلمشدی پارس معاهده سی روسیه نك شرقیه نقوذینی تصغیر و انحایچون شرقك احوالی بشقه بر صورتیه ربط ایدیوردی شوپله که بحر سیاهك بیطرفلغنی اعلان ایله روسیه نك ممالک جنوبیه سی دکزنده

دو نایب مالک اولسنی محال قیلدیغی کی روم ایلی ایالات ممتازهنی اوروپانک جایه مشترکهنی تختهنه وضع ایدرک روسرک او جهتهله دخی مداخله لرینه سد چکمش و دولت مزبورهنک انک قدیم مدعیانندن بولنان خرسستیانلرک جایه سی خصوصی ایسه مساوات مذهبیه بی معلن و متضمن اولهرق اصدار اولنان خط شریفنک پارس قونغرهنه تبلیغ رسمیسی ایله حکمسنز قالمشدر . بسار ایلیا نك روسیه دن آلنهرق بغدادنه الحاقنه کلنجه بوده روسیه نك مغلوبیتنی بر دلیل علمنی ایله اقوام عیسویه شرقیه اراهه ایلکنده و بوندن بشقه اختلاف منافع تولیدیله مملکتینی روس پولتقه سنندن بر درجه یه قدر آیرمقده ایدی .

فقط پارس معاهده سننک مسیبلری اساساً فرانسه وانکاتره دولترینی اولمغه بقاسی دول مزبورهنک دوام قدرتلرینه متوقف ایدی . حالبوکه ایتالیا نك تأسسی ، صاد و وامحاربه سننده و حتی دهه اول سولغرینوده اوستریانک مغلوبیتی ، اوروپانک وسطنده موقع طبیعیسی ایجابنجه روسیه یه خلوص مجبوریتنده بولنان آلمانیایمپراطورلغنک تشکیلی اوزرینه وباخصوص فرانسه نك انهزام کلیسی ایله اوروپانک مرکز قدرت وشوکتی فرانسه وانکاتره دن روسیه و آلمانیایه یکندی اوستریا ایسه دوچار اولدیغی صدمات مهمه سیاسیهدنصکره حالادوات معظمه صفتنی محافظه ایده بیلنک انجی خصم غازی اولان پروسیایله خوش یکنمک صورتیله

قابل اوله جغنی کوردرک دول شمالیه نك ائتلاف افکارینه داخل اولمغه مشهور اتفاق مثلث وجوده کلدی .

اتفاق مثلثک شرق پولتقه سی روسیه نك پارس معاهده سنندن اولکی موقعنی قزانمسی خصوصنه مساعد اولوب اوستریا هر نقدر دولت مذکوره ایله رقیب سیاسی ایسه ده ناچار بوکا معترض بولنمقده و بالکنز حین اقتضاده کندی منافعی تأمینه چجالا مقده ایدی . ذاتاً فرانسه نك مغلوبیتی اوزرینه روسلر بحر سیاهک بیطر فلغنی لغوایتدیرهرک بویولده ایلک قدمه بی یکمشلو اولاهر سک و بوسنده ظهور ایله ادرنه ولایتنک وصوفیه نك بعض جهاتی بلغارلرینه دخی سرایت ایدن عصیانک وقوعی و صرب و قره طاغ امارتلرینکنده رفع لوای عصیانه مسارعتلری اتمام مقصده بر بهانه مناسبه اولمغه اوستریا هر سکلیلری و روسیه ده بلغارلری التزامه باشلامشرا ایدی . عاصی امارتلرک انهزام کلییه اوغراملری اوزرینه اوروپا دولترینک توسطلریله حال سابقک وقایه ومحافظه سی اساسلرینه توفیقاً انلرایله اعاده آسایش ایدلدیکی کی هر سک و بلغار اختلال لریده لایقیله تأدیب ایدلکنکه بو مسئله نکنده قیادلسی لازم کایرسه ده روسیه و هم فکترلرینک تشویقلریله و احتمال بر درجه یه قدرده خرسستیانلق غیرتنک تأثیریه اوروپا دولترینی عصیان ایدن بلغارلره بعض امتیازات و یریلهرک طونه ادرنه سلانیک قوصوه ومناستر ولایتلرینک قسم اعظمندن متشکل اوله جق بلغارستانک بر ولایت ممتازه حانه قونلینی وبعض مواد ساثره غیرمصیبه بی در سعادتده

مجمع قوانین آنسده تحت قراره آلدیلر فقط دولت علیه تکلیف واقعی
بالتبع رد ایلدیکی کبی لوند رده دولسته مرخصلری طرفندن
قله آنسان پروتوقول دخی قبول ایلدیکندن مسئله بیویه رک
بالآخره حکومت سنیه ایله روسیه بیننده اعلان حربی مؤدی
اولدی .

بومحاربه یه مملکتین و صرب امارتلی دخی اشتراک ایلدکارندن
محکمه تعالی وقوع مغلوبیتز اوزرینه روسیه دولتیله ۳ مارت
۱۸۷۸ ده ایستفانوس معاهدهء ابتدائیه سی عقد ایدیله رک حربه
ختام ویرلدیسه ده دولت علیه بی اوزمانه قدر یالکز بر اقله
ایدیلان خطا بر درجه یه قدر اوروپا طرفندن حس اولمغه باشلا .
ندیغندن ایستفانوس عهدینک بعض احکامنی تعدیل ضمننده دول
معظمه مرخصلرندن مرکب اوله رق بر اینده بر قونغره اجتماع ایلدیکی
کبی حکومت سنیه ده بعض خصوصاتی تأمیناً انکاتره ایله ۴ حزیران
۱۸۷۸ ده قبریس مقاوله سی دینلان معاهدهء اتفاییه بی عقد ایلشدر
قونغره طرفندن ۱۳ تموز ۱۸۷۸ ده برلین معاهده سی عقد ایدیله رک
مسائل معلقه نك قسم اعظمی تسویه اولندیغی کبی سائر خصوصات
مشکله دخی پیدرپی طریق حل و فصله کیرمش و روسیه دولتی ایله
حکومت سنیه دخی حربک احداث ایلدیکی حال تشوشه نهایت
ویرمک اوزره ۸ شباط ۱۸۷۹ ده بر معاهدهء خصوصیه عقد
وامضایلدیلر ایله صلح و آسایش صورت قطعیه ده تقرر ایلشدر .

معاهدات مشروحه زمانز احوال سیاسیة شرقیه سنک

اس الاسامی حکمنده بولندقلرندن بروجه آتی احکام مندرجه .
لرینک خلاصه ذکر و بیانی مناسب کورلمش و برلین معاهده سنک
ایلروده فصل اولتمق اوزره بر اقدیغی مسأله دائر مؤخرأ عقد
اولنان مقاولات احکامی ایسه متن عهدنامه دن عائد اولدقلری
ماده لر صره سنده بیان ایلمسی امر طبیعی بولمشدر .

ایستفانوس عهدنامه سی احکامی

(۱) قره طاغ امارتنه اشقودره و هرسک ولایاتندن اراضی
کافیہ ترکیبه حدود منازعاتنه ختام ویرلمسی و حدود جدیدنک
بر اوروپا قومیسسیوننی طرفندن تحدیدی . مذکور قومیسسیونک
بویانه اوزرنده سیر سفائن مسئله سنده قرار ویرمسی . باب عالی
طرفندن قره طاغک استقلالی تصدیق اولنسی . قره طاغ امارتنک
ممالک عثمانیه ده ایجاب ایدن برلره آجنته لر تعییننه حتی اولمسی .
اعادهء مجرمین و برده ممالک عثمانیه ده سیاحت و اقامت ایدن
قره طاغلیلرک کندی حق لنده موضوع قو اعد قدیمه ایله قو اینن دولت
علیه و حقوق بین الدول قو اعد عمومیه سنه تابعیتلری خصوصاتنک
بر مقاوله یه ربطی روسیه و دولت علیه و قره طاغ بیننده
مذاکره اولنسی . حدود اوزرنده مناسبات اهالی و انشآت
عسکریه ایچون دولت علیه و قره طاغ بیننده بر مقاوله مخصوصه
عقدی . یکیدن مطالب ملکیه مستثنا اوله رق قره طاغ ایله
دولت عثمانیه آره سنده وقوعه جق هر درلو اختلافاتک

تسویه سی اوستریا بجزارتان و روسیه دولتینہ حوالہ
ایدیلوب دولتین مشارالہمک حکم صفتیہ اختلاف واقعی فصل
ایلمری .

(برلین معاهده سی قرہ طاغہ ویریلہ جاک اراضینک مقدارینی
براز دها تقلیل ایلدیکی کبی یالکز روسیه و اوستریاہ عائد
جهتلی دخی اوروپایہ دور ایش و معافیہ قرہ طاغ امارتجہ
اوستریاہ برچوق حقوق ویرمشدر .)

(۲) صربستانک استقلالیت تصدیق اولنہ رق ممالک عثمانیہ دن
کوچک ازورنیق ایله نیش سنجاغی و سائر بعض محالک ترکی .
حدودک بر روس قومیسری معاونتیلہ بر صرب و عثمانلی
قومیسریونی طرفندن تحدیدی و درین اطہاری مسئلہ سنک بو
قومیسریون طرفندن قطعاً فصلی . صرب و بلغار حدودینک
تعیینی صرہ سنہ قومیسریونہ برده بلغار مرخصی بولنسی .
صربستانہ ترک اولنان اراضیدہ اهل اسلامک حقوق تصرفیہ
لرندن هر صورتلہ استفادہ یہ حقیری اولسی . دولت علیہ و صرب
مرخصلرندن مرکب و بر روس قومیسرینی محتوی قومیسریون
مخصوصک ایکی سنہ دہ اهل اسلام املاکنہ دائر خصوصاتی و
تشکلندن اوج سنہ یہ قدرده املاک میریہ و وقفیہ یہ متعلق
موادی فصل ایلمسی . ممالک عثمانیہ دہ سیاحت و اقامت ایندن
صرب تبعہ سنہ مقاولہ مخصوصہ عقدینہ دکین حقوق بین -
الدول قواعد کلیہ سی موجبجہ معاملہ اولنسی .

(برلین عهدنامہ سیلہ صربستانہ ویریلان یرلر براز دها
تقلیل ایلمش و روس قومیسرلرینہ لزوم کوسترلماشدر .)

(۳) رومانیا نیک استقلالیت جانب دولت علیہ دن تصدیق
اولنسی و رومانیا نیک تضمینات حربیہ یہ حتی اولغلہ بو خصوصک
بین الدولتین اینرودہ مذاکرہ سی . رومانیا تبعہ سنندن ممالک
عثمانیہ دہ بولنانلرک سائر دولتلر تبعہ سنہ تأمین ایدیلان بالجملہ
امتیازاتدن مستفید اولماری .

(ایستفانوس معاهده سی رومانیا یہ تضمینات طلبنہ حق
و تبعہ سنہ امتیازات ویرہرک دولت مذکورہ بی صربستان
و قرہ طاغدن آیرمش و نائل استقلال اولمش بر امارت عاصیہ کبی
دکل بر دولت محاربه کبی عد ایلمشدر بو فرق برلین معاهده سنندہ
دخی موجوددر)

(۴) حدودی قدیم طونه و ادرنہ و لایترینک قسم اعظمینی
و کسندیرہ قضاسی ایله مرکز و لایتدن بشقہ سلانیک و لایتنی
و قوصوه و مناستری محتوی اولہ جق صورتدہ تعیین ایدیلان
بلغارستانک حکومت سنیه یہ تابع و خراجگذار و اداره داخلیه جہ
مستقل بر امارت حالنہ افراغی . امارتک اندارسی خرسیان اولہ رق
پرنسک اہالی طرفندن سر بستجہ انتخاب و دول معظمہ نیک انضمام
رضالریلہ باب عالی جانبدندن بافرمان عالی نصب و تعیین ایلمسی .
اوروپا دول معظمہ سی تخت نشین سلالہ حکمدار یلری افرادندن
هیچ برینک پرنس انتخاب اولنہ مامسی . قلبہ و یا طرنویدہ اجتماع

ایده جاک بر بلغار مجلس عمومی سناک بر روس قومیسرینک تخت تفتیشنده اوله رقی و بر عثمانلی قومیسری دخی حاضر بولندیغی حالده بلغارستان قانون اساسی سنی تخت قراره آلمسی و بوقانونک ۱۸۳۰ تاریخنده اولاح و بغدادان ایچون تعیین ایدیلان اساسله موافق اولسی . انتخابات و قانونک تنظیمی اثنالزنده بلغارلرک ترک روم و اولاحلیله قاریشق اولدق قریرلر ده اهالی مذکوردهک منافعی دخی نظر اعتنایه آلمسی . یکی اصول ادارهک بلغارستانده تأسیسنه ایکی سنه مدته پر روس قومیسرینک نظارت آلمسی و برسنه مرورنده لزوم کوریلورسه بوکا دول معظمه طرفندن مرخصلرده ترفیق آیدلمسی . بلغارستانده بعد ما عساگر عثمانیه بولنامسی و قلاعک مصارفی حکومت محلیه جه تسویه آیدلمک اوزره هدمیله موجود ادوات حربیه عثمانیهک دولت علیه به اعاده سی . ایلووده مقداری بین الدولتین قرارلشدیر یله جق اولان بلغار اردوسنک تشکیله قدر محافظه مملکتک معین المقدار روسیه عسکرینه احاله سیله مصارف اشغالیهک بلغارستان طرفندن تأدیسه سی . (اشبو مصارفدن طولای بلغارستانک روسیه به اولان بورجی تسویه ایچون اخیراً دولت مذکورده ایله امارت بیننده بر مقاوله مخصوصه عقد اولمشدر) بلغارستانده اداره جدیدهک اجراسنه ابتدار اولمشندن اعتباراً برسنه ظرفنده امارت طرفندن حکومت سنییه ویریه جک سنوی ویرکونک مقداری روسیه و دولت علیه ایله سائر دول

معظمه بینلرنده بالواقه قرارلشدیرلمسی . روسجق وارنه شمندوفر خطندن طولای دولت علیهک تعهداتی بلغارستانه انتقال آلمسی . حکومت سنییهک مرکز سلطنت ایله ولایات بعیده آراسنده تأمین موارداتی ایچون امارت داخلندن عساگر منتظمه به مخصوص طریق عسکریمی و پوسته و تلغراف خطوطی اوله رقی بوکا دائر مخصوصاتک مؤخرأ دولتین آرهنده مذاکره سی . بلغارستانده بولنان اهل اسلامدن هجرت آیده جکرک حقوق تصرفیه لری تأمین اولنه رقی املاک و ققیه و میریه و سائره حقنده صربستانده اولدیغی کبی قومیسرون مخصوص تشکیلی . طونه قلاعک هدمیله بعد ما نهر مذکور اوزرنده استحکام انشا آیدلماسی و سفائن خفیفه لازمه دن بشقه سفن حربیه بولنامسی و طونه قومیسرونی امتیازاتک ایقاسی . طونه ده سیرسفانک اعاده سی لوازمک ایقاسی و بونک انقطاعندن طولای متضرر اولانلره تضمینات اعطاسی طرف باب عالیدن تعهد آیدیلهرک بونلر ایچون ۵۰۰۰۰۰ فرانق بر مبلغ تخصیصی .

(برلین معاهده سی بلغارستان امارتنک حدودنجه تعدیلات کلیه اجزا آیدرک ساده طونه ولایتک رومانیا به ترک اولنان بسار اییا قطعه سنندن بشقه اقسامی بر اقسش و بوضورتله وسعت جه تقریباً ثلثی درجه سنه آیدر مشدر احکام سائرجه اولان تحولات جزئییه برلین معاهده سی بحثنده کوریه جکدر) .

(۴) درسمعات قونفرانسی مقرراتی اوزره روسیه و

اوستریا ایله متفقاً اجرا ایذیله جاك تعديلاته توفیقاً بوسنه وهرسك ولایتلرنده اصلاحات اجرایی و بقایانك عفوئله ملتجیلره طرف دولتمدن تضمینات ویرلسی .

(معلوم اولدیغی اوزره برلین معاهدهسی بوسنه وهرسك اداره سنی اوستریایه ترك ایشدر)

(۵) آمال مشروعیه اهالی نظر دفته آنه رق کریدك نظامنامه اساسیسی توسیع و تماماً اجرا ایده جکی باب عالی طرفندن تعهد اولمسی . بوعهد ایله کندیلیری ایچون صور اداره مخصوصه تعیین ایلمامش اولان اپروتسالییا قطعله ری وسائر روم ایلی ولایاتنده بوکا مماثل نظامات احدائی . بونظاماتك تنظیمده ولایات مذکوره اهالیسی وکیلارندن مرکب مجلسلك دخی رأبی آنوب بونلرك اجراسندن اول روسیه ایله دخی استشاره اولمسی .

(برلین معاهدهسی نتایجندن اوله رق تسالییا قطعله سی واپیرك بر قسمی یونانه ترك اولندیغی کبی اجرای اصلاحات خصوصیده ساده روسیه نك دكل بالمله دون معظمه نك تحت نظارتلرینه مودو عدر) .

(۶) ارمنیلرك ساکن اولدیغی ولایاتده اجرای اصلاحات خصوصی طرف دولتمدن تعهد اولندیغی .

(۷) محاربه یه اشترا کد نطولاینی مجرم اولان تبعه عثمانیه حقهنده عفو عمومی اعلانی .

(۸) قدورک ایرانه ترکی حقهنده کی قرار قدیمك اجرایی (۹) دولت علیه طرفندن روسیه یه تضمینات حربیه اوله رق بر منیار در تیوز اون ملیون روبله اعطاسیله بونك بر ملیار یوز ملیونی مقابلنده روم ایلمنده دوبریجه قطعه سنك وانا طولیده قارص اردهاں بازید و باطوم سنجاقلرینك روسیه یه ترکی و روسیه نك دوبریجه قطعه سنی رومانیانك تحت اداره سنده اولان بسا رابیا ایله تبدیل اینك حقنی محافظه ایده جکی . تضمیناتدن اون ملیسون روبله سی محاربه دن ضرر دیده اولان روس تجاراننه نائد اولمغله بونلرك مطالباتی ظاهره کلدکجه تسویه سی و باقی اوچیوز ملیون روبله نك تأدییه سی ایچون دخی ایلروده دولتین یلننده بر قرار ویرلسی .

(برلین معاهده سنده تضمینات خصوصی عینیه قالب ساده بازیدك تکرار دولتمزه اعاده سنه قرار ویرلمشدر) .

(۱۰) روس تبعه سنك حقوق شخصیه لرینه دائر مختلف فیه اولان خصوصاتك سریعاً تسویه سی باب عالی طرفندن تعهد اولمسی .

(۱۱) روسیه ده قلان اراضی اهالیسی اویج سنه یه قدر یرلرنده اقامت و یا ممالک عثمانیه یه مهاجر تنده مختار اولوب اندنصکره روس تبعه سی اوله رق قالا جقلمی کبی موجود املاک میریه وسائره دخی بومدت ظرفنده فروخت ایذیله جکی .

(۱۲) ممالک عثمانیه ده سیاحت و یا اقامت ایدن روس ره بان

وجاجنک ملل سائرہنگ مظهر اولدقلمری امتیازاتدن مستفید اوله جقلمری و بونلرک کرک شخص و کرک ملکلمری حقندہ روسیہ سفارت و قونسلوس خانہ لرینک جایه رسمیہ یہ حقلمری اولدیغی . ایناروزده کی روس رهبانک امتیازات قدیمه لرینی کماکان محافظه ایده جکلمری .

(۱۳) بو معاهده ایله مصر حائلغو ایدنیان بالجمله معاهدات سابقهنگ کماکان جاری و معتبر اوله جغی .

(۱۴) کرک حال صلح و کرک حال حربده چنناق قلعه و بحر سیاه بوغازلرینک روسیہ لیمانلرینه کیدن و یا اورادن چیقان بیطرف سفائن تجاریه سنه آچیق اوله جغی و بعدما باب عالی نک بحر سیاه و آزاق دکزی روس لیمانلری علیهنه پارس معاهده سنه مغایر صورتده غیر مؤثر محاصره بحریه اعلان ایلده جکی .

(۱۵) روم ایلینک روس عسکری طرفندن اوچ ایده و اناطولینک آلتی ایده تخلیه ایدیلده جکی و بواشاده اداره مملکت روسلر بندنه قالا جغی . بریرک تخلیه سی روس قوماندانی طرفندن رسماً بیلدیلمدیکه اورایه عساکر عثمانیهنگ دخولیه اداره عثمانیهنگ حکمه باشلاماسی .

(۱۶) روس عسکریله برلکده کیتک ایستیان اهاالینک هجرتلرینه مساعدہ اولنمسی .

(۱۷) صلح قطعینک انعقادینی متعاقب روسیه ده بولنان اسرای حربیهنگ اعاده سنه باشلانمسی و ایدیلان حساب اوزره

بونلرک اون سکرز ترتیب اوزره و آلتی سننده تمام اعاده لری . هر ترتیب اسرا تسلیم اولندیکه مصارف اعاشه و سائر دلرینک حکومت سنیه طرفندن تماماً تأدییه سی . رومانی و صربستان و قره طاغ ایله دخی اسرانک تعاطیسی بو صورتله ایفا اولنوب ساده مصارف تضمینیهنگ حسابنده عساکر عثمانیه انه کچن اولاح صرب و قره طاغ اسراسی مصارفنگ عینی حساب اوزره تنزیلی .

ایشته ایستفانوس معاهده سنک احکام اساسیه سی خلاصه مجبوتهدن عبارتدر بو معاهده یی تمیز ایدن خصوص بالخاصه بلغارستان امارت جدیده سنک وسعت فوق العاده سی اولوب آلتی ملیونه قریب نفوسی حاوی اوله جغی حساب اولنان امارت مذکوریه یی بر این معاهده سی بر حد معقوله ایصال ایلمش و روم ایلیده کی ممالک شاهانه یی ایکی قسم بی رابطه یه تقریقندن قورتارمشدر .

ایاستفانوس معاهده سنک سائر بر چوق احکامی بر این قونغرهنده سننده تعدیلات کلیه و جزئییه یه اوغرامش اولدیغندن کلیاً منقسخ عد ایدیلده رک تعدیل اولنمیان احکامی دخی مؤخرأ منعند معاهده خصوصیه ایله قطعياً فصل ایدلمشدر که شو حالده محاربه اخیره دن متولد حال صلحی یی بر این معاهده سیله بو خصوصی عهدنامه ده ارامق ایجاب مصلحتدر .

قبریس مقالله سی

معلوم اولدیغی اوزره اشبو مقالله انا طولیده کائن ممالک شاهانه نك تمامیتنی تأمیناً انکلتره ایله حکومت سنییه بیننده بر اتفاق تدافعی عقدی مقصدینه مبنی عقد اولمشدر و ایکی ماده دن عبارت اولوب برنجی ماده سنده « باطوم قارص اردهان و یاخود مواقع مذکوره نك بری روسیه طرفندن ضبط اولنوبده مستقبلده سلطنت سنیدنک آسیاده بولنوب معاهده قطعیه صلحیه ایله تعیین اولنجه جق ممالکنک دیگر بر قسنک دخی ضبطنه قیام اولدیغی حالده انکلتره دولتی ممالک مجوئیهی سلاح قوتیه محافظه و مدافعه ایتک اوزره سلطنت سنیه ایله بر لشمکی تعهد » ایلدیکی و « بونک مقابلنده ذات حضرت ملوکانه دخی ایلروده دولتین بیننده قرارلشه جنغی و جهله دولت علیه نك ممالک مذکوره ده بولنان تبعه عیسویه و سایر سنک حایه و حسن اداره لری ضمننده اصلاحات لازمه بی اجرا ایده جکینی انکلتره دولتیه وعد » ایتکاری و « اشبو تعهدنک اجرایی ایچون وسائط لازمه بی تأمین ایتک اوزره ذات حضرت پادشاهی دولت مشار الیه نك قبریس جزیره سنه عسکر ادخال و جزیره مذکوره بی اداره ایتسنه موافقت » ایلدیکی مندر جدر ماده ثانیه مقالله نك بر آی طرفنده تصدیق و تعاطیسنه دائردر .

ایشته قبریس مقالله سی مو جیبنجه اساس اتفاق روسیه نك

انا طولیجه تجاوزاتنه سد چکمک اولوب قارص اردهان و باطوم روسلرده قالدقجه مقالله نك حکمی جاری قاله جنغی و ممالک مذکوره دولتمزه اعاده ایدیلنججه حکم مقالله منفسخ اوله جغندن انکلترلرک دخی قبریسن چتملری ایجاب ایده جکی امر بدیهیدر . بونک مقابلنده لفظ لریله باشلایان اصلاحات ماده سنه کنججه بونخصموص بعض انکلیر غزته جیلرینک ا کلاتیق ایستدکاری و جهله اساس اتفاق ایله لازم ملزوم قیلندن دکلدر .

مؤخرآ بو مقالله یه بر ذیل عقد ایدیلره نك بونده قبریسک انکلیرلر طرفندن صورت اداره سی تعیین و شرائط آتیه یه ربط ایدلمشدر .

(۱) اطهده بر محکمه شرعیه بولنهرق اهل اسلامک دعاوی مذهبیه سنی رؤیت انلیسی .

(۲) اوقاف همایوندن جزیره ده بر مأمور بولنسی و بونک انکلیر اداره سیله بالاتفاق اوراده کی مدارس و اوقاف و مقابر اسلامیه امورینه باقسی .

(۳) انکلتره نك جزیره وار داتندن مصارفی بعد التزییل شمیدیکی فضله و ارداتی حکومت سنیه یه ترک انلیسی و بونک مرور ایدن بش سنه نك فضله و ارداتی حساب متوسطی اوزره تعیینی و او مدتده املاک میریه فروختندن اولان حاصلاتک حسابدن استثناسی .

(۴) باب عالی نك جزیره ده کی املاک میریه و همایونی سر بستجه

اداره و فروخته حتی اولوب بونلرک حاصلاتی ماده ثالثه ده
 محرر و اردات جزیره میانہ ادخال اولنماسی .
 (۵) انکاتره دولتی جزیره ده مأمورلری واسطه سیله اراضی
 و املاک مباحه ایدہ بیلہ جکی وقائده عمومیه بیه خدمت ایدہ جک
 یرلری فیئات مناسبہ ایله اشترا ایلیہ جکی .
 (۶) روسیہ قارصی و یا ارمنستانده آلدیغی یرلری اعاده
 ایلدیکی صورتده انکاتره دخی قبریسی تخلیه ایدرک مقاوله
 سابقه نک حکمی قائمہ جغی .

برلین معاهده سی

برلین معاهده سی احکامی غایت متنوع و مختلف بولندیغندن
 پر وجه آتی خلاصه و تصنیفی مناسب کورلشددر .

(۱) سلطنت سیاسیة دولت عثمانیه :

برلین معاهده سی مصرحاً لغو ایتدیکی معاهدات سابقه
 احکامی ابقا ایلدیکنندن دولتلمزک اوروپا هیئت سیاسیہ سنه
 دخولنه دائر پارس معاهده سی حکمی باقیدر . بوغازلرک سفن
 حربیه اجنبیه یه قیالی اولسنه دائر لوندره مقاوله سی دخی بر دوام
 اولوب هر نقدر قونغرده انکاتره مرخص ثانیه سی لورد
 سالسبوری بونک هر دولت جانبندن ذات حضرت پادشاهی یه
 قارشو بر تعهددن عبارت اولدیغنی سولتستسه ده بو صورت
 تفسیر جائز و صحیح اولیوب بوغازلرک حال مجوٹ عنہی اوروپا

حقوق عمومیہ سی قراعدندن بولندیغنه و بناء علیه متعاہد دولتلمزک
 بربرلینه قارشو دخی متعہد و مسئول اولدققرینه دائر قونت
 شوالوفک بیانی هم ده صحیح و سالم و همده منافع عثمانیه یه
 موافقدر .

برلین معاهده سنک بعض ماده لری طرز افاده سی و طبیعت
 مصلحت قایتولاسیونلر و معاهدات تجاریه و سائرہ نک کماکان
 دوام جریاننی معین بولنمقده در . التمش ایکنجی ماده ده ممالک
 عثمانیه ده اقامت و سیاحت ایدن اجنبی رهباننک مظهر حایہ
 اوله جقلمری و سفارت و قونسلو سخانہ لرک حق حایہ رسمیه سی
 مصدق اولوب فرانسه نک محال مقدسه جہ حقوق مکتسبه سنه
 و آیناروز مناسترلرینک امتیازاتنه خلل کتیرلمیه جکی مندر جدر .
 تضمینات حربیه و ممالک عثمانیه نک روسلر طرفندن تخلیه سنه
 دائر ایستفانوس عهدی احکامی ابقا اولنوب یالکز متباقی
 تضمینات حربیه یه مقابل روسیه دولتینک یکیدن اراضی
 الحاقنه تشبث ایلیہ جکی و هر حالده بوملابسه ایله اوروپالی
 دایلمزک حقوقنه خلل کتیرمیه جکی پرنس غورچاقوف طرفندن
 بیان و تعہد اولنمشدر .

(۲) سلطنت داخلیه .

التمش ایکنجی ماده ده ذات حضرت شہریاری ممالک عثمانیه
 د، سربستی ادیان قاعده سنی الک واسع صورتله تطبیق و اجرا
 آرزوسنده بولندققرینی بیان ایلش اولدققرندن دول متعاہدہ نک
 اشبو بیانی نظر دقته آلدقلمری و ممالک شاهانہ ده دین و مذہب
 فرقی حقوق مدنیہ و سیاسیہ دن استفادہ و دولت مأموریتلرینه

قبول اولتمق خصوصنده مانع اوله میه جنی و عمومک بلا فرق
دین محاکم خصوصورنده شهادته قبول ایدیه جملگری و جماعات
مذهبیه نك تشکلات روحانیه لرینه ورؤسای دینیه لر یله مناسبترینه
خلل کتیرلیه جکی مندر جدر .

(۳) بلغارستان

بر این معاهده سی بلغارستانک حدود دینی قدیم طونه ولایتنک
دو بریجه دن ماعدا اقسامی حاوی اوله جق صورتده تعیین ایلش
و تحدید حدود اثنا سنده حکومت سنیه نك بالقاندرده استحکام انشا
ایده جکی قومیسسیون مخصوص طرفندن نظر دفته آلمنی و صما.
قوف جوارنده اون کیلومتر و قدر یرده استحکام انشا ایدلما سنی
تحت قراره آلمشدر . قونت شوالوفک بیانه نظراً حکومت
سنیه نك صوفیه سنجاغنده بر طریق عسکری به مالک اولسی
روسیه مرخصلری طرفندن قبول اولمشدر . بلغارستان اداره
داخلیه جه مستقل و حکومت سنیه به تابع و خراجگذار بر امارت
اولوب اداره سی خرساتیان اوله جق و عسا کر ملیه سی بولنه .
جقدر . پرنس اهالی طرفندن انتخاب و دول معظمه نك موافقتیله
باب عالی طرفندن مأموریتی تصدیق اولنه جقدر . اوروپا دول
معظمه سی تحت نشین سلاله حکمدار یلری افرادندن هیچ بری
پرنس انتخاب اولنه میه جقدر . امارت منحل اولدقده پرنسینه
بو صورتله انتخاب اولنه جقدر . طرنویده اجتماع ایده جک بر بلغار
مجلس عمومی ملیسی امارت جدیده نك قانون اساسیسی تنظیم
ایده جقدر بونک تنظیمنده و انتخابانده ملل سارنه نك منافعی دخی
نظر دفته آله جقدر . — حکومت عثمانیه نك معاهدات موجوده سی

بلغارستانده دخی جاری اوله جق و باب عالینک موافقتی اولمق سزین
بونلرک تعدیل و تبدیلی جائز اولیه جقدر . داخل امارتدن یکن
اشیادن ضروریه رسمی آلمیه جقدر . بلغارستانده بالجمله دولتلرک
تجارتی معامله متساویه به مظهر اوله جقدر . قایتو لاسیونلر
ایله معین اولان امتیازات قدیمه علاقه دارانک موافقتیله تعدیل
اولندقجه جاری قالا جقدر . ممالک عثمانیه ده اقامت و سیاحت
ایدن بلغارلره عینیله سائر تبعه عثمانیه کبی معامله اولنه جقدر .
(هر نقدر معاهده ده در سعادت بلغار قیو کتخد الغندن بحث
بو قسه ده بومأموریت دولت و امارت بیننده بالمواقفه احداث
قلمشدر) — بلغارستانک حکومت سنیه به ویره جکی سنوی
ویرکونک مقداری ایلروده دول معظمه بیننده بالمواقفه قرار .
لشدر یله جق و بوضه ده دیون عمومی عثمانیه دن بلغارستانه
عائد حصه دخی تفریق اولنه جقدر (بو احکام هنوز اجرا
ایدلما مشدر) . روس جق وارنه شمندو فر قومپانیه سندنظولایی
دولت علیه نك تعهداتی بلغارستانه انتقال ایده جک و حسابات
قدیمه حکومت سنیه و امارت ایله مذکور قومپانیه اداره سی
بینرنده قرار لشدر یله جقدر . ممالک شاهانه شمندو فر خطوطنک
اکالنه دار دولت علیه نك اوستریا دولتنه و روم ایلی تیمور یول
قومپانیه سنه قارشو تعهداتی دخی کندیسنه عائد قسیمدنظولایی
بلغارستانه منتقل اولوب بومسائل ایلروده اوستریا دولت علیه
صربستان و امارت بینرنده بر مقاوله مخصوصه عقدیله تسویه
اولنه جقدر . (بر موجب عهد اشبو مقاوله امضا ایدیلوب حکومت
سنیه کندیسنه عائد حصه بی اجر ایلکده بولمشده ده هنوز بلغارستان

ایفای وظیفه مبادرت ایلامشدر (بلغارستانده عساکر عثمانیه بولتمیه حق و موجود قلاع بر سنه یه قدر هدم ایلیلوب یکیدن انشالری جائز اولمیه جقدر (قلاع مذکور ههنوز هدم ایلامشدر حکومت سنیه نك بلغارستانده مداخله عسکریه حقنه دائر صراحت عهدیه اولامغله بوجوه صده پارس عهدینك صرب و رومانیا حقنده کی حکمی یوقسه شرقی روم ایلی حقنده موضوع قاعده می جاری اوله بیله چکی کسدر بیله مز) . معاهده نك مواد سائر سی بلغارستانك تخلیه سی ، اداره موقتہ نك صورتی ، اهل اسلام اموالی و املاک و ققیه کی خصوصات موقتہ یه عائد اولوب بونلر ایستفانوس معاهده سنندن چوق فرقلی دکدر .

(۴) شرقی روم ایلی

برلین معاهده سی حکومت سنیه نك تحت حکومت سیاسییه و عسکریه سننده اولوق اوزره بلقانلرک جنوبنده و حدود معلومه داخلنده شرقی روم ایلی نامیله برولایت ممتازه تشکیل ایلمشدر . اشبو ولایتك حدود بریه و بحریه سی محافظه حق حکومت سنیه یه عائددر فقط ساده عساکر منتظمه بولندیرلمسی مشروط اولوب بونلرکده اهالی خانه لرنده اقامت ایتمامری مصر حدر . داخل ولایتده عساکر عثمانیه بولتمیوب و قایه آسایش میللیس عسکریه بر جانداره هیئتنه محولدر و بونلرک ضابطانی با اراده سنیه نصب و تعیین اولنده جقدر آسایش ولایت تهدید اولندیغی حالده والی عساکر عثمانیه بی دعوت ایده جک و کیفیت دول معاهده یه بیلدیر یله جکدر . والی خرسه تیان اولوب دولت لک موافقتیله با فرمان عالی بش سنه مدتله تعیین ایلیلور . شرقی روم

ایلینک اداره داخلیه سی مشور نظامنامه اساسی مجلنده اجتماع ایدن بر اوروپا قومیسینی طرفندن تنظیم ایدیله جک و با فرمان عالی اصدار اولنده جقدر .

بالجمله معاهدات موجوده دولت عثمانیه و امتیازات اجنبیه و سربستی مذاهب و ادیان حقنده کی نظامات سنیه شرقی روم ایلیده دخی جاری اوله جقدر . داخل ولایتده کی شمند و فرله دائر باب عالینك حقوق و وظائفی تماماً باقی قالا جقدر . روسیه نك بلغارستان و شرقی روم ایلیده عساکر اقامه ایلمسی مدتی طقوز آی تعیین اولمشدر .

(معلوم اولدیغی اوزره سنه سابقه ماه ایلول رومیسنك اتنجی کونی وقوعاتی اوزرینه بلغارستان امارتی ایله حکومت سنیه بیننده عقد و امضا اولنان و درس معادته مجتمع دول معظمه سفراسی قونفرانسی جانبندن تصدیق قلنسان صورت تسویه موجبتجه شرقی روم ایلی والیلکی بش سنه مدتله بلغارستان پرنسنه توجیه ایدیله رک هر بش سنه انقضاسنده دول معظمه نك موافقتیله پرنسک مأموریتی تجدید قلنه جغی ، شرقی روم ایلی نظامنامه اساسیسنك حال جدیده موافق صورتده دولت علیه و بلغارستان آره سننده با مذا کره تعدیل ایدیله جکی ، شرقی روم ایلی اردوسی ضابطانندن یوزباشی رتبه سی فوقنده اولانلرک با فرمان عالی و پرنسک انهایسی اوزرینه نصب ایدیله جکری ، بالقانلری تحکیم خصوصنده حکومت سنیه نك حائر اولدیغی حق عهدیه مقابل اولوق اوزره شرقی روم ایلی یه مربوط رودوپ و قرجالی نواحیسنك طوغریدن طوغری یه اداره

عثمانیه به ارجاع و اعاده ایدیله چکازی خصوصاتی قرار کیر اولمشدر بلغارستان و شرقی روم ایلی اداره لری حقنه در دست نشر بولنان اشخاص حقوق بین الدول نام اثر عاجزیده دهها مفصل معلومات ویرلشددر .

۵ کرید ولایتی

ولایت مذکوره ایچون ۱۸۶۸ سنه سننده نشر اولنان نظامنامه اساسینک محق کوریله جک تعدیلاته تمامی اجرایی یکریمی اوچنجی مادهده مندرج اولوب فی الحقیقه تعدیلات مذکوره بی حاوی نظام ۱۲۹۵ سنه هجریه سی شهر ذی القعدة سنده باخط عالی نشر بیورلشددر . روم ایلیده صورت اداره لری تعیین اولغیان ولایاتده دخی کرید نظامنه مماثل و فقط ویرکو امتیازینی غیر محتوی نظامات تنظیمیله بونلر ایچون اهالینک واوروپا قومیسسیونک رأیبری آلمسی ماده مذکوره مندرجاتنددر .

۶ یونانستان

قونقره مذاکراتی اثناسنده دولت علیه طرفندن یونانستانه دخی بر مقدار بر ویرلمسی فکر غریبی درمیان ایدلمش و بوکا تصحیح حدود نامی ویریلدک تسالیا واپر قطعهلرینک بو صورتله ترکی در میان اولمشسده حکومت سنیه بونی قبول ایتدیکنندن قرار واقع اون اوچنجی نومرولی پروتوقوله درج اولندهرق عهدنامهک یکریمی دردنچی ماده سننده دخی مذکور پروتوقولهده محتوی قرار اوزرینه حکومت سنیه و یونان ارمننده موافقت حصوله کلدیکی قدرده دول متعاهدنهک مذاکراتی تسهیل ایچون

توسطی کندیلرینه حصر ایلدکاری یازلمشدی بو موافقت بالطبع حصوله کله میوب متوسطلر آرهیه کیرمش و برچوق مذاکراتندن صکره نهیت یکیشهر غلوص تر حاله و ناردده حوالیسینک یعنی قونقرهک تعیین ایلدیکی اراضینک نصفندن برارز زیاده قسینک ترکی قرار کیر اولهرق اوراده کی املاک و قفید واسلامیهک اداره و تسویه اموری و جاعات اسلامیهک حسن اداره سی ایچون یونان ایله دولتمز آرمننده بر مقاوله مخصوصهده عقداینلشددر

۷ بوسنه و هرسک

برلین معاهده سنک یکریمی بشنجی ماده سی بوسنه و هرسکه دائر اولوب ولایتین مذکور تینک اوستریا و مجارستان دولتی طرفندن اداره و عسکر ادخال اوله جغنی و یکی بازار سنجاغنک اداره سی حکومت سنیهده قالوب فقط اوستریا دولتی اورالرده قره غوللر بولندیره بیله جکنی و مواردات تجاریه و عسکریه یه مالک اوله جغنی و تفرعات مسئله ایچون اوستریا و دولت علیه بیلنده اتفاق ایدیله جکنی معلندر .

۸ کسب استقلال ایدن امارت

ایاستفانوس عهدنده اولدیغی کبی برلین قونقره سیده رومانیا صربستان و قره طاغ امارت قدیمه لرینه استقلال ویرمش و مع مافیه بو استقلالنی مساوات مذهبی و سیاسی تماماً وبلا استثنا جاری اولوق شرطنه تعلیق ایلشددر بو امارتلر توسیع حدود دخی ایدرک رومانیا یه دو بریجه قطعهی صربیه نیش سنجاغنی و قره طاغ دخی غوسینه پلاوا پودغوریچه بار و ملحقاتی و نقشک حوالیسی بر اعلمشدر رومانیا پارس معاهده سیله آلدیغی بسارا

بیانی روسیه به اعاده ایلشدر • حدودی اوروپا قومیسونلری طرفندن تعیین اولمش ویالکوز غوسینه پلاوا اهالی اسلامیه سی الحاقی قبول ایلدکلرندن اونواحیه به مقابل اولق اوزره بر چوق مذاکراندنکره اولکون لیمانی قره طاغہ ترک ایلدلمشدر • بو امارتلی ایچنده الک زیاده مظهر اعتبار اولان رومانیا قره طاغ و صرب امارتلی آلدقلمری اراضیه به مقابل دیون عثمانیه دن بر قسمی در عمده ایللمری تقریر ایتدیکی حانده رومانیا به بو وظیفه تحمیل ایلدلمشدر کذا قره طاغ تبعه سنه قدیمی وجهله معامله ایللمسی و صربیلیره دخی معاهدات مخصوصه عقدینه دکن حقوق بین الدول قواعد عمومیه سی موجبجه معامله اوللمسی مشروح ایکن نمائک عثمانیه به کله جک رومانیا لیکر دول ساره تبعه سی امتیازاتندن مستفید اوله جقلمری یازلمشدر •

علاقه دارانک اتفاقیه تعدیلرینه دکن اجنبی تبعه سنک امتیازات قدیمه لرندن استفاده ایللمری، مرور ایده جک اشیادن ترانسیت رسمی آلمامسی، اهل اسلامک هجرت ایتسه لر بیله حقوق تصرفیه و تملکیه لری بر دوام اولسی و املاک میریه و وقفیه مسائلنک اویچ سنه مدته قدر مخصوص قومیسونلر واسطه سیله فنسلی، امور نافع و سائر دن طولانی اراضی متروکه ده حکومت عثمانیه حقوق ووظائفنک امارتله انتقالی امارتلی حتمده کی قواعد عهدیه مشترکه دندر • بو امارتلی دن رومانیا و صربستان مؤخرأ قرالقلری بی اعلان ایلشدر •

قره طاغک استقلال داخلیمی پک زیاده تحدید ایدیلوب بارک ترکی برطاقم شرائطک ایفاسنه ربط ایلدلمشدر شوپله که قره

طاغک حرب سفینه سی و حرب با راغی اوله میه جق، سواحل ده ضابطه بحریه وظیفه سی اوستریاسفان خفیفه سی اجرا ایده جک امارتده یا پیله جق شوسه و تیمور بولی ایچون اوستریانک رأی آله جق، اوستریانک نظامات بحریه سی قبول اولنه جق، قره طاغ تجارتی اوستریا حایه ایده جکد ریعی قره طاغ نوعاً بر اوستریا حایه سنه کیرمشدر بارک شمالنده کائن اسپیح لیمانی و ناحیه سی اوستریا به ویرلمشدر • بزجه دخی بعض تعهدات اولوب با خصوص اشقودره استحکاماتنک شهر دن التی کیلو مترو ایلروسنه کیده مامسی بو یانده قره طاغک سربستی سیر سفانه مظهریتی و اورایه اجنبی سفینه لری کیرمیه جکی مندر جدر مع مافیه قره طاغ دخی اشقودره کولندن دکره قدر اراضی جدیده سننده کی استحکاماتی هدم ایده جک و یکیدن بونلری انشا ایده میه جکدر •
۹ طونه •

بر این معاهده سی طونه نهرینک تأمین سربستی سفائی خصوصیه دخی اشتغال ایدوب نهرک امنیتی ایچون سواحلده کی قلاعک هدمیه یکیدن انشا اولناملری و سواحل محافظه سنه مخصوص سفن خفیفه دن بشقه سفان حریه بولنمادی، تیمور قبولده لازم کلان عملیاتک اجراسی اوستریا به محول اولوب بونک مصارفنی تأمیناً دولت مذکورهنک بر خفیف رسم اخذ واستیفاییده بیله جکنی، طونه قومیسوننک مأموریتی تمید ووظائفنی ابقا اولنوب دروننده رومانیا طرفندنه بر مرخص بولنه جفنی تحت قراره آلمشدر • مؤخرأ طونه قومیسوننی مسئله سی تکرار مذاکره ولوندرده عقد مقاوله اولنه رق قومیسوننده بلغارستان

امارتناک دخی بر مرخصی اولسی و فقط سادہ مشاور صفتیہ
و عثمانلی مرخصیہ بر لکده بولنوب رأی و یرده مامسی تقریر ایتشدر
۱۰ اناطولی

معاهده ننگ اناطولی حقندہ کی احکامی اردہان باطوم و قارص
سنبجاقلرینک روسیہ یہ ترکیہ ایستفانوس عہدیہ ترک اولنان
آ لشکرد و ادیسی و بایزیدک ینہ دولت عثمانیہ اعادہ سی، قدور
شہری و ناحیہ سنک قدیم انکلتزہ و روسیہ قومیسونی قرار ی
حکمنجہ ایرانہ ترکی، ارمنی ساکن اولان و لایاندہ اصلاحات
مناسبہ اجراسی خصوصاً صایتدر .

اللی طقوزنجی مادہ حکمنجہ روسیہ ایمپراطوری باطومی
سربست لیمان حالنہ قومق نیتندہ اولدیغنی اعلان ایش و حال
بوکہ اخیراً روسیہ دولتی مادہ مذکورک حکمی عہدی اولہ میوب
صرف بر بیان ارزودن عبارت بولندیغنی بالادما سربست
لیمانلغنی لغو ایتشدر حالبوکہ بو بیان ارزو بر معاهدہ رسمیدہ
مندرج اولمغله انکلتزہ دولتی بوکا قارشو بحق پروتستو ایش
ایسہدہ ایش اورادہ قالمشدر .

برلین معاهدہ سندنہ دیون عمومیہ عثمانیہ دن بحت اولمیوب
فقط پروتوقولرندہ بوکا متعلق بعض خصوصیات مندرج ومع
مافیہ الیوم مسئلہ مذکورہ شایان ستایش بر صورت مناسبہدہ
فصل اولمغله بو خصوصیدہ اطناب صدودن خارجددر .

کورلدیکی اوزرہ برلین معاهدہ سندنہ حقوق دولک
نظریاتنہ دائر مقررات موجود اولمیوب بالجملہ احکامی مسائل
موجودہ ننگ حلی خصوصنہ معظوفدر بالکز کسب استقلال

ایدن امارت لرحہ سربستی مذاهب و ادیانک شرط استقلال
اولہرق وضعی شایان امتثال بر مثال قیمتداردر

معاهدہ خصوصیه

برلین معاهدہ سنک عقیدینی متعاقب روسیہ ایله دولت علیہ
بینندہ صلح قطعی بی تأسیس ایلک اوزرہ فی ۸ شباط افرنجی
۱۸۷۹ تاریخندہ اشبو معاهدہ خصوصیه عقد ایدیله رک حال
مودت و موالات اعادہ ایدلمشدر .

معاهدہ ننگ ایلک اوچ مادہ سندنہ دولت علیہ ایله روسیہ
بینندہ بعدما صلح و موالات جاری اولہ جنگی و ایستفانوس معاهدہ
صلحیہ سنک برلین قونغرہ سندنہ فسخ و تعدیل اولنسان احکامی
یرینہ برلین معاهدہ سندنہ مندرج موادک جاری و معتبر اولہ جنگی
و معاهدہ صلحیہ مذکورہ ننگ فسخ و تعدیل اولنسان احکامی یرینہ
دنجی اشبو عہدنامہ ننگ قائم اولہ جنگی مندرجددر .

در دنجی مادہدہ ترک اولنسان قارص اردہان و باطوم
اراضیسندن و دوبریجہ دن متباقی تضمینات حربیہ ننگ مقداری
سکز یوز ایکی ملیون بشیوز بیک فرانقہ قرار و یریلوب بونک
صورت تأدیہ سی برلین قونغرہ سندنہ پرنس غورچاغووک
و یردیکی تأمیناتہ خلل کلامک اوزرہ ایزرودہ مذاکرہ ایدیله -
جکی محررددر . بوکانونقیقاً اخیراً روسیہ ایله بر مقاولہ مخصوصہ
عقد اولنہرق تضمینات مذکورہ یہ فائض یوریدلمامسی ورأس
المالک تقاسیط سنویہ ایله تسویہ سی و بونی تأمیناً اعشار و اغنام
اقسامندن بعض وارداتک قارشولق طوتلمسی قرارلشد یرلمشدر .

بشجی ماده محاربه اخیر ه دن طولایی روسیه تبعه و تجار انک و میر انک دو چار اولد قری ضررک تضمیننه دائر اولوب بونلرک مقداری یگرمی التي ملیون یدیوز الی بیک فرانسی تجاوز ایتمیه. جکی و معاهده نک تصدیق و تعاطی سندن بر سنه صکره سندن اعتباراً مطالبات ظهور ایند جکه روسیه سفارتی طرفندن تدقیق اولنه رق باب عالی یه اشعار قلنه جعی و ایکی سنه صکره ارتق بو کبی دعاوی نک قبول ایلمیه جکی یازلمشدر.

التنجی ماده ده بر لین معاهده سنک تاریخ امضا سنه قدر روسیه ده کی اسرای عثمانیه یه ای دیلان مصارفی حساب ایتمک اوزره طرفیندن مخصوص قومیسر لر نصبی و روس اسراسی ایچون ای دیلان مصرف بوندن طرح ای دلد کدن صکره باقیسنک یدی سنه ظرفنده متساوی یگرمی بر تقسیط ایله تسویه سی قرار لشدر لمشدر. یدینجی ماده روسیه یه ترک اولنان محللر اهاالیسنه دائر اولوب احکامی ایاستفانوس عهدینه مماتل ایسه ده سده هجرت ایتمک ایستقیانلره ملکارینی صامق اوزره ویری لان اویج سنه مهلتک معاهده حاضره نک تاریخ تصدیقندن اعتباراً حسابی معلندر سکننجی و طقوزنجی ماده لر و قوعات حرابه ده ذیم دخل اولان طرفین تبعه سی حقنده عفو عمومی اعلاننی، اوننجی ماده معاهدات سابقه غیر منفسخنک کا کان جریانی و اون برنجی ماده دخی روسیه تبعه سنک سنین و فیره دن بری سورنجمده قالمش اولان کد عواری سر بعضی فصل اولنه جعی حقنده باب عالی نک تعهدینی حاویدر.

بو معاهده خصوصیه نک زمان امضا سنده رومانی و صرب و قره طاغ دول مستقله دن بولنوب حکومت سنیه ایله طوغری دن طوغری یه عقد معاهده ایله جکلرندن انلره دائر ایاستفانوس عهدی احکامی تکرار ای دلما مشدر.


خطا صواب جدولی

صواب	خطا	سطر	صحیفه
نشبت	توسل	۲	۲
اثر	آثار	۴	۲
ایتمشدر در	ایتمشدر	۱۶	۶
ناحق	ناحق	۲۱	۶
بجاغنه	بجاغندن	۱۰	۷
مخاری نینک	مخاری نینک	۱۲	۷
صنایع	صنایع	۱۹	۹
سپته	سپته	۳ - ۴	۱۳
مسلك فلسفینک	مسلك و فلسفینک	۱۷	۱۳
سامنیت	سامنیت	۱۱	۱۴
شهر لری نینک	شهر لره	۱۲	۱۴
ایتمشدر در	ایتمشدر	۱۸	۱۴
غیر تمدن	غیر تمدن	۳	۱۶
اخلاقی	اخلاقی	۹	۱۶
تابعیتنده	تابعیتنده	۱۱	۱۶
مقاومت	مقاومت	۱۴	۱۶
انضباط	انضباط	۲۱	۱۷

Süleymaniye Kütüphanesi
 4900

صحیفه	سطر	خطا	صواب
۲۲	۱۸	ایمپراطور	ایمپراطور
۴۰	۱۳	اخلافندن	اختلافندن
۴۲	۱۷	بحر به نك	بحر به سنك
۴۴	۲	موخرآ	مؤخرآ
۴۵	۱۸	Noufrage	Naufrage
۵۴	۹	اوقتلر	او وقتلر
۷۰	۱۵	de Dudi	de Indi
۷۵	۲	ایدیله نك	ایدیله رك
۷۶	۱۱	انمنسی	آنمنسی
۹۳	۱۴	ایتمشسه ده	ایتمامشسه ده
۹۵	۱۷	جنتلیدیسك	جنتلیدیسك
۹۶	۴	Mar cliberum	Mare liberum
۹۶	۵	Marec lausum	Mare clausum
۹۶	۱۲	Leongenkins	Leon Genkins
۹۶	۱۴	SamuelRechel	SamuelRachel
۹۸	۴	عكشنى	عكسنى
۹۸	۱۱	محابریندن	محاربیندن
۱۰۵	۲۰	مستلتكافی	مستملكافی
۱۰۶	۱۶	لوئیز	لوئیزبان
۱۱۷	۱۱	ساتنظه	ساتنطه
۱۲۰	۲۰	استانك	نہستانك
۱۲۲	۷	اختلاپیده	اختلالده
۱۲۲	۱۷	حول	حصول
۱۲۳	۸	اوله ی	اولدی

صحیفه	سطر	خطا	صواب
۱۳۱	۱۸	اخانت	اهانت
۱۳۹	۲	تشکیل	تشکیلی
۱۴۰	۵	اولمنسی	اولنمنسی
۱۴۱	۴	محاصره بحر یه	محاصره بر یه
۱۴۸	۱۷	روملر	روسر
۱۵۰	۶	سعنن	سنت
۱۶۶	۲	بالافتضا	بالافتقا
۱۹۴	۱۳	اصوله	احواله
۲۰۵	۵	رئیس ی	رئیس



فهرست

صحیفه

۲	افاده مخصوصه
۴	فصل اول — ازمنه متقدمدن قرون جدیده ابتداسنه قدر
۴	۱ — عهد قدیم
۱۵	۲ — رومانك انقراضی • عیسویت و جرمانلر
۲۶	۳ — اسلامیت
۳۸	۴ — قرون وسطی • دولت عثمانیه نك ظهوری

۵۱	فصل ثانی — قرون جدیدہ ابتداسنندن و استفالیہ
	معاهده سنہ قدر
۵۱	۱ — وقوعات سیاسیه
۶۸	۲ — مؤلفین و آثار
۸۳	فصل ثالث — و استفالیہ معاهده سنندن فرانسه
	انقلابہ قدر
۸۳	۱ — او ترخت معاهده سنہ قدر
۱۰۴	۲ — پارس و هو برتسبورخ معاهده لرینہ قدر
۱۲۰	۳ — فرانسه انقلابہ قدر
۱۳۸	فصل رابع — فرانسه انقلابندن زمانزہ قدر
۱۳۸	۱ — فرانسه انقلابی وویانہ قونفرہ سی
۱۵۶	۲ — ویانہ قونفرہ سنندن پارس معاهده سنہ قدر
۱۷۳	۳ — ویانہ قونفرہ سنندن پارس معاهده سنہ قدر (مابعد)
۱۹۱	۴ — پارس معاهده سنندن برلین معاهده سنہ قدر
۲۰۹	۵ — برلین معاهده سی واکا متفرع مقاولات دولیہ

انتہا